

# **AINILESAD-GARDA**

## **ÉXODO**

## **GEBE-SOGLENAID**

## **Garda-nug**

*Ainilesad-Garda.* We-garda, Garda-Sogataled-sogabogwadid. We-garda, Septuaginta-gardagine, Éxodo'ye onugsasmalad. We sogleged, “ainilesadye.” Hebreo-gayabardina, Shemoth'ye nugad. A-sogleged, “dule-nugye.” We-garda, Ainilesadye nugad, ar ade, Moisés, Israel-dulemar-Egipto-yargi-onosgu, idumai-gusadgi bur sunmaked.

*Ainilesad-Gardagi weyob sunmaklenaid*

Ainilesad-Gardagine, Israel-dulemar birgabargus Egipto-dulemar-maiga bukwa gusmalad. Degin, Israel-dulemar Egipto-yalagi-wilebukwa-onolesadgi sunmaklenaid.

We-gardagine, weyob ilemakar sunmaklenaid:

1. Bab-Dummad Egipto-yargi Israel-dulemar-onosad (1:1–15:21).
  - 1a. Israel-dulemar Egipto-yargi sabsur-odurdaklebukwa gusad (1:1-22).
  - 1b. Moisés-gwalulesad, degi, Bab-Dummad Moisés'se gochad (2:1–4:31).
  - 1c. Bab-Dummad, Moisés'ba Egipto-dulemarga bonigan-onosad (5:1–11:10).
  - 1d. Dule-oburgwed-baliwitir Egipto-yargi-nasad (12:1–13:22).
  - 1e. Demar-Ginnidye-nugadgi obaksamalad (14:1–15:21).

2. Israel-dulemar Sinaí-yarse nadegusad (15:22–18:27).
  3. Sinaí-yargi Bab-Dummad Israel-dulemarbo igar mesisad (19:1–24:18).
  4. Babse-goled-neg-sunna-seleged-soblegoed-igar (25:1–31:17).
  5. Bab-Dummad Israel-dulemarbo gannar igar-mesisad (31:18–34:35).
  6. Bab-Dummadse-goled-neg-sunna-seleged (35:1–40:38).
- Be itogua.

## **1. BAB-DUMMAD EGIPTO-YARGI ISRAEL-DULEMAR-ONOSAD**

(1:1–15:21)

### **1a. Israel-dulemar Egipto-yargi sabsur-odurdaklebukwa gusad**

(1:1–22)

*Israel-dulemar Egipto-dulemarse sabsur-odurdaklebukwa gusad*

<sup>1</sup> Wemar-Israel-masmala na e-babba Egipto-yarse nonigusmalad:

<sup>2</sup> Rubén, Simeón, Leví, Judá,

<sup>3</sup> Isacar, Zabulón, Benjamín,

<sup>4</sup> Dan, Neftalí, Gad, degi, Aser.

<sup>5</sup> Jacob-e-gwenadgan bela dulapaa-gakambe-mergu (70), Egipto'se nonimalad. José'di bato Egipto-yargi maid.

<sup>6</sup> Ibagan-nadedba José, e-gwenadgan, degine, bela na e-unni-sergumaladi burgwismalad.

<sup>7</sup> Ar Israel-dulemar mimmigan-ichesurnikussoggu, yaisur mergedude. Degisoggu,

dutusur gunonimalad. Egipto-yargi Israel-dulemar bela-bela-mergu ambikunonimalad.

<sup>8</sup> Undar birgamar nasad-sorba, Egipto-yargi rey-baid megnonikid. A-rey wissulid, José doa-dule gusa.

A-reyde e-dulemarga sogded: <sup>9</sup> “Be dakmar, Israel-dulemar anmarba bur melumalad, degine, anmarba bur dutusurmarbalid.

<sup>10</sup> ”Degisoggu, anmar ise-itoar igar-amiergebed, adi, melle bar sordamar ega merguegar. Ar degisulile, anmar bila-onoalile, abakalegi anmar-isdarmaladba-akadele, anmargi aibinnalile, ar degiile, dule-dummaganga gudmaloed.”

<sup>11</sup> A-ulale, Egipto-dulemar dummaganonugsasmalad, adi, Israel-dulemar arbaed-dutusulidgi oarbamalagar. Egipto-dulemala Faraón’ga-mas-sabogega neggweburmar-sobega Israel-dulemar-imaksad. We-neggweburmarde, Pitón’ye, degine, Ramesés’ye nugad.

<sup>12</sup> Ar Egipto-dulemar bur bule Israel-dulemar-sabsur-imakmaidba, aka bur bule Israel-dulemar mergumaid. Degisoggu, Egipto-dulemala bela-bela Israel-dulemar-nue-dobguardmarsunnad.

<sup>13</sup> Egipto-dulemala e-maiga Israel-dulemar bela-bela sabsuli imaksad. <sup>14</sup> Nue wiosmalad, arbaed-dutusulid ega ukdamalad, napsa-obured, degi, napsa-ginnid akwayob-sobega, deginbali, bela sapurba-arbaleged amarga uksabalid. Bela wemarginé, Israel-dulemala sabsur imakledamalad.

<sup>15</sup> Deginbali, Egipto-e-rey Hebreo-omegangasikwigamaladga sunmaksad. A-mukwa-gwensak

Sifra'ye nugad, baiddi, Fúa'ye nugad. Amarga Faraón sogded:

**16** —Bemar Hebreo-omeganga sikwigaarmalale, nue be dakmalo, wede machigwadibe, bunolodibe. Machigwale, oburgwemalo. Bunolordina, melle oburgwemalo.

**17** Degi-inigwele, mukwamar-sikwigamalad Bab-Dummad-dobe itosmalad. A-ulale, Egipto-rey-ega-sogedba imaksasurmalad, machimala-oburgwissurmalad.

**18** Geb degine, Egipto-rey mukwamarse gochad, amarga sogded:

—¿Ar ibiga wede bemar machimala-oburgwedasurmala?

**19** Mukwamar Faraón-abin sogdemalad:

—Ar ade, Hebreo-omegan Egipto-omeganyobsulid. Ar Hebreo-omegandi dutusulid, amba yoo anmar ese warmake, bato ugakgusdaed.

**20** Bab-Dummad mukwamar-sikwigamaladgi nued-binsasad. Israel-dulemardi mergumai, degine, bur bule dutusurgumai gusad. **21** Ar mukwamar-sikwigamalad Bab-Dummad-dobe-itosmarsoggu, Bab-Dummad egi nued-binsasad, bukidar-mimmigan-nikuega imaksad. **22** Ar Faraón'di na e-dulemarga igar-mesisad: “Hebreo-dule-gwalulesale, machigwadibe, bela diwarlse metemalo. Bunolordina, melle oburgwemalo.”

## 2

### **1b. Moisés-gwalulesad, degi, Bab-Dummad Moisés'se gochad (2:1–4:31)**

### *Moisés-gwalulesad*

<sup>1</sup> Leví-wagwa-wargwen ome-nikusad. E-ome amba Leví-wagwasikidmogad. <sup>2</sup> A-ome, gurgin-nika gunonikid. Geb degine, susugwa ega uklenonikid. E-nan machi-bipi-yeerdakle-dakargu, nii-walapaa odukusad. <sup>3</sup> Ar geg bar-dikasurgus odukugussoggú, sargi-garba susad. Geb a-garba-e-yaa-ollo-ollogwad baryagi enir-enir imaksad. Geb degine, e-nan sargi-garbagi machi-bipi-mesisgu, nargammugiid-diwar-gakaba-bukwadimbaba nasiksad. <sup>4</sup> E-bun bannabaa gwisgusad, dakega, igi-e-susde gudodibeye.

<sup>5</sup> Geb degine, Faraón-e-sisgwá diwarse obnonikid. Ar yagan-ega-arbamaladdi diwar-gakaba garmakdimargua, Faraón-e-sisgwá nargammugii-dakleged-imbaba garba-nai dakalid. Geb degine, ega-arbaed-ome-wargwen-barmisad, adi, ega garba sedagegar. <sup>6</sup> Garba-egadgu, machi-bipi-bomai dakalid. Faraón-e-sisgwá machi-bipi-nue-wiledakde, sogded:

—We-machi-bipi, Hebreo-dule-e-goed.

<sup>7</sup> Geb degine, machi-bipi-e-bun Faraón-e-sisgwaga sogded:

—Hebreo-ome-wargwen we-machi-bipi-akwega an bega aminaer, ¿nued be itoge?

<sup>8</sup> Faraón-e-sisgwá bunagwaga sogded:

—Eye, be aminae.

Geb degine, bunagwá machi-bipi-e-nanse gornaded. <sup>9</sup> Faraón-e-sisgwá machi-bipi-e-nanga sogded:

—We-machi-bipi be anga-akwega be sede. Anga-be-akoedi, an be-bennukoed.

AGINE, e-nan goe-sesad. Geb degine, akwedii gusad. <sup>10</sup> Machi-bipi mam-iargusgu, e-nan Faraón-sisgwaga uksad. Geb agi, Faraón-sisgwa na e-mimmiga machi-bipi-imaksad. Geb Moisés'ye machi-bipi-onugsasad, ar ade, sogded:

“Ar ande diigi onosaddeeye.”

### *Moisés Egipto-yargi wakited*

<sup>11</sup> Moisés bato machered-gusgu, ibagwengine, e-gwenadgan-ablis-emaladse ataknade gusad. Agi dakalid, e-gwenadgan arbaed-dummad imaknanaai. Geb degine, Moisés dakdebalid, Egipto-dule-wargwen Hebreo-dule-sabsur-sarsonai. Hebreo-dule Moisés-ebogwa na ablis emaladid. <sup>12</sup> Geb degine, Moisés bela e-dikarba ataksagu, dulemar-sate daksagua, Egipto-dule-oburgwisad. Geb degine, odukuegala, ukubyaba digsad. <sup>13</sup> A-banedgine, Moisés gannar e-gwenadganse nade gusbalid. Agi dakalid, Hebreo-dulemar na ebo-urwenanai. Dule-sabsur-imaknaidse Moisés egichided:

—¿Ibiga na be-ablis-emalad be sabsur sarsonai?

<sup>14</sup> We-Hebreo-dule Moisés-abin sogded:

—¿Ar doa anmar-dummadga, degi, anmargai-gar-nabogedga be-onugsasa? ¿Egipto-dule-oburgwisadyob be an-oburgwebimoga?

Moisés weyob ega sage itoargu, dobeitonaded, ar ade, mag itoged, ede Egipto-dule-oburgwisad, degine, binsaded, ede wisgulesye.

<sup>15</sup> Ar inso, Faraón wisguargu, Moisés Egipto-dule-oburgwisye, agi Faraón, Moisés-oburgwebi-gualid. Ar Moisés'di wakitegu, Madián-yalaganba

megnaded. Warmakdapgu, dia-gwagwen-naba sigidapid.

<sup>16</sup> Madián'gi dule-irwa-Bab-Dummadse-goled-wargwen maid. We-duledede, Reuel'ye-nugad, degi, Jetro'ye nugbalid. We-duledede, sisgan-walagugle (7) nikad. A-ibagi, we-bunamala e-bab-sibad-wawaad diigi-ogobega, dii-sied-enogega, diase dii sunaded.

<sup>17</sup> Ar sibad-wawaad-edarbemalad-baigan nonimogad. Amar, bunamala-ononnosmalad. Moisés we-bunamala-walagugled-bendakega ulusad. Geb degine, Moisés bunamala-sibad-wawaadmar diigi ogobsad. <sup>18</sup> Bunamala e-bab-Reuel'se gannar modapmargu, e-bab ese egichialid:

—¿Ar ibiga, emigindi bur bemar gwae-gwae nonimala?

<sup>19</sup> Bunamala e-bab-abin sogdemalad:  
—Sibad-wawaad-edarbemalad-baigan anmarse uluargu, Egipto-dule-wargwen anmarbina ulusad. Geb a-sorba, anmarga dii wesad. Geb deginbali, diigi sibad-wawaadmar ogobsabalid.

<sup>20</sup> Geb degine, Reuel e-sisganga sogded:  
—Emide, ¿bia we-duledede? ¿Ar ibiga we-dule be wargwen obesmala? Bemar ese gornamala, adi, anmarse mas-gundagegar.

Geb Moisés'se gorapmargu, mas-gunbukwadgi Reuel Moisés'ga sogded: “Be an-walik megoye.”

<sup>21</sup> Moisés, Reuel-ega-ibmar-sogsad yeer-itosgu, sogded: “Nabirdo, be-walik an gudiguodo.” Degisoggu, Moisés Reuel-neggi megnonisunnad. Geb degidbali, Reuel na e-sisgwa-Séfora Moisés'ga

uknonikid, adi, Moisés nikuegar. <sup>22</sup> Degidgine, Séfora'ga susugwa uklenonikid. Moisés a-susugwa Gersón'ye onugsasad, ar ade, Moisés sogded: “Yarbaidgi, an-yarsulidgi an gudiid.”

<sup>23</sup> Birgamar naded, geb Egipto-e-rey burgwenonikid. Deger-inigwele, Israel-dulemardi amba maiga gudidimalad-ular, naibitodidimalad. A-ular, bodidimalad. Geb degine, Bab-Dummad we-Israel-dulemar-bodidimalad itosad. <sup>24</sup> Degerine, Bab-Dummad Israel-dulemar-nunmak-itodidimalad nue mag daksabalid. Agi, Bab-Dummad Abraham'bo, Isaac'bo, Jacob'bo, igar-mesisad insaded. <sup>25</sup> Agine, Bab-Dummad Israel-dulemar-dakded, degine, nue mag itosbalid, igi-Israel-dulemar wilebukwa.

### 3

#### *Bab-Dummad Moisés'se gochad*

<sup>1</sup> Moisés e-saka-Jetro'ga sibad-wawaad edarbediid. Jetro'de, Madián'gi dule-irwa-Bab-Dummadse-goledid. Ibagwengine, Moisés negadulesulidganba sibad-wawaadmar sesagusad. Bab-Dummad-yar-dummadse modapid. A-yardummadde Horeb'ye nugad. <sup>2</sup> Agi Bab-Jehová-e-baliwitur sapi-bula-abargi, soo-gwabunye-gwichidgi, Moisés'se magarosad. Moisés sapi-bula nue-nuu dakdegu, dakalid, sapi-bula gummakgwichi, degite, bergusuli. <sup>3</sup> Geb degi, Moisés binsaded: “¿Ar wedi igidi? An daknaoed, wede ibiga sapi-bula geg bergue.”

<sup>4</sup> Bab-Jehová dakdegu, Moisés e-dakega ese warmakdaniki, agi sapi-bula-abargi Moisés'se goted:

—¡Moisés! ¡Moisés!

Moisés Bab-Dummad-abin sogded:

—Degite, wegi an be-itogwichi.

<sup>5</sup> Geb degine, Bab-Dummad Moisés'ga sogded:

—Melle anse be warmako. Deginé, be-naggi nag-uka-yoid be unge. Ar be napa-annagwichidi, napa-nuedid, nega-isligwaled-napad.

<sup>6</sup> Bab-Dummad sogdebalid:

—Ani an be-babgan-e-Bab-Dummadid. Ani an Abraham, Isaac, degi, Jacob-e-Bab-Dummadid.

Geb degi, Moisés dobe-Bab-Dummad-wagar-dakedba na e-wagar edusad. <sup>7</sup> Ar Bab-Jehová'di Moisés'ga sogdebalid:

—Ar nue an daksad, igi an-dulamar Egipto-yargi nue wilebukwa. Ar ade, Egipto-dulemar sabsur an-Israel-dulemar-wiodidimalad, na e-bodidimalad, na nunmak-itodidimalad, an itosbalid. <sup>8</sup> A-ulale, we-napnegse an aidenonikid, adi, Israel-dulemar Egipto-dulemar-wilebukwadgi an onogegar. Andulamar yar-nued-naidse, an sedoed. Ayarde, dummad-naid, napa-nuedid, gadi ibmar sanmaked.

"A-yarginé, we-dulemar bukwad:

Canaán-dulemar, Het-dulemar, Amorreo-dulemar,

Ferezeo-dulemar, Heveo-dulemar, degi, Jebuseo-dulemar bukwad.

<sup>9</sup> "Israel-dulemar nunmak-itodimaladba bobukwad an itosad. Deginé, an daksabalid, Egipto-dulema dogdar sabsur-Israel-dulemar imakbukwad. <sup>10</sup> Degisoggu, be nae, ani an Faraón'se be-barmidoed, adi, an-Israel-dulemar Egipto-yargi-bukwad be ononaegar."

**11** Geb degine, Moisés, Bab-Dummadga sogded:

—Ar an Faraón-asabin-gwisgunaega, ¿an doasunna? Israel-dulemar Egipto-yargiwilebukwad an ononaega, ¿an doasunna?

**12** Bab-Dummad Moisés-abin sogded:

—Ani an beba gudiguoed. Wegi be dakoed, ani an be-barminaaid: An-dulamar-Egipto-yargibukwad be onosale, bela bemala we-yargi be an-nug-odummobukwa gumaloed.

**13** Ar Moisés'di, Bab-Dummad-abin sogded:

—Israel-dulemarse an naele, an ega sogele: Bedadgan-e-Bab-Dummad bemarse an-barmiarye, Israel-dulemar anse egisdamaloed: ‘¿Ar Bab-Dummadde igi nugsunna?’ Degite, ¿igi an abinsogosunna?

**14** Bab-Dummad, Moisés-abin sogded:

—ANI AN, AN-GUED. Israel-dulemarga be sogo: ‘AN-GUED bemarse an-barmialid.’

**15** Geb degine, Bab-Dummad Moisés'ga sogdebalid:

—Israel-dulemarga be sogbalo: ‘Bab-Dummad-Jehová, be-dadgan Abraham, Isaac, degi, Jacob, amar-e-Bab-Dummad bemarse an-barmialid.’ Weyob an nugaguad. We degibi an-nug degisadegu nugad. **16** Moisés be nae, Israel-girmar-dummagan-ebo be ambikuo, ega be sogo:

” ‘Bab-Jehová, be-dadgan Abraham, Isaac, degi, Jacob, amar-e-Bab-Dummad anse magarosad. A-Bab-Dummad anga sogsad, ede bemar-daksaye, degine, bemar-itobarye, igi Egipto-yargi bemar-wiobukmala.’ **17** Ega be sogbalo: ‘Bab-Dummad

anga sogسابارے، ede bemar Egipto-yargiwilebukwad bemar-onogoye. Deginé, ede bemar-sedoye:

Canaán-dulemar-bukwadse, Het-dulemar-bukwadse, Amorreo-dulemar-bukwadse,  
Ferezeo-dulemar-bukwadse, Heveo-dulemar-bukwadse, degi, Jebuseo-dulemar-bukwadse,  
amar-dulemar-yalaganse bemar-sedoye.

” ’A-yalagine napa-nuedid, gadi ibmar sanmakedid.’

<sup>18</sup> ”Israel-girmar-dummagan be-itogoed. Geb degine, amala bebo Egipto-e-reyse namaloed. Egipto-e-reyga bemar sogoed: ‘Hebreo’mar-e-Bab-Dummad-Jehová, a anmarse magarosad. Degisoggu, ibapaa-naedgi nega-dulesulidganba, naedse be anmar-imakye, adi, anmar agi anmar-Bab-Dummad-Jehová’ga, ibmar ogumakar ukegar.’

<sup>19</sup> ”Degi-inigwele, ar an nue-wisid, Egipto-e-rey baisursunnagwadgi bemar-onogosulid. Ar Egipto-e-rey ise-gandikidgi geb bemar-onogoed.

<sup>20</sup> Degisoggu, an-gangued an oyogoed, degine, Egipto-dulemar sabsur an odurdakoed, burgwed-nagase an imakoed. Ibmar-dakledisulid Egipto-yargi an imakoed. A-sorbali, geb Egipto-e-rey-Faraón bemar-onogoed.

<sup>21</sup> ”Deginbali, an imakbaloed, Egipto-dulemar Israel-dulemargi nued-binsaed, adi, Israel-dulemar Egipto-yargi nodmalale, mer arganagwabi nodmalagar. <sup>22</sup> Bela omegan wargwen-wargwen na e-neg-dikarba-mamaidsedibe, Egipto-dule-negyagi

gudiidsedibe, ibmar egisoed: Ibmar-manigi-sobaled, ibmar-orgi-sobaled, mormar. Weibmarmar be-masmalaga, degi, be-bunamalaga be yooed. Ar weyob Egípto-dulemar-ibe bemar ibmar suoed.”

## 4

### *Ibmardakledisulid-oyoleged*

<sup>1</sup> Geb degi, Moisés Bab-Dummad-abin sogded:

—Israel-dulemar an-itogosurmalad, an-bengumaloed. Anga bur sogdamaloed: ‘Bab-Jehová bese magarossuli.’

<sup>2</sup> Bab-Jehová Moisés-abin sogded:

—Ar nabir be sogendo. Degite, ¿ibu be-argangi be ganisunna?

Moisés, Bab-Jehová-abin sogded:

—Gaapoled.

<sup>3</sup> Bab-Jehová apor Moisés’ga sogded:

—Gaapoled napase be mete.

Moisés gaapoled napase meted. Geb degine, gaapoled yog naibega binyar-naded. Moisés dobedba idu abarmakdenad. <sup>4</sup> Ar Bab-Jehová’di Moisés’ga sogded:

—Be-argangi naibe e-bunnugi be gae.

Moisés achadgu, naibe-gasgu, naibe gannar gaapoledga binyeded.

<sup>5</sup> Bab-Jehová Moisés’ga sogded:

—Weyob be imakoed-ulale, Israel-girmardummagan be-benguosurmalad, be-dadgan Abraham, Isaac, Jacob, amar-e-Bab-Dummad-Jehová, bese magarosye.

<sup>6</sup> Bab-Jehová Moisés’ga sogdebalid:

—Be-argan be-moryaba be-binasgargi be mesé.

Moisés na e-binasgargi e-argan mesisad. E-argan gannar onoargu, naibe-buna-yaa-maleged nika, ise-sibudiki, dakuu-dakle onoalid.

<sup>7</sup> Geb degine, Bab-Jehová Moisés'ga sogdebalid:  
—Gannar be-argan be-binasgargi be mesbali.

Moisés deyob imaksabalid. Gannar na e-argan onoargu, e-argan bato e-san-baidyobi nued noalid.

<sup>8</sup> Geb degine, Bab-Jehová Moisés'ga sogdebalid:  
—Gebe be ibmar-imakoedgi Israel-dulemar be-itosurmala, beba ibmar imaksurmala, ibmar-sogbogwad ega be oyogoed. Abakalegi ibmar-sogbogwad-be-oyogoedgi be-itoarmala.  
<sup>9</sup> Ar Israel-dulemar amba be-ibmar-sogbogwad-oyosad itosurmala, beba ibmar-imaksurmala, dii diwargi be suoed. A-dii napagi be eogoed. Dii-diwargi-be-susad napagi aryogogua, dii abega binyidoed.

<sup>10</sup> Moisés Bab-Jehová-abin sogded:  
—¡Dummad, yeergangu-itole! Aku an itodaed, ibu an sogoe. Gusgu degibi an daniguad, emisgin-bisulid. An gale-gale sunmaked, an baisursunna sunmaksulid.

<sup>11</sup> Ar Bab-Jehová'di Moisés-abin sogded:  
—¿Ar wede doa, dulega gaya sisa?  
¿Wede doa, dule-geg-sunmaked imaksa?  
¿Wede doa, dule-uaya-yalliled imaksa?  
¿Wede doa, dule-aku-ataked imaksa?  
¿Wede doa, dule-mag-ataked imaksasunna?  
¿Ani an Bab-Jehová-guedgi imaksasursi?

<sup>12</sup> "Degisoggu, be nae. Be sunmakder, ani an beba gudiguoed. Degine, be-ibmar-sogoed, ani an be-odurdakoed."

**13** Moisés'di sogdebalid:

—¡Dummad, yeergangu-itole! An bega guosolid. Bese wilesakwaa an egise, bur be dule-baid barmide.

**14** Geb degidgine, Bab-Jehová Moisés'se uluded, ega sogded:

—¿Ar ande Leví-wagwa-be-ia-Aarón, magar daksursi? ¿Ar a-duledede nued sunmaksursi? Deginbali, be-ia-Aarón be-abin nodagoed. Bedakdagogua, Aarón ulubgi weligwar itogoed. **15** Aarón'ga bela be sogoed, igi sunmakoe. Bemar sunmakalile, ani an be-bendakoed, degine, ani an Aarón-bendakbaloed, adi, bemar nuekwwaa sunmakmalagar. Degine, an bemarga sogoed, igi bemar ibmar imakmaloe. **16** Aarón be-anar dulemarga sunmakoed, Aarón'de bega be-gwabinyob guoed. Deginbali, be, Aarón'ga Bab-Dummadyobiyob ega be gumogoed. **17** Wegaapoled-be-ganikid be sede, ar ade, wegaapoledgi ibmar-gegerdaklemalad be oyogoed.

### *Moisés gannar Egipto-yarse alid*

**18** Moisés gannar e-saka-Jetro-negse nonikid, agi e-sakaga sogded:

—Gannar an Egipto-yarse nabied, bia angwenadgan-ablis-mesamalad bukwadse. An daknabied, amba an-gwenadgan dulamardibe.

Jetro Moisés-abin sogded:

—Be nae, bitigi-nuedgi be modapina yeerban.

**19** Moisés Madián-yalaganba amba gudigua, agi Bab-Jehová Moisés'ga sogsad:

—Egipto-yarse gannar be nae, ar ade, bela dulemar-be-oburgwebimaladi bato bela burgwismalad.

<sup>20</sup> Agi Moisés moli-uayasuidgi na e-ome, degi, e-machimala-onakwisgu, sesagusad, Egipto-yarse gannar aligusad. Moisés Bab-Dummad-gaapoled e-argangi-ganiki nadegusad. <sup>21</sup> Geb a-sorbali, Bab-Jehová Moisés'ga sogded:

—Egipto'se be modapile, Faraón-asabin bela ibmar-gegerdaklemalad be imakoed. We-ibmar-gegerdaklemalad sunna-imakega an bega gangued uksad. Ar andi aka bur bule Faraón-burguega an imakoed, adi, Faraón melle Israel-dulemar-onogegar.

<sup>22</sup> "Geb degine, Faraón'ga be sogoed: 'Bab-Jehová weyob soged: Israel an-machi-sailaginedid. <sup>23</sup> Bato an bega sogsad, an-machi be onoye, adi, anse gormalagar, an-nug odummogegar. Ar bede yapa an-machi onosoggu, be-machi-sailaginedi an oburgoed.' "

<sup>24</sup> Moisés igarba nadapgua, bia na-e-gwenadganmala mutik gaboedgi, Bab-Jehová, Moisés-abin noalid. Bab-Jehová, Moisés-oburgwebigualid. <sup>25</sup> Geb degine, Séfora estin-akwa susad. Geb agine, e-machi-abgan-uka-duku siksad. Geb Séfora Moisés-nag-dukugi e-machi-abgan-uka-duku sikaa imaksad. Geb degi, Moisés'ga sogded: "Be an-sui-nue-napiragwadid, sui-ablis-eoged-duled."

<sup>26</sup> Geb degine, Bab-Jehová Moisés-naega imaksasunnad. Séfora e-machi-abgan-uka-duku-siksad-ular, sogsagusad, "Moisés'de sui-ablis-eoged-duleye."

<sup>27</sup> Ar Bab-Jehová'di Aarón'ga sogded: “Nega-dulesulidganba be nae, ase be Moisés-abin be nae.” Geb agine, Aarón naded, Bab-Dummad-yargi Moisés-abingudapid. Agi, Moisés-e-wagar udapid, ega sogegar, be nued sogeye. <sup>28</sup> Geb degine, Moisés Aarón'ga bela ibmar sogsad, igi Bab-Jehová ega ibmar-sogoye sogsadba. Degin, ega sogsabalid, ibmar-gegerdaklemalad-imakega e-barmiarbarye.

<sup>29</sup> Geb degi, Moisés, Aarón'bogwa Israel-girmar-dummagan-ebo ambikunaded. <sup>30</sup> Geb degine, Aarón bela Israel-girmar-dummaganga sogded, igi Bab-Jehová Moisés'ga sogsad. Deginbali, Moisés dulemar-asabin Bab-Jehová ega imakoye sogsadba ibmar-gegerdaklemalad imaksabalid. <sup>31</sup> Dulemar Aarón-ega-ibmar-sogsad bengussurmalad. Embaritoarmargu, Bab-Jehová nue e-itosmarye, degi, na e-wilebukmalad edaksamarbarye, bela na e-nono napase dulluu imakdemalad, oyogega, Bab-Jehová-e-nug emarde odummommarye.

## 5

### **1c. Bab-Dummad, Moisés'ba Egipto-dulemarga bonigan-onosad (5:1–11:10)**

*Moisés, Aarón'bo Faraón'se sunmaknadmalad*

<sup>1</sup> Weyob gusad-sorbali, Moisés, Aarón'bo Faraón'ga sognadmalad:

—Weyob Israel-e-Bab-Dummad-Jehová soged: ‘An-dulamar nega-dulesulidganse be barmid, adi, anga iba-ononamalagar.’

**2** Ar Faraón'di abin-sogded:

—¿Bab-Jehová'de doasunna? ¿Ibiga an a-sogedba ibsaoe? ¿Ibiga an Israel-dulemar onodagoe? We-Bab-Jehová an wissuli. Degine, Israel-dulemar an onogosurbali.

**3** Geb degine, Moisés, Aarón-ebogwa Faraón'ga sogdemalad:

—Hebreo'mar-e-Bab-Dummad anmarse magarosad. Degisoggu, anmar negadulesulidganba ibapaa-nanalegedse naoed, Agi, anmar Bab-Dummad-Jehová'ga ibmar-ogumakar ukoed. Ar degisulile, abakalegi Bab-Jehová uelleged-dummadgi anmar-oburgwialile, igidibe, es-suidgi anmar-oburgodibe.

**4** Ar Egipto-reydi, Moisés-abin, degi, Aarón-abin sogded:

—¿Ibiga bemar yamo dulemar-melle-arbaega deyob gordanimala? ¡Be namala, be arbanamala!

**5** Faraón sogdebalid:

—Emigindi, Israel-dulemar bukidar Egipto-yargi bukmalad. Ar bemarde, ¿bar-arbasuli amar imakode? Deyobsulirgebed.

**6** Aka a-ibagine, Faraón dulemar-arbananaid-dummagan-e-dummaganga igar uksad. Degi, danar-danar-arbananaimalad-e-dummaganga igar uksabalid:

**7** —Israel-dulemar napsa-ginnid-akwayob-sobegala anmar ega gusgu bula-dinnaganagiid ukdaedyob melle ega bar ukmalo. ¡Na emarsunnad bula-dinnaganagiid aminamalodo!

**8** Degi-inigwele, napsa-ginnid-akwayob-sobaled amba gusgu e-mergu-sobmaladyob, sobmarbalodo. Napa-ginnid-akwayob-sobaled

bipisaale gwagwen-akuar sobosurmalad. Ar wemarde, wiegala nanaed. A-ular, binnasur gordanimalad: ‘Anmar, ibmar-ogumakar anmar-Bab-Dummadga uknabimarye.’<sup>9</sup> Gatik bur bule Israel-dulemar-arbaega be imakmalo. Gatik bur oarbamalo, adi, melle dule-ega-gakansadanikid itomalagar.

<sup>10</sup> Dummagan-sabsur-dulemar-oarbananaimalad, degine, danar-danar-arbananaid-e-dummagan nadegusmalad, dulemar-arbananaimaladga sogdemalad:

—Faraón apor igar-uksad, melle bemarga bula-dinnaganagiid bar ukmaloye. <sup>11</sup> Degisoggu, bemar-sunnad bula-dinnaganagiid amina-malargebed. Degi-inigwele, napa-ginnid-akwayob-bemar-sobedi, bemarga aidegosulid, gusgu mergu sobedyobi amba bemar sobmaloed.

<sup>12</sup> Israel-dulemala oros-gagangiid-e-warmar aminamalaga bela Egipto-yalaganba duurmakdemalad. Adi, bula-dinnaganagiid-muchub ebumalagar. <sup>13</sup> Dummagan-sabsur-dulemar-oarbananaimalad dulemarse sabsur uluarmalad:

—Bemarga bula-dinnaganagiid-ukledagu, igi-mergu bemar gusgu napa-ginnid-akwayobid imakdamala, deyob-mergu bemar imakmarbalodo.

<sup>14</sup> Faraón-dummagan, Israel-dulemar-e-dummagan-onugsalesad sabsur-bibyoddamalad. We-Israel-e-dummagan danar-danar-arbamalad-e-dummaganad. Geb Israel-dummaganga sogdedamalad:

—¿Ar ibiga bemar idualedba emi, degi, sae, napa-ginnid-akwayobid bur ichee sobsamala?

<sup>15</sup> Israel-dulemar-danar-danar-arbananaid-dummadga-gunanaid Faraón'se nadmalad, ega binnasursaar ibmar sogdemalad:

—Dummad, ¿ibiga be be-maimar-bega-arbamalad weyob be imake? <sup>16</sup> Emide, bar anmarga bula-dinnaganagiid uksurmalad, degite, napsa-ginnid-akwayobid sobbi be anmar-abeged. Deginbali, anmar-sarsoardamarbalid. Degisoggu, Dummad, bar anmarginsurdo, besordamargindo.

<sup>17</sup> Ar Faraón'di abin-sogded:

—¡Ar bemar unnila dule-wiegala nanaed! A-ular, bemar sogdidimalad: ‘Anmar ibmar-ogumakar Bab-Jehová'ga uknamaloye.’ <sup>18</sup> ¡Be arbanamala! Ar bemarga bula-dinnaganagiid uklegosurmar-inigwele, amba gusgu mergu ibagwengi-sobedyobi napsa-ginnid-akwayob-sobaled be sobmalo.

<sup>19</sup> Israel-dulemar-danar-danar-arbananaid-dummaganga soglesgu, bemarga gwagwensaar aidegosurye, igi ibagwenadgi gusgu mergu napsa-ginnid-akwayob-sobaled bemar sobe, deyob be sobmaloye. Deyob ega soglesgu, na nue nunmak itosmalad. <sup>20</sup> Israel-dule-arbananaimalad-e-dummagan, Faraón-ebo-sunmakdii noarmargu, dakarmalad, Moisés, degi, Aarón'bo e-edarbebukmala. <sup>21</sup> Amar, Moisés'ga, Aarón'ga sogdemalad:

—Bab-Jehová begi gwisgumalana yeerban, sabsur-be-odurdakmalana gadin. Ar bemarnukined, Faraón, degi, dummagan-ega-

arbamalad isdar anmar-dakarmalad. Ar bemar Faraón'ga, degi, e-dummaganga es-suid-uksamalayobi gued, adi, anmar-oburgwemalagar.

*Moisés Bab-Jehová'se gochad*

<sup>22</sup> Geb degine, Moisés Bab-Jehová'se gornadgu, ega sogded:

—Dummadye, ¿ibiga be we-dulemar sabsur odurdake? ¿Ibiga wese be an-barmiali?

<sup>23</sup> Faraón'se be-nuggi an sunmaknonikid-akar, we-Faraón bur bule be-dulamar-wioalid, degite, bedi be-dulamar gwen be bendaksulid.

## 6

<sup>1</sup> Bab-Jehová Moisés-abin sogded:

—Emigindi be dakodo, igi an Faraón-imakoe. Emide, an-dutusur-ganguedgine an ibmar-imakedba, Faraón bemarga sogdagoed, ‘bemar namarye.’ Ar an-dutusur-ganguedgine an ibmar-imakedba, Faraón bemarga sogdabaloed, ‘bemar an-yargi nomarye.’

<sup>2</sup> Bab-Dummad Moisés'ga sunmakdebalid, ega sogded:

—Ani an Bab-Jehová gued.

<sup>3</sup> Ani an Bab-Dummad-Bela-Gangued-Nikadid. We-nugba Abraham'se, Isaac'se, Jacob'se, an magarosad. An-nug-Jehová'ye-nugadbardi, an ese magarossulid. <sup>4</sup> Deginbali, amar-ebogwa an igar-mesisad, an sogsad, bemarga Canaán-yala an ukoye. A-yargi, Abraham, Isaac, Jacob, e-yarsulidgi sikwas gudigusmalad. <sup>5</sup> Emide, Israel-dulemar nunmakedba bodidimalad.

Degine, Egipto-dulemar na e-maiga gandikidgi-be-imakdidimalad an itosad. Be-dadganbo an igar-mesisad an iessulid.

<sup>6</sup> “Degisoggu, Israel-dulemarga be sogna: ‘Ani, an Bab-Jehová gued. Egipto-dulemar-maiga be gubukmaladgi, sabsur be-imakdimaladgi an bemar-onogoed. An-gangued-nikadba an Egipto-dulemar sabsur-odurdakoed. Aba an be-bendakoed. <sup>7</sup> Ani an be-sumaloed, an-dulamarga an be-imakmaloed. Ani an be-Bab-Dummadga guoed.

” ’Deyobi, bemar wisgumaloed, ani an be-Bab-Dummad-Jehová gued. Deginbali, bemar wisgumarbaloed, ani an Egipto-dulemar sabsur-bemar-oarbananaimargu an bemar-onosad. <sup>8</sup> Abraham’ga, Isaac’ga, Jacob’ga an sogsagusad, Canaán-yala an bemarga ukedseye. Ayalase an be-nidmaloed. A-yala, degisadegu an bemarga ukoed. Ani an Bab-Jehová gued.’ ”

<sup>9</sup> Moisés bela weyob Israel-dulemarga sogsad. Degi-inigwele, Israel-dulemar maiga-gudidimalad-ular, nue bukib-itodidimalad-ular, Moisés’ba ibsassurmalad. <sup>10</sup> Geb degine, Bab-Jehová Moisés’ga sogded:

<sup>11</sup> —Egipto-rey-Faraón’ga be sogna, Israel-dulemar-Egipto-yargi-bukwad be onogoye.

<sup>12</sup> Ar Moisés’di Bab-Jehová-abin sogded:  
—Israel-dulemarbela anba ibsassurmalad, ar Faraón-bulesunna. Ar ande nued sunmaksurbalid.

<sup>13</sup> Geb degine, Bab-Jehová Moisés’ga, degi, Aarón’ga, Israel-dulemargi, degi, Egipto-rey-Faraón’gi sunmakded. Geb Bab-Jehová

Israel-dulemar-Egipto-yargi-bukwad-onogega,  
Moisés'ga, degi, Aarón'ga igar uksad.

*Aarón, Moisés'bo*

<sup>14</sup> Israel-dulemar-e-dadgansik wemar e-gwenadgan-iduegda gumalad:

Israel-machi-sailagined-Rubén-e-masmala,  
wemalad:

Hanoc, Falú, Hezrón, Carmi.

Wemar Rubén-e-masmala gumalad.

<sup>15</sup> Simeón-e-masmaladi, wemalad:

Jemuel, Jamín, Ohad,

Jaquín, Zohar, Saúl.

We-Saúl'de, ome-Canaán'gined-e-machid.

Wemala, Simeón-e-masmala gumalad.

<sup>16</sup> Leví-e-masmaladi, machi-dummad-inse, geb bipigwadse, wemalad:

Gersón, Coat, degine, Merari.

Leví'di birga-dulanergwa-gakambe-gakagugle-nika (137) burgwisad.

<sup>17</sup> Gersón-e-masmaladi, degi, e-gwenadgandi, wemalad:

Libni, degine, Simei.

<sup>18</sup> Coat-e-masmaladi, wemalad:

Amram, Izhar, Hebrón, Uziel.

Coat'di birga-dulanergwa-gakambe-gakapaa-nika (133) burgwisad.

<sup>19</sup> Merari-e-masmaladi, wemalad:

Mahli, degine, Musi.

Wemar, garda-maidba Leví-e-gwenadgan gumalad.

<sup>20</sup> Amram e-ammor-Jocabed nikusad.

Amarga Aarón, degi, Moisés uklenonikid.

Amram birga-dulanergwa-gakambe-gakagugle-nika (137) burgwisad.

**21** Izhar-e-masmaladi, wemalad:  
Coré, Nefeg, Zicri.

**22** Uziel-e-masmaladi, wemalad:  
Misael, Elzafán, Sitri.

<sup>23</sup> Aarón'dı, Elisabet nikusad. Elisabet'de Aminadab-e-sisgwad, Naasón-e-bunad.

Geb Aarón'ga, degi, Elisabet'ga machimalauklenonikid:

Nadab, Abiú, Eleazar, Itamar.

**24** Coré-e-masmaladi, wemalad:  
Asir, Elcana, Abiasaf.

Wemala,  
gusmalad. Coré-dulemar-idumaladga

25 Aarón-e-machi-Eleazar, Futiel-e-sisgwa-  
wargwen nikunonikid.

Machigwa ega uklenonikid, Finees.

Wemala, Levita-e-gwenadgan gumarad,  
na e-idumaladid.

**26** Ar Bab-Jehová Aarón'ga, degi, Moisés'ga  
wemar-sunnadga sogsgusad, Israel-dulemar-  
Egipto-yargi-bukwadi danar-danar na e-  
gwenadgan-e-gwenadganba be onogoye. **27** Amba  
Moisés, degi, Aarón, Israel-dulemar-Egipto'gi-  
wilebukwad-onogega, Egipto-rey-Faraón-ebo  
sunmakap gusmalad.

*Aarón Moisés-anar sunmaksad*

<sup>28</sup> Bab-Jehová Egipto-yargi Moisés'bo sunmak-sagua, ega sogsad:

**29** —Ani an Bab-Jehová gued. Bela an bega ibmar sogoedi, Egipto-rey-Faraón'ga bela be ibmar-sogmogoed.

<sup>30</sup> Ar Moisés’di Bab-Jehová-abin sogded:  
—Bab-Jehová, ar ande gale-gale sunmaksoggu,  
¿igi Faraón an-ibmar-ega-sogedba ibmar-  
imakosunna? An-sogedba ibmar imakosuli.

## 7

<sup>1</sup> Geb degine, Bab-Jehová Moisés’ga sogded:  
“Emi be dakena, Faraón-asabin Bab-  
Dummadyob be guoed. Be-ia-Aarón’di bega  
gayaburba-barsogedga gumogoed. <sup>2</sup> Bela an-  
bega-ibmar-sogoedi, bela Aarón’ga be sogmogoed.  
Geb degine, Aarón Faraón’bo sunmakoed,  
adi, Faraón na e-yargi Israel-dulemar-bukwad  
onogegar. <sup>3</sup> Ar andi gatik aka bur bule Faraón-  
burguega an imakoed, adi, mer an-dulamar-  
onogegar. Deyob an imakoed, adi, Egipto-yargi  
ibmar-dummagan, ibmar-gegerdaklemalad  
an gatik imakegar. <sup>4</sup> Faraón’ga-bemar-ibmar-  
sogoedi, be-itogosurmalad. Ar andi Egipto-  
yargi an-gangued an oyogoed, ar sabsur Egipto-  
dulemar an odurdakoedgi, an-dulamar-Israel-  
dulemar, Egipto-yargi an onogoed. <sup>5</sup> An-gangued  
Egipto’gi an oyosale, degi Israel-dulemar Egipto-  
yargi-bukwad an onosale, agi Egipto-dulemar  
wisgumaloed, ani an Bab-Jehová gue.”

<sup>6</sup> Moisés Aarón-ebogwa ar igi Bab-Jehová ega  
sogsa, aba bela imaksamalad. <sup>7</sup> Moisés, degi,  
Aarón, Faraón’bo sunmaksamargua, deunni,  
Moisés birga-dulabake (80) nikad. Aarón’di  
deunni, birga-dulabake-gakapaa (83) nikad.

*Aarón-gaapoled naibega binyisad*

<sup>8</sup> Bab-Jehová Moisés’ga, degi, Aarón’ga sogded:

**9** “Faraón bemarga sokardibe, ibmargegerdakleged anga be imakyé, Aarón’ga be sogoed, be-gaapoled be suye, napase Faraón-asabin be meteye, adi, gaapoled naibega binyegar.”

**10** Moisés Aarón-ebogwa Faraón dakinad-gusmalad. Igi Bab-Jehová ega sogsa, aba imaksamalad. Aarón Faraón-asabin, degi, Faraón’ga-arbamalad-asabin napase e-gaapoled meted. Geb degine, gaapoled naibega binyided. **11** Ar Faraón’di e-dulemar-nue-ibmar-wisimaladse, nelemarse gochad. Wemala, ibmar-burba-wisimaladba bela deyob imaksamarmogad. **12** Na wargwen-wargwen e-gaapoled napase metemalad, bela gaapoled naibega binyidmalad. Degi-inigwele, Aarón-gaapoleteddi dulemar-ibmar-nue-wisimalad-e-gaapoled, degi, nelema-e-gaapoled dosad. **13** Bab-Jehová bato iduar Moisés’ga sogsadyob, Faraón aka burguded. Faraón Moisés-ega-sogedba ibmar gwen imaksasulid.

### *Dii ablisbi binyisad*

**14** Geb degine, Bab-Jehová Moisés’ga sogded:

“Moisés, Faraón bela-bela aka bur bule burguded, Israel-dulemar-Egipto-yargi-bukwad yapa onoged. **15** Oibosale, wakudaryalaba Faraón diwarlse aidenadapile, abin be naoed. Diwar-gakagi be edarboed, degine, be-gaapoled-naibega-binyisad be sedoed. **16** Agi, Faraón’ga be sogoed: ‘Hebreo’mar-e-Bab-Dummad-Jehová’yenugad an-barmiarye, bega sogega: An-dulamar be onoye, adi, nega-dulesulidganba anse gornamalagarye, an-nug odummogegarye. Ar

emidse an-ibmar-bega-sogedba be imaksursoggú,  
<sup>17</sup> emigi be wisguoye, ani an Bab-Jehová guye.'

"Moisés, emide, we-gaapoled-argangi-ganikidgi  
 be diwar bibyodele, dii abega binyidoed. Agi  
 Faraón wisgusunnoed, ani an Bab-Jehová gued.  
<sup>18</sup> Uamardi burgwidoed, diwar sunnasur ya-  
 pandagoed. Degisoggú, Egipto-dulemala ima we-  
 dii gobe gudamaloed."

<sup>19</sup> Deginbali, Bab-Jehová Moisés'ga sogdebalid:

"Aarón'ga be sogo, be-gaapoled be suye.  
 Degin, be-argan diwarmargi, dianmargi, mata-  
 nanaidmargi, degi, dii-sabolesimaladgi be oyoye,  
 gwidu-urgomargi-dii-bukwadse-bakar,      degi,  
 gwidu-akwamargi-dii-bukwadse-bakar,      bela  
 Egipto-yargi abebi guoye."

<sup>20</sup> Moisés Aarón-ebogwa igi Bab-Jehová ega sogsa,  
 ayob imaksamalad. Aarón e-gaapoled onakwisad.  
 Geb degine, Faraón-asabin, ega-arbamalad-asabin  
 diwar bibyosad. Geb degine, bela dii abega  
 binyided. <sup>21</sup> Uamardi burgwisad, diwar bela sun-  
 nasur yapansoggú, Egipto-dulemar geg dii gobe  
 guarmalad. Bela Egipto-yargi abe yaisur-nika  
 gunonikid.

<sup>22</sup> Ar Egipto-nelemar ibmar-burbamar-wisidba  
 amba deyob imaksamarmogad. Bab-Jehová bato  
 iduar Moisés'ga sogsadyob, Faraón aka bur bule  
 burguded, Moisés, degi, Aarón'bo-ibmar-sogedba,  
 Faraón imaksasulid. <sup>23</sup> Faraón na e-neg-gabedse  
 nonikid, we-ibmar-gusadi bai gwen itossulid.  
<sup>24</sup> Degin, ar diwar-diidina geg goblegussoggú,  
 Egipto-dulemala dii-nued-sumalaga bela diwar-  
 naba dia akwismalad.

*Egipto'gi ammanoo yaisur nikusad*

<sup>25</sup> Bab-Jehová diwar-bibyosad-sorba, ibagugle (7) ibagan nasad.

## 8

<sup>1</sup> Bab-Jehová Moisés'ga sogded:

“Be Faraón daknao, ega be sogo: ‘Bab-Jehová weyob soged: An-dulamar be onogo, adi, anse gornamalagar, an-nug odummogegar.

<sup>2</sup> Ar an-dulamar be onosulile, sabsur an be-odurdakoed, bela be-yargi ammanoo yaisurnika an imakoed. <sup>3</sup> Diwargi bukidar ammanoo gwalulegoed. Agi, nakwidagoed. Be-negyagi ubogoed, bia be gabmaidgi dogoed, be-gabed-birgi ambikuoed. Bega-arbamalad-neggi, be-sordamar-neggi ubogoed. Be-madu-sobedyaba, degine, be-madu-omukuedgi, agi ammanoomar-bukidar ambikuoed. <sup>4</sup> Ammanoomar begi, bega-arbamaladgi, degi, be-sordamargi ichomakdii guoed.’”

<sup>5</sup> Bab-Jehová Moisés'ga sogded:

“Aarón'ga be soge, be-gaapoled diwarmargi, dianmargi, matamargi oyoye, adi, agi ammanoomar ainidamalagar. Degine, Egipto-yargi bukidar ammanoo nika gusun.”

<sup>6</sup> Aarón na e-gaapoled Egipto-diwarmargi oyoded. Geb degine, agi bukidar ammanoomar ainialid. Egipto-yargi bela ammanoomar yaisur nika guded. <sup>7</sup> Ar nelemar ibmar-burba-wisidba deyob imaksamarmogad. Egipto-yargi ammanoo bukidar-nika imaksamarmogad. <sup>8</sup> Geb degine, Faraón, Moisés'bina, Aarón'bina gochad, amarga sogded:

—Bab-Jehová'ga be soge, anga, degi, an-sordamarga ammanoo osuloye. Geb degine, bedulemar naega an imakoed, adi, Bab-Jehová'ga ibmar-ogumakar uknamalagar.

**9** Moisés Faraón-abin sogded:

—Anga be soge, ¿sana bega, bega-arbamaladga, degi, be-sordamarga, Babse-gorbi be an-abegé? Adi, ammanoomar begi banguega, degi, beneggwebur-negmargi berguegar. Unnila diwarginbi nika guegar.

**10** Faraón Moisés-abin sogded:

—Bane-bakas be imako.

Moisés Faraón-abin sogded:

—Ar deyob guodo, adi, be wisguegar, dulebaid anmar-Bab-Dummad-Jehová'yobid sated.

**11** Ammanoomala, begi bangudmaloed, beneggi bar-gudiguosurmaloed. Bega-arbamaladgi, degi, be-sordamargi bar-gudiguosurmarbalid, unnilagwa diwarginbi gudigumaloed.

**12** Moisés, Aarón-ebogwa Faraón'gi bangudgu, Moisés Bab-Jehová'se egichided, ammanoomarichesur-Faraón'se-be-barmialid osuloye.

**13** Bab-Jehová Moisés-ese-egisnайдba imaksad. Ammanoomar, neggi, galu-imbagi, degi, sapurba-garmakdimalad, burgwismalad. **14** Dulemar ammanoo-burgwismalad wesmalad. Bela danar oambikusmalad. Geb degine, bela neg-nunudbi yapated.

**15** Dugi-inigwele, Faraón ammanoo-bergus-dakargu, ar igi Bab-Jehová bato iduar sogsadyob, Faraón aka bur bule burguded. Faraón, Moisés-ega-ibmar-sogedba, degi, Aarón-ega-ibmar-sogedba gwen imaksasulid.

*Gwii yaisur nika gusad*

**16** Bab-Jehová Moisés'ga sogdebalid:

“Aarón'ga be soge, be gaapoled be onakye, agi ukub be bibyoye, adi, ukub gwiiga binyegar, adi, bela Egipto-yargi gwii yaisur nikuegar.”

**17** Deyob imaksamalad. Aarón na e-gaapoled onakwided. Geb agine, ukub bibyosad, geb degine, bela Egipto-yargi ukub gwiiga binyided. We-gwiimala, dule-gutemalad, degi, ibdurgan-gutemalad.

**18** Nelemar aisaar gwii-yaisur-nikuega na ibmar-burbamar-wisimaladba imaknanai guarmarmoganad. Degi-inigwele, ukub gwiiga obinnissurmomalad. Ar degidgine, gwiimardi, dule-gunnanai, degi, ibdurgan-gunnanai guarmalad.

**19** Geb degine, nelemar Faraón'ga sogdemalad:

“¡Wedi Bab-Dummad-ganguedi!”

Bab-Jehová bato iduar sogsadyob, Faraón'di aka bur bule burguded. Moisés-ega-ibmar-sogedba gwen imaksasulid.

*Gukur yaisur nika gusad*

**20** Bab-Jehová Moisés'ga sogdebalid:

“Oibosale, be gwisguo. Wakudaryalaba Faraón-diwarse-naoedse Faraón-abin be nao. Faraón'ga be sogo: ‘Bab-Jehová weyob soged: An-dulamar be onogo, adi, anse gornamalagar, an-nug odummogegar. **21** Ar be onosulile, gukurmar-galagwensulid an begi, bega-arbamaladgi, degi, be-sordamargi, deginbali, be-negyagi an barmidoed. Egipto-dulemar-neggi gukurmar-galagwensulid ena ubogoed. Deginbali, ar bia Egipto-dulemar-gudidimala, a-napagi amba

gukurmar-galagwensulid nika gubaloed. <sup>22</sup> Ar weyob gunonikile, Gosén-yalagindi, bia andulamar bukwa, gukurmar nikuosulid. Gosén-yalaginbi gukurmar-galagwensulid gwagwensaale nika guosulid. Agi be wisguoed, ani an Bab-Jehová gued. We-Egipto-yargi an gudiid. <sup>23</sup> Andulamar, be-dulemar-ebogwa akarsaila an dakoed. Oibosale, an bega sognaidyob, we-ibmar-dakledisulid an imakoed.”

<sup>24</sup> Bab-Jehová deyob imaksad, gukurmar-galagwensulid yaisur Faraón-neggi, Faraón'garbamalad-neggi ubononikid. Deginé, bela Egipto-yalagi bukidar gukur-galagwensulid-nika gunonikid. We-gukurmar Egipto-yala nue-oichosad.

<sup>25</sup> Geb degine, Faraón Moisés'se, degi, Aarón'se gochad, amarga sogded:

—Be namar, be-Bab-Dummadga ibmar-ogumakar be uknamar. Ar Egipto-yargindi mer be nomalo.

<sup>26</sup> Moisés'di Faraón-abin sogded:

—Suli, anmar deyob imakele, nuedsuli. Ar ade, anmar-Bab-Dummad-Jehová'ga, anmar ibmar-ukedi, we Egipto-dulemarga ibmar-isganad, ibmar-sunnasulidid. Egipto-dulemar a-ibmarmar-ogumakar-uknai anmar-daksale, ar an wisid, akwagi-makar anmar-oburgwismalaled.

<sup>27</sup> Anmar nega-dulesulidganba, ibapaa-nanaedse anmar naergebed. Agi, anmar-Bab-Dummad-Jehová'ga ibmar-ogumakar anmarukoed. Ar igi anmarga Bab-Dummad-Jehová sogoe, aba anmar ibmarukoed.

<sup>28</sup> Geb degine, Faraón sogded:

—Nega-dulesulidganba-naed an bemar-imakoed, adi, na bemar, bemar-Bab-Dummad-Jehová'ga, ibmar-ogumakar uknamalagar. Naega an bemar-imakoedi, dikasurdi melle be namalo. Deginbali, anga be Bab-Dummadse gormarmogo.

**29** Moisés'di Faraón-abin sogded:

—An wegi nodele, Bab-Jehová'se an egisoed, oibosale, gukurmar-galagwensuli-nikadi begi, bega-arbamaladgi, degi, be-dulemargi banguye. Deyob an imakoed, be anga soger, bar an be-yardakosurye, degine, be-dulemar an onogoye, onosuli bar an imakosurye, adi, Bab-Jehová'ga bemar ibmar-ogumakar uknamalagarye.

**30** Moisés, Faraón'gi bangudgu, Bab-Jehová'se goted. **31** Bab-Jehová Moisés-ese-ibmar-egichisadba imaksad. Gujurmar-galagwensuli-nikadi, Faraón'gi, Faraón'ga-arbamaladgi, degi, Faraón-sordamargi banguded. **32** Ar Faraón'di gannar aka bur bule burguded, Israel-dulemar-onogega gwen imaksasulid.

## 9

### *Molimarga boni-dummad nagusad*

**1** Geb degine, Bab-Jehová Moisés'ga sogdebalid:

“Faraón be daknao, ega be sogo: ‘Hebreo’mar-e-Bab-Dummad-Jehová weyob sogye: An-dulamar be onogo, adi, anse gornamalagar, an-nug odum-mogegar.

**2** ” ’Ar be an-dulamar-onosulile, amba be gaele, **3** Bab-Jehová be-molimar-be-nainugi-guididimaladgi e-gangued oyogoed. Degin, boni-dummad we-be-ibdurgangi odegaoed:

Molimargi, moli-uayasuidmargi, moli-yargan-muremaladgi,  
 moli-bebe-nikamaladgi, sibad-wawaadmargi, degi, sibadmargi, odegooed.  
 Bela we-ibdurgan burgwemaloed.'

<sup>4</sup> "Weyob be Faraón'ga sogo: 'Ar Bab-Jehová di Israel-dulemar-ibdurgan, Egipto-dulemar-ibdurganbo akarsaila dakoed, adi, melle Israel-dulemar-e-ibdurgan burgwemalagarye.' "

<sup>5</sup> Degine, Bab-Jehová iba nasiksad. Geb sogded:  
 "Neg-oibosale, we-ibmar an deyob imakoed."

<sup>6</sup> Neg-oibosgu, Bab-Jehová deyob imaksad. Egipto-dulemar-e-ibmar-durgan bela burgwismalad. Israel-dulemar-e-ibmar-durgandi, wargwensaale gwen burgwissulid. <sup>7</sup> Faraón Israel-dulemar-e-ibmar-durgan-daknamalaga, e-dulemar barmisad. Dakleardo, Israel-dulemar-e-ibmar-durgan wargwensaale gwen burgwissuli. Degi-inigwele, Faraón aka bur bule burguded, Israel-dulemar-onossulid.

### *Dulemar, degi, molimaryaabi gusad*

<sup>8</sup> Geb degine, Bab-Jehová Moisés'ga, degi, Aarón'ga sogdebalid:

"Madu-sobedyaba buru-bukwadi nukgwen be-argan-warbogi be weemalo. Geb agine, Moisés Faraón-asabin buru niba midoed. <sup>9</sup> Geb buru ukubga binyidoed, degine, bela Egipto-yalaganba mimiledoed. We-ukub, dulemar-yaanikadbi, degi, ibmar-durgan-yaanikadbi imakoed."

<sup>10</sup> Moisés Aarón'bogwa madu-sobedyaba buru-bukwad-wesmargua, Faraón-daknamalad. Agine, Moisés buru niba-mided, degi, dulemar, ibmar-durganse-bakale, bela yaanikadbi gunonimalad.

**11** Nelemar Moisés-asabin geg gwisgu gusmalad, ar ade, amarse-bakale, bela yaa-nikadbi gusmarmogad.

**12** Ar Bab-Jehová'di, aka bur bule Faraón-burguega imaksad. Ar igi Bab-Jehová bato iduar Moisés'ga sogsa, deyob gunonikid. Degisoggu, Faraón Moisés-gwen-bar-wisgubisuli, degi, Aarón-gwen-bar-wisgubisuli gusad.

### *Dii-akwaga-binyaled babatisad*

**13** Geb degine, Bab-Jehová Moisés'ga sogdebalid: “Neg-oibosale, wakudaryalaba be gwisguo, Faraón'ga be sognao: ‘Hebreo’mar-e-Bab-Dummad-Jehová weyob sogye: An-dulamar be onogo, adi, anse gornamalagar, an-nug odummogegar.

**14** ” ’Ar emigindi, an-boni-dummagan an begi, bega-arbamaladgi, degi, bela be-sordamargi an barmidoed, adi, be wisguegar, bela we-napneggi dule-anyobid surye. **15** Emi-gunaидgi, bur bule sabsur an be-odurdaknaina, boni-dummad-gwensakgi an be-dulemar-sabsur-odurdakena, bato be bela burgwismalanad. **16** Ar emigindi, wis dula-gudiguega an be-imaksad, adi, angangued be dakegar, adi, bela we-napnegnaidgi an-wisgumalagar, an doa-dule gue. **17** Ar aka emigindi, be an-dulamar-onobisulidba andulamargi amba be gwisgudiid. **18** ¡Degir nued! Neg-oibosar, we-wachigi, dii-akwaga-binyaled, Egipto-dulemar-bukualid-akar, emisgwadse, Egipto-yargi deyob-gwen-babatedisulidi, bela-bela babated an imakoed. **19** Degisoggu, be-ibmar-durgan, degi, bela be-ibmar-nainugi-nikadi, bela

nuekwaa be sabogo. Ar ade, dii-akwaga-binyaled, babatidagogu, bela dulemar, degi, ibmar-durgan neg-uas-yaba dukuarsuli-bukwamaladi, bela ese burgoed.’”

<sup>20</sup> Abala-Faraón’ga-arbamalad, Bab-Jehová-idu-owisonaid dobe-itosmalad. A-ular, uas-urba e-maimar-odosmalad, degine, e-ibmar-durgan odosmarbalid. <sup>21</sup> Ar baigandi, Bab-Jehová-idu-e-owisonaid baisur-itosmalad. Degisoggu, magaba e-maimar-obesmalad, degi, e-ibmar-durgan obesmarbalid. <sup>22</sup> Geb degine, Bab-Jehová Moisés’ga sogded:

“Be-sakwa niba be onak, adi, bela Egipto-yargi dii-akwaga-binyaled bela dulemargi, ibmar-durgangi, degi, e-nainugi-ibmar-nikadgi babategar.”

<sup>23</sup> Moisés niba e-sakwa onakwisad. Geb agine, Bab-Jehová mar-golega imaksad. Mardakarmakded, degine, dii-akwaga-binyaled bela napase babatialid. Bab-Jehová bela Egipto-yargi dii-akwaga-binyaled babatega imaksad. <sup>24</sup> Dii-akwaga-binyaled babatemai gusad, degine, mardakarmakmaid aidemai gusbalid. Ar Egipto-yargi-dule-ambikuded-akar, Egipto-yargine bipisaale dii-akwaga-binyaled weyob-gangu babatedisulid. <sup>25</sup> Dii-akwaga-binyaled bela Egipto-yargi, ibmarmar nainumargi-nanaid, ogilosad. Dulemar, degi, ibmar-durganse-bakar uas-urba-dukubuksurmaladi, ogilosad. Deginbali, bela Egipto-yargi-ibmar-digarmalad, sapi-dummaganse-bakale, ese bibichisad.

<sup>26</sup> Ar degite, Gosén-yargindi, Israel-dulemar-bukwadgindi, bipisaale dii-akwaga-binyaled

gwagwensaar argwachasulid.

**27** Geb degine, Faraón Moisés'se, degi, Aarón'se gochad. Amarga sogded:

—Mag an itodo, ani an nosad. Angindo, andulemarginbardo, Bab-Jehová'ginsurdo. **28** Bar an bemar-gaosulid. Be namarsun. Ar mar doggus-wilub-obicha gollomakmaisoggu, dii-akwaga-binyaled doggus wilub-obicha babatemaisoggu, wis be Bab-Jehová'se be anmarga gole, adi, we-ibmarmar anmarga osulogegar.

**29** Moisés'di Faraón-abin sogded:

—An we-neggweburgi nodeyalaba Bab-Jehová'se golega argan an onakdoed. Geb agine, dii-akwaga-binyaled bar babatosulid, degine, mar bar gollomakosurbalid, adi, be wisguegar, we-napneg Bab-Jehová'gadid. **30** Digi-inigwele, an nue wisid, be, degi, bega-arbamalad, degite, amba Bab-Dummad-Jehová-dobsurmalad.

**31** "We-ibmarmardi bela burgwisad:

Gagan-lino'ye-nugad,  
orosgi-dakleged-cebada'ye-nugad,  
Ar ade, bato cebada'de sanmaksad,  
degi, gagan-lino'ye-nugad bato durba-maksabalid.

**32** "Digi-inigwele, we-ibmarmardi akargus-sulid:

Orosgi-dakleged-trigo'ye-nugad,  
orosgi-daklebalid-centeno'ye-nugad,  
amardi, akargussulid,  
Ar ade, amardi amba yoo  
ainidagedgined."

**33** Moisés Faraón'bo-sunmaksad-sorba, neggweburgi nodgu, e-argan onakded, Bab-Jehová'se

goted. Deyob imaksagu, dii-akwaga-binyaled yog berguar naded, bar babatissulid. Degine, mar bar gollomaksasurbalid, yog berguar nadbalid. <sup>34</sup> Ar Faraón'di deyob dakdegua, bar dii wisuli, dii-akwaga-binyaled bar babatesurbali, degi, mar bar gollomakmaisurbali, Faraón gannar isgud-balid. Faraón'ga-arbamalad e-dummadyob burgudmarmogad. <sup>35</sup> Ar igi Bab-Jehová bato iduar Moisés'ga sogsa gusa, deyob gunonikid. Faraón gannar bela-bela burgunonikid, degisoggu, Israel-dulemar-onogega gwen imaksasulid.

## 10

### *Ses yaisur-nika gusad*

<sup>1</sup> Bab-Jehová Moisés'ga sogdebalid:

“Faraón’se be nae, Faraón be dakna. Ar an-sunnad an Faraón bur bule burguega an imaksad, ega-arbamalad bur bule burgumalaga an imaksad. Ar an ibmar-gegerdaklemalad-imaked-ese-an-oyogegala, an ibmar-dummagan-imaked-ese-an-oyogegala, an deyob imaksad.

<sup>2</sup> Deyob an imaksad, adi, be-mimmiganga be sogegar, be-waganga be sogegar, igi an Egipto-dulemar-sabsur-imaksa, degine, igi an ibmar-gegerdaklemalad amar-abargi imaksabali. Adi, agi bemar wisgumaloed, ani an Bab-Jehová gued.”

<sup>3</sup> Moisés Aarón'bogwa Faraón-daknadgusmalad. Faraón'ga sogdapmalad:

“Weyob Hebreo'mar-e-Bab-Dummad-Jehová soged: ‘¿Ar wede sanagwadsega bede an-asabin san bipii imakoe? An-dulamar noega

be imako, adi, anse gornamalagar, an-nug odummonamalagar.

<sup>4</sup> ” ’Ar amba be yapa an-dulamar-onogele, neg-oibosale, sesmar-bukidar be-yarse an sedagoed. <sup>5</sup> We-sesmar we-napneggi yaisur-mergu-nikuosoggu, napa gwen daklegosulid. We-sesmar, dii-akwamarga-binyaled-babatisad ibmar-wis-obesad bela gunnoed, degi, bela sapi-sapurba-bukmalad gunbaloed. <sup>6</sup> Be-negmaryaba, bega-arbamalad-negmaryaba, degi, bela Egipto-dulemar-negmaryaba, ena ubononikoed. Ar we-ibmar, be-babgan-we-yarse-nonikid-akale, degi, be-dadgan-we-yarse-nonikid-akale, e-ibagangi, emi-iba-naidse, weyob gwen dakledisulid.’ ”

Moisés Faraón’ga-sunmakgwichid-bergusgu, biir imaksad, geb Faraón’gi banguded. <sup>7</sup> Geb degine, Faraón’ga-arbamalad Faraón’ga sogdemalad:

“¿Ar wede sanagwadsega we-dulede anmarga boni-dummad-onodiid berguo? Degisoggu, Dummad, we-Hebreo-dulemar-naed be imake, e-Bab-Dummad-Jehová’se gornamalagar. Dummad, ¿ar bede amba Egipto-yar-nue-bergus-naid be daksursi?”

<sup>8</sup> Geb degine, Faraón gannar Moisés’se, Aarón’se gochad. Amarga sogded:

—Be namar. Be-Bab-Dummad-Jehová’se be gornamar. Bemar-naed-idu anga sogmalo, ¿doamar nadmalale?

<sup>9</sup> Moisés Faraón-abin sogded:

—Anmarba-namaloedi, wemalad:

Anmar-mimmiganmar, anmar-serganmar, anmar-machimala,

anmar-bunamala, anmar-sibad-wawaadmar, degi, anmar-moli-bebenikadmar.

Ar ade, anmar, anmar-Bab-Jehová'ga ibadummad onogoed.

**10** Faraón'di dodoalegi ega sogded:

—¡Eye, be-Bab-Jehová beba naoe! Ar bemar, unnila wakinnedgi binsananaisoggu, ¿ar ande, be-mimmigan bemarba-barmido be an-insae?  
**11** Suli. Deyob gued sate. Ar bemar Bab-Jehová'se gornabimalale, e-nug-odummonabimalale, bemar-macherganbi namalodo. Ar deyob bemar egichismalad.

Agi, Faraón Moisés-e-asabin-gwichid, degi, Aarón-e-asabin-gwichid, gandikidgi-onomalaga igar ukded.

**12** Geb degine, Bab-Jehová Moisés'ga sogded:

“Egipto-yargi sesmar-dagega be-argan be oyo, adi, bela Egipto-nainugi-ibmar-nikad obelogegar. Degine, dii-akwaga-binyaled-babatisad ibmar-obelossulidi, we-sesmar bela amar-obelogegar.”

**13** Moisés Egipto-yar-naidgi e-argan-oyodgua, Bab-Jehová dad-nakwedsik Egipto-yargi-burwa-golega imaksad. Burwa ibgi-gormai osedosad, degine, mutik-gormai oiboarbalid. Oiboargu, burwa-dad-nakwedsik-gochadi, sesmar-senonikid. **14** A-sesmala, bela Egipto-yargi ubononikid. We-ibgangi sesmar-ichesur-ubononikidyob iduale weyob neg gudisulid. Degine, we-sorBALI, weyob guosurbalid. **15** Ar ade, sesmarde bela-bela mergusoggu, napa

gwen magar daklessulid. Deginé, dii-akwagabinyaled gagan-obesad, degi, sapi-durbamar-sapigi-obesad, sesmar amar bela guchamalad. Egipto-yargi bipisaale nainu-e-gaganmar, sapi-e-gaganmar, gwen bessulid.

<sup>16</sup> Faraón, Moisés'se, degi, Aarón'se yogollar imaksad. Geb, amarga sogded: “Be-Bab-Dummad-Jehová’ba an nue-nosad. Bemargi an nue-nosbalid. <sup>17</sup> An wis bemarse egised, anbegi-yolesadi begi-nossuliyob be an-dake. Weboni-dummad-anga-osulogega, be-Bab-Dummad-Jehová’se be anga gole.”

<sup>18</sup> Moisés Faraón’gi bangudeyalaba Bab-Jehová’se Faraón’ga goted. <sup>19</sup> Geb, Bab-Jehová burwa-gormaid obilisad. Burwa dadargwanedsik binnasur-golega imaksad. A-burwa bela sesmar-sesad, Demar-Ginnidye-nugadse obatedapid. Ses Egipto-yargi gwagwensaale gwen bessulid. <sup>20</sup> Ar Bab-Jehová’di aka bur bule Faraón-burguega imaksad. Degisoggu, Faraón Israel-dulemar-naega imaksasulid.

### *Negsichid-nagusad*

<sup>21</sup> Geb degine, Bab-Jehová Moisés'ga sogded: “Bela Egipto-yargi negasichidbi naguegala, beargan niba be oyoge. We-negsichidi bela-bela gudure guosoggu, acha-acha gudii gumaloed.”

<sup>22</sup> Agi Moisés e-argan niba onakdegusad. Geb bela-bela negasichid bela-Egipto-yargi ibapaa naganonikid. <sup>23</sup> Bela-bela ibapaa-wilub negasichid-nagussoggu, dule, dule-e-dikarba-gwichidi akudaksa gusad. Deginé, geg aineba nale gus-

balid. Degi-inigwele, Israel-dulemar-neggindina bela neg-mee naid.

<sup>24</sup> Geb degine, Faraón Moisés'se gochad, ega sogded:

—Be namalo. Be-Bab-Jehová'se be gornamar, e-nug odummonamar. Be be-mimmigan sedmabar-balo. Degi-inigwele, moli-bebe-nikamalad, degi, sibad-wawaadmar, amardi be obemalo.

<sup>25</sup> Moisés'di Faraón-abin sogded:

—¡Adi surbali! Ar be bur anmarga ibmar-durgan ukoed. Adi, a-ibmar-durgan Bab-Jehová-anmar-Bab-Dummadga ogumaklegar ukle gegar.

<sup>26</sup> Deginbali, anmar-moli-bebe-nikamalad anmarba naergebbalid. Ar ibmar-durgan-wargwensaale wegi beosulid. Ar ade, anmar, anmar-Bab-Dummad-Jehová'se golegala, e-nug odummogegala, na anmar-ibdurgan suergebed. Degisoggu, anmar amba wissulid, igid anmar Bab-Jehová'ga-ukoe. Geb anmar weba sudapoed, ibimar anmar abegoe.

<sup>27</sup> Ar Bab-Jehová'di aka bur bule Faraón-burguega imaksad, Israel-dulemar-mer-onogega imaksad. <sup>28</sup> Deginbali, Faraón Moisés'ga sogsabalid:

—Wegi be an-asabin-gwichidi, be nae. Mer be anse gannar-dagedgi be binsao. Ar be ibagwengi an-asabin be gwisgunonikile, anse be burgoed.

<sup>29</sup> Moisés Faraón-abin sogded:

—Napira be anga soged. Ar bar be-wagar an dakosulid.

## 11

*Machi-sailaginmalad-oburgwilegoed*

<sup>1</sup> Bab-Jehová Moisés'ga sogded:

“Napi boni-dummad-gwensak Faraón'ga, degi, Egipto-dulemarga an barmidagoed. A-sorbalí, Faraón e-sunnad bemar-onogoed. Bar wegigudiguega bemar-imakosulid. <sup>2</sup> Ar emigindi, Israel-dulemar-macherganga, degi, Israel-dulemar-omeganga be sogo, na e-neg-dikarba-mamaidse, ibmar-manigi-sobaled, degi, ibmar-orgi-sobaled egismaloye.”

<sup>3</sup> Dakargua, Bab-Jehová Egipto-dulemar Israel-dulemar-nued-dakega imaksad. Deginbali, Faraón'ga-arbamalad dakmalad, Moisés'de dule-dummadí, dule-nug-nikagwadi. Amba Egipto-yargi bela dulemala deyob Moisés-dakmarmogad.

<sup>4</sup> Geb agine, Moisés Faraón'ga sogded:

“Bab-Jehová weyob soged: ‘Nega-gabigwengi bela Egipto-yargi an nasoed. <sup>5</sup> Egipto-dulemar-e-machi-sailagine burgwemaloed. Egipto-yardakmaid-Faraón, be-machi-dummadgi onodoed. Degine, mai-ome-obnagedgi-arbaed-e-machi-sailaginmalad burgwemarmogoed. Deginbali, ibmar-durganse-bakar, sailagi-gwalulesmalad, burgwemarmogoed.’

<sup>6</sup> ”A-ibagi, bela Egipto-yargi binnasur gormaloed, na nunmak-itomalaadba bomaloed. Weyob iduale, binnasur-gordisurmalad, degine, weyob a-sorba bar binnasur-golosurmarbalid.

<sup>7</sup> Ar Israel-dulemar-abargi wis bipisaale achu dulese urwosulid, ibmar-durganse gwen urwosurbalid. Geb agi, bemar wisgumaloed, Bab-Jehová, Israel-dulemar Egipto-dulemarbo akarsaila dakye.”

Geb Moisés Faraón'ga sogdebalid: <sup>8</sup> “Bela dule-bega-arbamalad anse duurmaknonikoed, yokorgi-sindigar-sii anga sogdamaloed: ‘Be naye, degine, bela be-sordamar-beba-nanaimalad, bela be namarye.’ Agi geb an naoed, iduardi an naosulid.”

Bela-bela Moisés nue-urwe Faraón-asabin-gwichi noalid.

<sup>9</sup> Bab-Jehová Moisés'ga sogded:

“Egipto-yargi gatik bur bule an-ibmar-gegerdaklemalad an imakega, Faraón bemar-ibmar-sogedba imakosulid.”

<sup>10</sup> Moisés Aarón'bogwa bela we-ibmar-gegerdaklemalad Faraón-asabin imaksad. Ar Bab-Jehová'di aka bur bule Faraón-burguega imaksasoggu, Faraón Israel-dulemar-Egipto-yargi-bukwad onossulid.

## 12

### 1d. Dule-oburgwed-baliwitur Egipto-yargi-nasad

(12:1–13:22)

*Baliwitur machi-gebесailagined oburgwega  
Egipto-yargi-nasoed*

<sup>1</sup> Bab-Jehová Egipto-yargi Moisés'ga, degi, Aarón'ga sunmaksad, amarga sogsad:

<sup>2</sup> “We-nii, bemarga bur nii-sunsoged guoed. Gebe birga-onoded-e-niiga guoed.

<sup>3</sup> ”Bemar bela weyob Israel-dulemarga sogo:

” ‘We-nii-ibambegi (10) bemar wala-walagwen, e-gwenadgan-e-gwenadganba, degi, neg-iliba, sibad-wawaad-sapingwagwad-war-wargwen na sumalo. <sup>4</sup> Ar dule e-gwenadgan-ichegwale,

sibad-wawaad-sapingwagwad geg bela gunnele, dule-neg-ibed e-neg-dikarba-itaka-maidbo na bulakwaa gunmalo. E-dule-mergedba na mimimalo, adi, sogedba gunmalagar. <sup>5</sup> Sibad-wawaad-sapingwagwad-amilegoedi, machered amilegergebed, birgagwen-nikadirgebed, bonisulid. Deyob be sumaloed, sibad-wawaaddibe, sibaddibe.

<sup>6</sup> ” ’Bemar a-sibad-wawaad we-nii-ibambe-gakabakedse (14) sabomaloed. A-ibagi, neg-sedogusale, Israel-dulemar-belagwable, wala-walagwen, we-sibad-wawaad oburgwemaloed. <sup>7</sup> Geb degine, bemar we-sibad-wawaad-abe weoed. Geb degine, bia bemar sibad-wawaad-gunmaloedgi, yawagak-e-dikargi-urgomar-gwichidgi, degi, yawagak-niba-urgo-maidgi, we-abo be magoed. <sup>8</sup> A-mutiki, a-sibad-wawaad-e-san narar, gagan-gagbidba, degine, madu-inasulidba be gunmaloed. <sup>9</sup> We-sibad-wawaad melle bipisaale maki gunmalo, amba duar mer be gunmarbalo. Bela we-sibad-wawaad, nonose-bakale, e-malimarse-bakale, degi, e-samurse-bakale, soogi narar imakmalo. <sup>10</sup> Melle we-sibad-wawaad-e-san sabogo. Ar wis obichale, banedse bemar bela ogumakmalo. <sup>11</sup> Bemar weyob sibad-wawaad gunmaloed: Bato mor-yoi, sapat-yoi, degi, gaapoled be-argangi-gani, bemar we-ibmar gwae-gwae gunmaloed, ar ade, Oburgwilegoenad-Iba an-nuggi onolegoed. We sogleged, bemar Egipto-yargi-wilebukwa Bab-Jehová bemar-ollor-imaksaye.

<sup>12</sup> ” ’A-mutikidgi bela Egipto-yargi an nasoed. Deginbali, an Egipto-dulemar-e-

machi-sailaginmalad oburgoed, degi, e-ibmar-durgan-sailagi-gwalulesmalad amba deyob an oburgwebaloed. An bela Egipto-dulemar-e-bab-dummagan wiogoed, an sabsur-odurdakoed. Ani, an Bab-Jehová, ani an weyob soged.

**13** ” 'Sibad-wawaad-e-abe bemarga-oyogega guoed, biti bemar-neg gumala. An abe-dakdogua, bemargi an bakar nasoed. Degisoggu, an Egipto-dulemar-oburgwidogua, bemardi wargwensaar burgosurmalad.

**14** ” 'We-iba bemar insaewilubmalad. Bemar we-iba, iba-dummad Bab-Jehová'ga onogewilubmalad. Bemar igar mesoed, adi, be-waganmar, we-iba igar-maidba degisadegu onodii gumalagar. **15** Bemar ibagugle (7) madu-inasulid gunmaloed. Degisoggu, iba gebe-onodeyalaba bemar-neggi madubur-ina sate guergebed. Ar doa-dule, we-ibagugledgi (7) madu e-ina-nika guchale, we-dule, Israel-dulemar-abargi onolegoed. **16** Gebe-iba-onodoedgi, degi, ibagugledgi (7), na bemar danar islidakidgi ambikumalargebed. We-ibabogwadgine bemar arbaosurmalad. Unnila na be mas-gunmalagala, masgullegoedbi bemar dumaloed.

**17** ” 'Madu-E-Inasulid-Iba bemar onogewilubmalad, ar ade, a-ibagi, Egipto-yargi-bukwa danar-danar an bela bemar-onosad. Igar-maidbali, bemar we-iba be-wagan degisadegu onodii gumaloed. **18** Bemar madu e-inasuli gunmaloed, gebe-nii-onoded-ibambe-gakabakenagunonikir (14), a-sedogidgi, geb degine, amba a-nii-iba-durgwen-gakagwensakadse (21), a-sedogidse gunmaloed. **19** Bemar-neggine, we-

ibagugledgi (7) madu-ina gwen daklegosulid. Ar ade, doa-dule madu-e-ina-nika guchale, ar wedule Israel-duledibe, Israel-dulesurdibe, we-dule Israel-dulemar-abargi onolegoed. <sup>20</sup> Degisoggu, melle madu-ina-nika ibmar gunmalo. Ar bia bemar na mamaimardibe, bemar madu e-inasuli gunmalargebed.’”

<sup>21</sup> Geb degine, Moisés bela Israel-girmadummaganse gochad. Amarga sogded: “Be namar. Bemar be-gwenadganga, sibad-wawaad-birgagwen-nikad sunamar. A-sibad-wawaad be oburgwemaloed, adi, Oburgwilegoenad-Iba be onomalagar. <sup>22</sup> Bemar sibad-wawaad-e-abe bormogi weoed. Geb gagan-hisopo’ye-nugad-e-gagan be gwannoed. A-e-gagan danakwaa be gaogu, abegi be owardikuoed. Geb degine, a-abe bela neg-yawagak-e-dikarmar-gwichidgi, degi, yawagak-niba-urgo-maidgi be magoed. Bemar wargwensaale melle be-neggi be nomalo. Neg-oibogedse geb be nomaloed. <sup>23</sup> Bab-Jehová Egipto-dulemar-oburgwe-danikile, bela neg-yawagak-dikargi abe-nai-dakalile, a-neggi bakar nasoed. Bab-Jehová, dulemar-oburgwed-baliwiturdanikid be-negyaba-dogega gwen imakosulid. Bab-Dummad gwen-burgwega be-imakosulid.

<sup>24</sup> ”Bab-Dummad-bemarga-we-igar-mesisadi, bemar, degi, be-wagan, degisadegu imakdii gumaloed. <sup>25</sup> Bab-Jehová bemarga-yar-ukoyesogsadgi bemar dogdapile, bemar we-iba deyob-onodii degisadegu gumarbaloed. <sup>26</sup> Bemimmigan bemarse egichialile: ‘Wede weyob anmar iba-onoged, ¿ibi obarye?’ <sup>27</sup> Bemar abin-soge-wilubmalad: ‘Bab-Jehová Egipto-

dulemar-oburgwenaigusgu, anmargindi bakarnasye. Degisoggu, Bab-Jehová-nuggi wesibad-wawaad oburgwileye. Degine, Israel-dulemar Egipto-yargi bukwagu, Bab-Jehová Israel-dulemar-neggi bakar-nadegusye, Egipto-dulemardi oburgwilesye. Weyobi, Bab-Jehová, anmar-gwenadgan-bendaksaye, anmardi oburgwilessurye.’”

Moisés sunmaked-bergusgua, Israel-dulemala dulluu imaksamalad, oyogega, emarde Bab-Jehová’se gornanaiye, Bab-Dummad-nug odummonanaiye. <sup>28</sup> Agi, geb nadmalad. Igi Bab-Jehová Moisés’ga, degi, Aarón’ga igar-uksa, aba bela deyob imaksamalad.

### *Machi-sailaginmalad oburgwilesad*

<sup>29</sup> Nega-gabigwenadbali, Bab-Jehová Egipto-dulemar-gwenadgan-iliba e-machi-sailagined-oburgwisad. Amba deyob Faraón-Egipto-yar-dakmaid-e-machi-sailagined, degi, dule-esgaryagi-mellesiid-e-machi-sailaginedse-bakar oburgwisad. Degine, ibmar-durgangebegwalulesmalad oburgwisbalid. <sup>30</sup> Faraón, degi, ega-arbamalad, degine, bela Egipto-dulemar a-mutik gwisgusmalad, geb bela Egipto-yargi, binnasur ise-gormakar bosmalad, ar ade, negilibali e-machi-sailagined burgwenai gusad. <sup>31</sup> Abga-a-mutikidgi Faraón Moisés’se, degi, Aarón’se gochad. Amarga sogded:

“Be namar. Bemar-Israel-dulemar, andulemargi be bangumar. Bemar Bab-Jehová-e-nug odummonamar. Igi bemar sogsa

gusa, deyob imaknamar. <sup>32</sup> Bemar be-sibad-wawaadmar, degine, moli-bebe-nikamalad be abemaladba sedmarbalo. Deginbali, bemar anga Bab-Jehová'se gormarmogo, angi nued binsamogagar."

<sup>33</sup> Egipto-dulemala gwaе-gwae Israel-dulemarononai gualid. Ar ade, binsamalad, emarde bela burgwemaloye. <sup>34</sup> Israel-dulemala madu-omukuar-siid, amba yoo egi maduina-eoleged, e-omukuedgi-siid susmalad. Bela e-morgi obipirmaksagu, e-gukingi-sii sesmalad. <sup>35</sup> Deginbali, Moisés-ega-igar-eksadba imaksamalad. Egipto-dulemarse ibmarmar-orgi-sobaled, degi, ibmarmar-manigi-sobaled egichismalad, degi, mormar egichismarbalid. <sup>36</sup> Bab-Jehová Egipto-dulemar Israel-dulemarnued-dakega imaksad. A-ular, Egipto-dulemar bela Israel-dulemar-ese-ibmar-egichisad, ega nue-ukbi itogunonimalad. Weyobi, Israel-dulemala Egipto-dulemargi bela-bela ibmar-nuegan susmalad.

### *Israel-dulemala Egipto-yargi ainismalad*

<sup>37</sup> Israel-dulemala neggwebur-Ramesés'ye-nugadgi nodmalad, neggwebur-Sucot'ye-nugadse nadmalad. Machergan-sunna-bato-bilanonmaladbi, nagab-ainiarmaladi, mili-dulataled-ilanergwa (600,000) merged. Omegan, degi, mimmigandi obarilesulid. <sup>38</sup> Israel-dulemba dule-baigan-yar-baid-baidginmalad eba-bukidar ainiarmarmogad. Deginbali, bukidar sibad-wawaadmar, degi, moli-bebe-nikamalad

searmarbalid. <sup>39</sup> Israel-dulemar gwaе-gwae-itoarmaladba amba yoo mas-due ainiarmalad, ar ade, Egipto-dulemala, e-yargi gandikidgi Israel-dulemar-onosmalad. Degisoggu, maduomukuaed-Egipto'gi-searmaladgi madu-olo e-inasuli sobsamalad.

<sup>40</sup> Israel-dulemala Egipto-yargi birga-dulataled-ilabake gaka-dulagwen-gakambe (430) gudii gusmalad. <sup>41</sup> Birga-dulataled-ilabake gaka-dulagwen-gakambegi (430), Bab-Jehová-esordamar Egipto-yargi-bukwad danar-danar ainiarmalad. <sup>42</sup> A-mutiki, Bab-Jehová, Egipto-yargi Israel-dulemar-onogega, Israel-dulemargi nue nakulenai gusad, adi, bonisuli nomalagar. Agala, bela Israel-dulemar-wagan-danimaloedi, Bab-Jehová-ega-ibmar-imaksad-ular, a-mutikidgi atakbukwa gumaloed. Deyob, degisadegu imakdii gumaloed.

### *Oburgwilegoenad-Iba-e-Igarmar*

<sup>43</sup> Bab-Jehová Moisés'ga, degi, Aarón'ga sogded: “Oburgwilegoenad-Iba-onogegala, weyob igar mai guoed: ‘Israel-dulesulid we-ibagi-mas-gulleged gunnosur guoed. Ar wede ega ised.

<sup>44</sup> ” ’Ar mai-manigi-baklealiddi, idu bato e-abgan-uka-duku-siklesale, we-ibagi-mas-gulleged sunna gunnoed.

<sup>45</sup> ” ’Dule-Israel-dulesulidi, unnila sikwas be-yargi nadapdibe, na mani-onogega arbadibe, a-dule bipisaale we-ibmar gunnosulid.

**46** ” ’We-sibad-wawaad unnila neg-gwagwengi gullegoed. We-ibmar-oburgwilesad-e-sana, baid-negse sedega neg-gwagwengi bipisaale onolegosolid, degine, bipisaale be sibad-wawaad-e-gar bisgosurbalid.

**47** ” ’Bela Israel-dulemala weyob imakergeb-malad.

**48** ” ’Deki-inigwele, Israel-dulesulid bemar-abargi gudiile, we-dule Oburgwilegoenad-Iba, degi, Bab-Jehová-nug-odummogega onobiele, iduale, bela machergan-e-neguyaginmalad e-abgan-uka-duku sikmalargebed. Geb a-sorbardi, sunna iba onogodo, ar we-dulemala be-yargi-gwalulesadyob gunonikoed.

” ’Dule-wargwensaale, e-abgan-uka-duku-sikarsulid, we-ibagi-mas-gulleged gunnosur guoed.

**49** ” ’Bela dulemar-be-yargi-gwalulesmaladi, degi, dulemar-be-yarginsurmalad-be-abargi-gudidimaladi, ebabela deyob we-igar imakmaloed.’ ”

**50** Israel-dulemala, Bab-Jehová igi Moisés’ga, degi, Aarón’ga igar-uksa, aba bela deyob imaksamalad. **51** A-ibagine, Bab-Jehová Egípto-yargi Israel-dulemar danar-danar onosad.

## 13

*Machi-sailaginmalad    Bab-Jehová’ga    nug-imaklesad*

**1** Bab-Jehová Moisés’ga sunmakded, ega sogded:

**2** “Machi-sailaginmalad anga be udago. Ar bela Israel-dulemar-e-machi-gebesailaginmalad,

angadid. Deger, e-ibmar-durgan-gebe-gwalulemalad, amba deyobbalid.”

<sup>3</sup> Geb degine, Moisés Israel-dulemarga sogded: “We-iba nue be insamalo. Bab-Jehová, bemar Egipto-yargi maiga-wilebukwadgi gandikidba bemar-ononaid. Melle bemar madu e-in-a-nika gunmalo. <sup>4</sup> Emi bemar nonanaidi, Abib-niigi be nonanaid. <sup>5</sup> Ar Bab-Jehová bemar-dadganga ise-sogar sogsa gusad, we-yala an bemarga ukedseye:

Canaán-dulemar-yar, Het-dulemar-yar,

Amorreo-dulemar-yar,

Heveo-dulemar-yar, degi, Jebuseo-dulemar-yar.

A-yarmar napa-nuedid, gadi ibmar san-maked.

“Degisoggu, Bab-Jehová we-dulemar-yarse bemar-odononikile, we-Abib-niigi bemar we-iba onomaloed. <sup>6</sup> Ibagugle (7) madu e-inasuli bemar gunnoed. Ibagugledgi bemar iba-onogoedi, we-iba, Bab-Jehová'gadid. <sup>7</sup> Ibagugle (7) bemar madu e-inasuli gunmaloed. Bipisaale bemar madu-ina, madu e-inabardibe, be-yargina be nikuosurmalad. <sup>8</sup> Ibagugle-gusadgine, be-machiga be sogmaloed: ‘An Egipto-yargi noargu, Bab-Jehová anga ibmar-dummagan imaksad, a-ular, an we-iba onoged. <sup>9</sup> Deginbali, we-iba, bemar-sakwagi, bemar-bebegindibe, wilub-naiyob guoed. We, bemar-insaega imakoed, bemar Bab-Jehová e-igar-maidgi sunmakdiguewilubbid, ar ade, Bab-Jehová gandikidba Egipto-yargi bemar-onosad. <sup>10</sup> A-ulale, we-iba birga-irba e-iba-sekalaa bemar onogewilubmalad.’

**11** "Bab-Jehová, ar igi bemarga, degi, bedadganga sogsagusa, we-yala an bemarga ukedseye, deyob, Canaán-dulemar-yarse bemarnisale, degi, bemarga uksale, **12** bela be-machi-sailagined Bab-Jehová'ga be nugsaergebmala. Amba deyob be-ibmar-durgan-macheder-gebegwaled Bab-Jehová'ga bemar ukbaloed, ar ade, bela wemala, Bab-Jehová'gadid.

**13** "Moli-uayasuid-ome gebe-mimmi-macheder-nikued, a-mimmi-muchub sibad-wawaadsapingwa, ebo be ogwaoed. Ar be sibad-wawaad muchub uksulile, adi, moli-uayasuid-mimmi-e-dukar be bisgoed. Deginbali, machi-gebesailagined-ular, Bab-Jehová be bennuknaiyobi ega be ibmar ukoed, adi, machi-sailagined onogegar. Machi-sailagined-ular, degibi be imakoed.

**14** "Ar ibagwengi be-machi bese egichialile, ar wede ibi obarye. Be-machiga bemar sogoed: 'Bab-Jehová gandikidba Egipto-yargi deun anmar maiga wilebukwagua, anmar-onosgusye.

**15** Faraón bur bule burgudgua, yapa anmar-onogeguargua, Bab-Jehová bela Egipto-dulemar-e-machi-sailagined-oburgewisye, degi, ibmar-durgan-e-mimmi-macheder-gebegwalulesmalad amba deyob oburgewisbarye. A-ulale, anmar ibmar-mimmi-macheder-gebegwaluled bela Bab-Jehová'ga ukdamarye, degine, anmar-machi-sailagined-anar anmar Bab-Jehová bennuknaiyobi, ega ibmar-ogumakar ukdaye, adi, anmar-machi-sailagined-onogegarye.

**16** Degisoggu, anmar weyob ibmar-imaked, bemar-sakwagi, bemar-bebegindibe, wilub-

naiyob guegarye. We be insaega gumaloye, Bab-Jehová gandikidba Egipto-yargi anmar-onosgusye.’”

*Mogir Israel-dulemar-idu-nadap gusad*

<sup>17</sup> Faraón Israel-dulemar-onosgua, Bab-Dummad Filistea-dulemar-yarsik-igar-maidsik Israel-dulemar-sessulid. A-igar bur-itakagwanad. Ar ade, Bab-Jehová binsasad, Israel-dulemar bila-onosoge, yapa bila-ono gudamaloye, bur gannar Egipto-yarse dagbi-gudamaloeddeeye.

<sup>18</sup> A-ulale, Bab-Dummad Israel-dulemar negadulesulidganba-bipirmakega sesa gusad, Demar-Ginnidye-nugad-naid-igarba sesad.

<sup>19</sup> Deyobi, Israel-dulemala guakwaa urwenadapiyob Egipto-yargi noarmalad. Moisés, eba José-garmar sesa gusad. Ar ade, José burgwesokargu, Israel-dulemar-ega-ise-sogar-sogega imaksad, anmar be-garmar sededseye. Deunni, José, Israel-dudemarga weyob sognai gusad: “Napiragwad, Bab-Dummad bemarbendaknonikoed. Ar deyob gunonikile, bemar an-garmar bemarba sedmalo.”

<sup>20</sup> Israel-dulemala neggwebur-Sucot'ye-nugadgi noarmalad. Geb Etam'ye-neg-nugadse ambikudapmalad. Agi, negadulesulidgan onoded. <sup>21</sup> Ibgine, Bab-Jehová mogir-bubawaryob-gwichidba Israel-dulemar-idu-nadap gusad, adi, ega igar-oyonadap guegar. Mutikdina, soo-bubawaryob-gwichid-gwabunyemaidba idu-nadap gusad, adi, ega neg-mee saegar. Aga, nabir sunna ibginedba, degine, mutikidba, Israel-dulemar nadap

gusmalad. <sup>22</sup> Mogir-bubawaryob-gwichid gusgu Israel-dulemar-iduar ibgi nadap gusad. Soo-bubawaryob-gwichid-gwabunyemaiddi, mutik Israel-dulemar-idu-nadap gusbalid.

## 14

### 1e. Demar-Ginnidye-nugadgi obaksamalad

(14:1–15:21)

#### *Demar-Ginnidye-nugadgi obaksamalad*

<sup>1</sup> Bab-Jehová Moisés'ga sunmakded, ega sogded:

<sup>2</sup> “Israel-dulemarga be sogna, be gannar igarbaidba aibirmar. Pi-Hahirot'ye-neg-nugad-asabin bemar ambikunonimaloed. Pi-Hahirot'de, Demar-naidi, degi, Migdol'ye-neg-nugad-naidi, amar-abargi naid. Baal-Zefón'ye-neg-nugad-asabin naid. A-asabin demar-gakagi bemar ambikunonimaloed. <sup>3</sup> Adi, Faraón binsaegar: ‘Israel-dulemar wissurmarye, emarde bia namaloye. Emar nega-dulesulidganba yoggus gudimarye.’

<sup>4</sup> ”Andi an, aka bur bule Faraón-burguega imakoed, degine, Faraón bemar-bareginneg a an imakbaloed. Geb degine, Faraón'gi, degi, esordamar-bila-onomaladgi an-gargangued an oyogoed. Deyob, Egipto-dulemala wisgumaloed, ani an Bab-Jehová guye.”

Israel-dulemala deyob imaksamardo.

<sup>5</sup> Geb degi-gunaidgine, Egipto-e-reyga solealid, Israel-dulemar wakitemarye. Egipto-e-rey, degi, ega-arbamalad, binsaed-gwagdemalad, weyob sogdemalad: “¿Ar wede, ibiga anmar

Israel-dulemar-onosa? Emide, anmar wedulemar-naega imaksagu, gwen bar anmarga arbaosurmalad. Degisulirgebed.”

<sup>6</sup> Geb degine, Faraón igar-ukdesunnad, urmabil-a-onoged-napagined ega guakwaa nasikye. Geb degine, Faraón e-sordamar-bila-onomaland sesad. <sup>7</sup> Faraón urmar-napagined-bur-nuegan dulataled-ilanergwa (600) susad, deginbali, bela Egipto’gi urmar-napaginmalad-baigan sesbalid. Faraón, e-dummagan a-urmar war-wargwensedega imaksad. <sup>8</sup> Bab-Jehová’di aka bur bule Egipto-rey-Faraón-burguega imaksad. A-ular, Faraón Israel-dulemar-baregite gusad. Israel-dulemardi dobsulidba nadap gusmalad.

<sup>9</sup> Bela Egipto-dule-e-sordamar-bila-onomaland, e-urmar-napagined, moli-birgi-sii-urwemaladi, Israel-dulemar-bareginnega ainidgusmalad. Egipto-sordamar, Israel-dulemar demar-gakaba Pi-Hahirot’gi-danar-bukwa bargadapmalad, Baal-Zefón-asabin.

<sup>10</sup> Israel-dulemar dakdemargu, Faraón, degi, Egipto-dulemar egi daniki, bela-bela dobeitodmalad. A-ular, Bab-Jehová’se gandikidba bendakleged egisdemalad. <sup>11</sup> Geb Moisés’ga sogdemalad:

—¿Ar wede Egipto-yargi neg-uande sursi? Emide, nega-dulesulidganba anmar-oburgwega weba be anmar-onosgu. Ar wede, ¿ibiga deyob be anmar-imaksa? Ar wede, ¿ibiga Egipto-yargi be anmar-onosa? <sup>12</sup> Ar anmar Egipto-yargi-gudigu bega soggasursi, ‘¡Anmar bur Egipto-dulemar-e-maiga-gued bur nuedye! ¡Ar anmar nega-

dulesulidganba-burgwedba      Egipto-dulemar-maiga-gued bur nuesye!"

<sup>13</sup> Moisés'di Israel-dulemar-abin sogded:

—Melle be dobgumar. Gandik be imakmar. Bab-Jehová bemar-bendakega-ibmar-imakoed be nue dakmar. Ar ade, emi bemar Egipto-dulemar-dakedi, bipisaale gwen bar-dakosurmalad. <sup>14</sup> Ar Bab-Jehová bemar-ular-urwosoggu, bemar mer bukib binsamalo.

<sup>15</sup> Geb degine, Bab-Jehová Moisés'ga sogded:

“¿Ar ibiga be anse bendakleged egise? ¡Israel-dulemarga gandikidba be soge, be namarye!

<sup>16</sup> Bedina, be-gaapoled be onakwe, be-sakwa demarsik be oyoge, demar negabar be egae. Ar deyobi, Israel-dulemar demar-argasadgi neg-dinnagwadgi obakmaloed. <sup>17</sup> Ar andi, Egipto-dulemar be-bareginmalaga, aka bur bule burguega an imakoed. Geb agine, Faraón'gi, bela e-sordamar-bila-onomalandgi, e-ur-napaginmaladgi, e-sordamar-moli-birgi-sii-urwemalandgi, an egi-ibmar-imakoedi, an-nug bur odummolegega an imakoed. <sup>18</sup> An Faraón'gi, e-urmar-napaginmaladgi, e-sordamar-moli-birgi-sii-urwemalandgi an-gangued an oyosale, agi Egipto-dulemar wisguoed, ani an Bab-Jehová gued.”

<sup>19</sup> Agine, Bab-Dummad-e-baliwitür, Israel-sordamar-idu-nadapidi, gwagded, Israel-sordamar-sorba nagusad. Deyobi, mogir-bubawaryob-gwichidi, Israel-dulemar-idu-nadapidi, gwagdemogad, Israel-sordamar-sorba nagusmogad. <sup>20</sup> Degisoggu, mogir-bubawaryob-gwichid Israel-sordamar-sorba nagussunnad,

Egipto-sordamar-idu. Egipto-sordamargala, we-mogir gorosur-dakleged. Israel-sordamargardi, we-mogir ega neg-mee imaknайд. A-ulale, mutikidba Egipto-sordamar geg Israel-sordamar-barga gusmalad.

<sup>21</sup> Degine, geb Moisés e-argan demarse oyoded. Geb agine, Bab-Jehová dad-nakwedsik burwabin nasur ogochad. A-burwa degi-gormai oiboolid. Weyobi, a-burwa demar negabar-egaega imaksad. Deyob, Bab-Jehová, demar-abargi neg odinnosad. <sup>22</sup> We-napa-dinnagwadba Israel-dulemar obaksamalad. Demar gasdibir-matusulidyob e-dikar-nuedsik-mai, degi, e-sapiledsik-mai gusad.

<sup>23</sup> Egipto-dulemar Israel-dulemar-sorba, ubodmalad:

Bela Faraón-e-molimar,  
bela e-urmar-napaginmalad,  
degi, bela e-sordamar-moli-birgi-sii-  
urwemalad ubodmalad.  
Amala, demar-neg-abaladse Israel-  
dulemar-baregichamalad.

<sup>24</sup> Bolegoedbali, Bab-Jehová mogir-bubawayob-gwichid-akar, degi, soo-bubawayob-gwichid-akar Egipto-sordamar-is-e-nue-dakdegu, Egipto-sordamar ber suli-suli-itogega imaksad. <sup>25</sup> Deginbali, Bab-Jehová, Egipto-sorda-e-ur-e-nagmar-bipirmaknanaid bela oichosbalid. Degisoggu, ugak wis binnaa nadap gusmalad. Geb Egipto-sordamala sogdemalad:

“Ar ade, Bab-Jehová Israel-dulemar-anar urwenaid. Bab-Jehová anmargi

gwisgunaid. Degisoggu, Israel-dulemargi anmar wakinmarsun.”

**26** Ar Bab-Jehová'di Moisés'ga sogded:

“Demar-birgi be-argan be oyoge, adi, demar gannaryob guegar. Geb degine, Egipto-sordamargi, e-urmar-napaginmaladgi, degi, e-sordamar-moli-birgi-sii-urwemaladgi demar arweoed.”

**27** Moisés e-argan demar-birgi oyoded. Oiboargu, demar gusgu-maidyob gannarse gunonikid. Egipto-dulemala wakinye sokarmalan-inigwele, ar demardi egi gwichigunonikid. Weyobi, Bab-Jehová, Egipto-dulemar demargi ogundisad. **28** Demar gusgu-maidyob gannarse gunonigu, urmar-napagine, sordamar-moli-birgi-sii-urwemalad, degi, bela Faraón-e-sordamar-bila-onomalad, wemala, Israel-dulemar-bareginnega-demargi-dogsamaladi, bela egi demar arwenonikid. Faraón-sordamar bela burgwismalad, wargwensaale gwen durgussulid.

**29** Ar Israel-dulemardi demargi obaksamalad, napa-dinnagwadgi nadapgusmalad. Demar gasdibir-matusulidyob e-dikar-nuedsik-mai, degi, e-sapiledsik-mai gusad.

**30** A-ibagine, Bab-Jehová, Egipto-dulemar-ganguedgi Israel-dulemar-abonosad. Israel-dulemala Egipto-sordamar-e-muimar demar-gakaba-omilede daksamalad. **31** Israel-dulemar dakdegu, Bab-Jehová e-gangued Egipto-dulemargi sabsur-yolesa, nue Bab-Jehová-dobee itonadmalad, degine, Bab-Jehová'gi bensuli

gunonimalad. Amba deyob Bab-Jehová-mai-Moisés'gi, bensuli gunonimarbalid.

## 15

### *Moisés-namaksad*

<sup>1</sup> Geb degidgine, Moisés, degi, Israel-dulemar we-namaked, Bab-Jehová-nug-ogannogega namakdemalad:

“Bab-Jehová-nug-odummogega an namakoed, ar ibibayobi Bab-Jehová-emargi-nakwisad geger-daklege, deunni, molimar, degi, e-birgi-sigmalad, demargi ogundisgu.

<sup>2</sup> An-namaked, Bab-Jehová'ga an namaked.

Ar Bab-Jehová an-ogannogedid, an-abonogedid.

Bab-Jehová an-Bab-Dummadid, an a-e-nug odum-mogoed.

We-Bab-Jehová an-bab-e-Bab-Dummadid, an a-e-nug ogannoged.

<sup>3</sup> Bab-Jehová, dule-bila-onoged-sunsogedid.  
¡Bab-Jehová'ye e-nug nugad!

<sup>4</sup> Bab-Jehová Faraón-e-urmar-napaginmalad, degi, Faraón-sorda-bila-onomalad demargi odosad. Faraón'ga-sorda-semalad-e-dummagan-bur-nuegan, Demar-Ginnidye-nugadgi gundilesad.

<sup>5</sup> Akwayobi wilasailase argwachamalad, degi, muu-wilasailad egi mulus nagusad.

<sup>6</sup> ”Bab-Jehová, be-gargangued dutusulid, be-gargangued gandikidba maid.

- Bab-Jehová, be-garganguedba be be-isdarmalad ogilosad.
- <sup>7</sup> Be-gangued-dutusulidgi dulemar-begi-gwsgusmalad be ogilosad.  
Be-uluded be barmisgu, be-isdarmalad gaganyob gummakded.
- <sup>8</sup> Be-bunnogedgi be dii danar oambikunonikid.  
Demar-billigan gasdibir-matusulidyob megisad,  
muu-wilasailad bogidik nagusad.
- <sup>9</sup> "Anmar-isdarmalad binsasmalad:  
'An bargaedse bareginnoye.  
An e-ibmar-suoedi, an mimioye,  
an egi yeer-itogedse, an mimioye.  
An es-suid, an egi onogoye,  
an-sunnagwad an wemar ogilogoye.'
- <sup>10</sup> Bab-Jehová, ar be burwa-ogochadba, be demarse-dolegega imaksad.  
Gingwayobi dii-gandikidba-nukamakmaidgi dogdemalad.
- <sup>11</sup> Bab-Jehová, ¡bab-dummad-baid bebo wilubdaked sated!  
¡Beyob-isligwaled, baid sated!  
¡Beyob-dummadid, satebalid!  
¡Be ibmar-gegerdakleged-imakedi, dobe-ito anmar-imaked!  
¡Ar nabirid, be-nug odummolegergebed!
- <sup>12</sup> ¡Be-gangued be oyodgu,  
napa we-dulemar-dosad!
- <sup>13</sup> "We-dulemar be abonosadi, be-sabedbali na be semaid.

- Be-ganguedbali, we-dulemar be-neg  
swilidikidse na be sedoed.
- <sup>14</sup> Dulemar-yar-baid-baidgi-bukmalad  
wisguarmalale, wawanmakdemaloed.  
Filistea-dulemar sulibinsa itodmaloed.
- <sup>15</sup> Edom-e-dummagan bela-bela dobgudmaloed.  
Moab-e-dummagan dobedbali, wawan-  
makdemaloed.  
Bela Canaán-dulemar dobedba duurmakde-  
maloed.
- <sup>16</sup> Bab-Jehová, be-surgan-ganguedbali we-dulemar  
bela-belad-gwakidmalodo.  
Bela we-dulemar dobgudmalodo.
- Bab-Jehová, be-gangued-abin we-dulemar  
akwayob geg sunmak sigmaloed.  
Bela be-dulemar-na-begadga-imaksad bela-  
obaksadse, we-dulemar bogidik ambiku-  
maloed.
- <sup>17</sup> Bab-Jehová, be-megega na be yar-susadse, be-  
dulamar be sedoed.  
A-yargi, degisadegu-megega be anmar-  
imakoed.
- A-yar na be sisadid.  
Agi be megega, be-neg be sisad.
- <sup>18</sup> ¡Bab-Jehová degisadegu negsemai guoed!"

### *Maria-namaksad*

- <sup>19</sup> Faraón-urmar-napaginmalad, degi, moli-  
birgi-sii-urwemalad, Israel-dulemar-bargaega  
demargi-dogdemargu, Bab-Jehová amargi  
demar-arwega imaksad. Israel-dulemardi de-  
margi napa-dinnagwadgi nadapi obaksamalad.
- <sup>20</sup> Bab-Dummad-gayaburba-barsoged-bundor-  
María, Aarón-e-bunad. We-María'de, gar-  
pandereta'ye-nugad susad, geb namakded.

Bela omegan-baigan gar-pandereta ogornadap gusmarmogad, eba dodonadap gusmarmogad.  
**21** María ega weyob namaknadapid:

“Bab-Jehová-nug-odummogega namakmar.

Molimar, degi, e-birgi-sigmalad demargi ogundisa.

Ibibayobi, Bab-Jehová Egipto-dulemarginakwisad geger-daklege.”

## **2. ISRAEL-DULEMAR SINAÍ-YARSE NADEGUSAD**

(15:22–18:27)

### *Dii-gagbiregedse warmakdapmalad*

**22** Moisés, Israel-dulemar Demar-Ginnidye-nugadgi-bukwad sesa gusad. Nega-dulesulidgan-Shur'ye-nugadse sesad. Agine, ibapaa nana-smalad, gwen dii amissurgusmalad, ar dii sated.

**23** Mara'ye-neg-nugadse modapmargu, agi-dii-nikadi, geg gobe gusmalad, ar ade, dii gagbisailad. A-ulale, a-neg Mara'ye onugsasmalad. Mara'de sogleged, “gagbisailadye.”

**24** Dulemar Moisés'gi ichakwa sunmakarmalad, sognanai guarmalad: “¿Ar wede ibi anmar goboe?” **25** Geb degine, Moisés Bab-Jehová'se bendakleged egichided. Agi, Bab-Jehová Moisés'ga sapi-bipi oyosad. A-sapi-bipi Moisés diise meted. Agine, dii sayee naded.

AGINE, Bab-Jehová Israel-dulemar-wilubdaksad. Deginbali, agi igi-na-nanamaloed-igar ega uksabalid. **26** Bab-Jehová Israel-dulemarga weyob sogded: “Ani an bemar-Bab-Dummad-Jehová gued. Ar bemar, an

bemarga-ibmar-soged be nue itomalale, an-ibmar-abegedba be imakele, degi, an igar-bemarga-uksad be imakmalale, degine, an-igar-mamaidba be damalale, Egipto-dulemargi bonigan-dummagan-an-barmialidi, bemargi a-bonigan an barmidagosulid. Ar ade, ani an Bab-Jehová gued. Ar ani an bemar-nudakedid.”

<sup>27</sup> Geb a-sorbali, Elim'ye-neg-nugadse modap-malad. Agi ambe-gakabo (12) dian ariomaid, degine, sapi-ogobgi-dakleged dulapaa-gakambe (70) bukwabalid. Agine, Israel-dulemar dii-naba ambikudapmalad.

## 16

### *Bab-Dummad Israel-dulemarga maná uksad*

<sup>1</sup> Bela Israel-dulemar Elim'ye-neg-nugadgi node gusmalad, geb nega-dulesulidganba-Sin'ye-nugadse warmakdapmalad. Sin'de Elim'ye-neg-nugad-naid, degi, Sinaí'ye-neg-nugad-naid, amarnegabargi naid. Deunni, Egipto'gi nii-warbogus gaka-ibambe-gakatargus (15) noarmalad-akalad.

<sup>2</sup> A-nega-dulesulidgangi dulemar bela Moisés'gi, degi, Aarón'gi uluarmalad. <sup>3</sup> Israel-dulemar sogdemalad:

“Ar Bab-Jehová Egipto-yargi anmar-oburgwismalana bur nabirinad. Webardi, anmar bormo-ebiris bormo san-ena, nue-immelegedse mas-gundaenad. Ar emidi, bemar we-nega-dulesulidganse bela ukudba-anmar-oburgwega be anmar-nialid.”

<sup>4</sup> Geb degine, Bab-Jehová Moisés'ga sogded:

“Bemarga an madu niba batedaged an imakoed. Degine, dulemar, unnila emigadbi

madu-weemalaga, bane-bane neg-magaba nomalargebed. Adi, an wilubdakegalad, doamar an-ibmar-sogedba imakmalodibe, doamar imakosurbardibe. <sup>5</sup> Ibanergwadgindina (6) dulemar ilabo-mergu e-negse-sedega madu weemaloed.”

<sup>6</sup> Moisés, Aarón’bogwa Israel-dulemarga sogdemalad:

“Sedogidba be wisgumaloed, Bab-Jehová, na e, Egipto-yargi bemar-onosye. <sup>7</sup> Deginé, wakdaradbali, Bab-Jehová-e-gangued-yeerdakleged be dakmaloed, ar ade, Bab-Jehová bemar-egi-oimakbukmalad bemar-itosad. ¿Ar anmardi doasunna, ar emide, be anmargi oimakbukmargu?”

<sup>8</sup> Deginé, Moisés sogdebalid:

“Sedogi Bab-Jehová bemarga san ukoed, adi, a-san be gunmalagar. Wakdardi madu ise-obinagwar bemarga ukoed, ar ade, Bab-Jehová egi be ulusmalad be-itosmalad. ¿Ar anmardi doasunna, anmargi be urwenaimargu? Ar bemar anmargi ulussulid, Bab-Jehová’gi be ulusmalad.”

<sup>9</sup> Geb degine, Moisés, Aarón’ga sogded:

“Israel-dulemarga be soge: ‘Bela Bab-Jehová-asabin ambikudamar, ar ade, Bab-Jehová bemar egi-oimakbukwad bemar-itosad.’”

<sup>10</sup> Aarón Israel-dulemarga sunmakgwisgua, bela dulemar nega-dulesulidganba atakdemalad, agi mogir-imbaba Bab-Jehová-e-gangued-yeerdakleged nononikid. <sup>11</sup> Geb degine, Bab-Jehová Moisés’ga sunmakded, ega sogded:

<sup>12</sup> “Israel-dulemar angi oimakbukwad an itosad. Amar-ebo be sunmak, ega be soge:

‘Emi-sedogi be san gunmaloye, wakdardina, be madu gunmaloye, nue-immelegedseye. Adi, be wisgumalagarye, ani an Bab-Jehová guye, ani an bemar-Bab-Dummadye.’”

<sup>13</sup> A-sedogidgine, nuumar-codorniz’ye-nugad nonimalad, bia Israel-dulemar-bukwadgi ena ambikunonimalad. Deginé, wakdaradbali, Israel-dulemar-bukwad-dikarba dii bominonikid. <sup>14</sup> Dii-bomisad-dingudgu, sorba daklealid negadulesulidgan-napagi ibmar-dataragwad, dii-akwaga-binnisadyob-daklege omiledé. <sup>15</sup> Ar Israel-dulemar wissurmarsoggú, wede ibua, a-ular, a-dakarmalale, na muchub-muchub egisdedamalad: “¿Wede ibua?” Geb Moisés ega sogded:

“We madu, Bab-Jehová bemarga uked, adi, be mas-gunmalagar. <sup>16</sup> Bab-Jehová bemarga soged, weyob bemar imakoye: Na be mergu-gunmaladba, wargwen-wargwen weenamaloye. Deginé, na be be-neggi mergudule-nikadba, wala-walagwengi nibirbo-wilubmergu weemaloye.”

<sup>17</sup> Israel-dulemala deyob imaksamalad. Gwen-gwen bur ichesur wesmalad, gwen-gwen bur ichee wesmalad. <sup>18</sup> Deyob weemaloye-soglesadba wesmalad. Ar dule-ichesur-wesadga obichasulid, dule-ichee-wesadga akussurmogad. Na e-mergu gunnedba, wala-walagwen egad-egad wesmalad.

<sup>19</sup> Geb degine, Moisés Israel-dulemarga sogded: “Bemar bipisaale melle banedga we-masgunned be sabomalo.”

<sup>20</sup> Degi-inigwele, dulemar abala Moisés-sogedba imaksasurmalad, abar banedga sabosmalad.

Banedga-sabosmaladi, ei nusbiin gusad, bela nunu-yapan oiboalid. Geb degine, Moisés amargi nue-sae-itoded, ese uluded.

**21** Na e-mergu-gunmaladbali, wakdaradba egad-egad weenaddamalad, ar ade, dad-diopisurgudele, dad-abin diree naddaed.

**22** Ibanergwadgindi (6), ilabo-wilub mas wesmalad. A sogledo, wala-walagwengi nibirbake-wilub wesmarye. Geb degine, neg-danar-danar-bukmalad-e-dummagan ibmar-gusad Moisés'ga sognadmalad. **23** Agi, Moisés amarga sogded:

“Ar weyob Bab-Jehová igar uksad. Oibosale, obunnoged-ibad. We-iba, Bab-Jehová'gadid. Emi bemar mas-yobiedi, emi be yomalodo. Emi mas-dulebiedi, emi be mas dumalodo. Bemarga-mas-obinoedi, banedga be sabomaloed.”

**24** Ibmar-obichadi, Moisés-igar-uksadba sabosmalad, adi, oibosar gunmalagar. We-ibmar nungussulid, nusbiin gussurbalid. **25** Geb degine, Moisés sogded:

“Emi obunnoged-ibad, Bab-Jehová-ibad. We-ibmar emi be gunmar. Ar emi-ibagi, we-ibmar, batenai, degi, napagi-mellemai gwen be dakosur-malad. **26** Bemar sunna ibanergwa (6) we-ibmar weemaloed. Ar ibagugledgindina (7), obunnoged-ibad. A-ibagi, we-ibmar sate guoed.”

**27** Degite, gwenna-gwennagwa ibagugledgine (7) wis ibmar-weenamalaga, node gusmalad. A-ibmar wessurgusmalad, ar ade, a-ibagi a-ibmar gwen daksasurgusmalad. **28** Geb degine, Bab-Jehová Moisés'ga sogded:

“¿Ar wede sanagwadse an-igar-mamaidba, an bemarga-ibmar-sogedba be nanamaloye soge? <sup>29</sup> Ani, Bab-Jehová, an bemarga ibagwen-obunnoged-iba uksanad. Agala, ibanergwadgine (6), an bemarga masgunned ibabo-wilub uksad. Degisoggu, ibagugledgine (7), bemar na e-neg-e-neggi megewilubmalananad, bemar na be-neggine noewilubsurmalananad.”

<sup>30</sup> Geb degine, dulemar ibagugledgine (7) obun-nosmalad.

<sup>31</sup> Israel-dulemala we-ibmar-weemaladi, bismalad: “Maná’ye.” We-ibmarde, e-gwag sipugwad, gagan-wawadikid-culantro’ye-nugade-gwagyobid, degi, madu-dibyaled achanis egi eoaledyob gullegd.

<sup>32</sup> Geb sorbali, Moisés sogded:

“Weyob Bab-Jehová bemarga igar uked: ‘Bormogi nibirbake be maná enomalo. Bemar bewaganga be nue sabomalo, adi, be-wagan dakmalaga, Egipto-yargi an bemar-onosmargu, igidmas an bemarga nega-dulesulidganba uksa gusa.’”

<sup>33</sup> Geb degine, Moisés Aarón’ga sogded:

“Bormo gwagwen be sue, agi nibirbake be maná urboed. A-sorbali, Bab-Jehová-asabin be sioed, adi, bemar-waganga-oyogega be sabogoed.”

<sup>34</sup> Igi Bab-Jehová Moisés’ga igar-uksa, deyob, Aarón, we-maná sabogega, bormogi Bab-Jehová-Dadganbo-Igar-Mesisad-Ulu-asabin sisad.

<sup>35</sup> Israel-dulemala birga-dulabo (40) maná-gundii gusmalad. Canaán-yargi dulemar-bukwadse-mosmaladse we-maná gundii gusmalad.

<sup>36</sup> Ibmar-wilubsaed-gomer'gwensak nibirbake gued. Gomer-gwambeddi (10) ibmar-wilubsaed-efa-gwensak gued.

## 17

### *Akwasailagi dii noalid (Números 20:1-13)*

<sup>1</sup> Bela Israel-dulemar nega-dulesulidgan-Sin'ye-nugadgi nodegusmalad, Bab-Jehová-ega-igar-ukmaidba, obunnomai-obunnomai nadapgus-malad. A-sorbali, Israel-dulemar dii-gobega Refidim'ye-neg-nugadgi ambikudapmalad. Agi dii sated. <sup>2</sup> Degisoggu, Moisés'se sabsur egisdemarsunnad, ega sogdemalad:

—¡Anmarga gobega be dii udage!

Moisés dulemar-abin sogded:

—¿Ibiga sabsur be anse dii egise? ¿Ibiga Bab-Jehová-wilubdakte be sogmala?

<sup>3</sup> Ar Israel-dulemar uku-uku itomarsoggu, Moisés'gi uludmalad, sogdemalad:

—¿Ibiga Egípto-yargi be anmar-onosa? ¿Ukudbaburgwega be anmar-onosa? ¿Anmar-mimmigan-oburgwega be anmar-onosa? ¿Anmar-ibdurganmar-oburgwega be anmar-onosa?

<sup>4</sup> Geb degine, Moisés Bab-Jehová'se binnasur goted, ega sogded:

—Ar we-dulemarde, ¿igi an imakergebe? ¡Ar iche-napinad akwagi-makar an-oburgwemalanad!

<sup>5</sup> Bab-Jehová Moisés-abin sogded:

—Israel-dulemar-idu be nae. Israel-girmardummagan gwenna-gwenna beba be sedoed.

Nilo-diwar-bibyosad-gaapoled, be sedbaloed. Emigi be nadeen. <sup>6</sup> Horeb-yargi, akwa-dummad-walik an be-asabin gwisguoed. Akwa-dummad be bibyosale, agi dii aryodagoed, adi, dulemar a-dii gobmalagar.

Moisés, Israel-girmar-dummagan-e-dakbukwad-asabin deyob imaksad. <sup>7</sup> Moisés a-neg Meriba'ye onugsasad, ar ade, agi Israel-dulemar ulusad. Degine, a-neg Masah'ye onugsasbalid, ar ade, agi Israel-dulemar Bab-Jehová-wilubdaksamalad, deun sogsamargu: “¿Ar wede Bab-Jehová anmarba gudii, anmarba gudisuli?”

*Israel-dulemar      Amalec-dulemargi      bila-onosmalad*

<sup>8</sup> Amalec-dulemar, Israel-dulemargi bila-onogega Refidim'ye-neg-nugadse nadmalad.

<sup>9</sup> Agine, Moisés Josué'ga sogded:

“Bila-ononaega, machergan war-wargwen sue-sue be imake. Be nae, Amalec-dulemar-ebo be ur-wenae. Banedsega andi yar-dummad-birse Bab-Dummad-gaapoled argangi-gani an naoed.”

<sup>10</sup> Josué igi Moisés ega soge, aba imaksad, Amalec-dulemarbo urwenaded. Ar degidgine, Moisés, Aarón, degi, Hur, yar-dummad-birse nadmalad. <sup>11</sup> Moisés, e-sakwa onakwidele, Israel-dulemar-urwenanaidi, e-isdarmaladgi obitedamalad. Ar Moisés e-sakwa-odedele, Amalec-dulemar obitedamalad. <sup>12</sup> Ar Moisés-e-sakwa geggsdaed, degi, Moisés-sigega ega akwa amismalad. Moisés-sigisgua, Aarón, Hur-ebogwa Moisés'ga sakwa-gasmalad, wargwen sakwa-gwensaksik, baiddina sakwa-baidsikmo. Weyobi,

dad-argwanedse, Moisés-sakwa onakwar, nue-innikii gasmalad. <sup>13</sup> Weyob Josué, Amalec-dulemar-sordamargi es-suidgi-oburgwar nakwisad.

<sup>14</sup> Geb degine, Bab-Jehová Moisés'ga sogded:

“We-bila-onolesad gardagi narmak, adi, insadii gumalagar. Deginé, Josué’ga be sogbalo: ‘Amalec-dulemargi mer bar binsamalagala, an bela obelo-goed.’”

<sup>15</sup> Agi, Moisés Bab-Jehová’ga-ibmar-ogumakar-ukleged-aila sobsad. A-aila, “Bab-Jehová an-banderye onugsasad.” <sup>16</sup> Agi, Moisés sogded: “Bab-Jehová-negdakmaidgi Amalec-dule gwisgunonisoggu, Bab-Jehová, degisadegu, Amalec-e-wagan-danikidbali, egi bila-ononai gudoed.”

## 18

### *Jetro, Moisés’se atakapid*

<sup>1</sup> Jetro Moisés-e-saka, Madián’gi dule-irwa-Bab-Dummadse-goledga maid. We-Jetro’de, igi Bab-Dummad Moisés-bendaksa, bela wisgusad. Deginé, igi Bab-Dummad Israel-dulemar-bendaksabali, bela wisgusbalid. Deginbali, wisgusbalid, igi Bab-Jehová Israel-dulemar Egipto-yargi onosbali.

<sup>2</sup> Moisés Faraón’se-nadapidgi, e-saka-Jetro’se e-ome-Séfora barmisgusad. Jetro na e-sisgwa-Séfora e-neggi abingasad, <sup>3</sup> degine, Moisés-masmala-warbogwad abingasbalid.

Wargwen Gersón’ye nugad, ar ade, Moisés sogsa gusad: “We-yar-baidgi an we-yarginedsulid gudi-iyé.” <sup>4</sup> Baid-machigwadi, Eliezer’ye nugad, ar ade,

Moisés sogsa gusbalid: “An-bab-e-Bab-Dummad an-bendaknonikid, Faraón-es-suidgi an-onosad.”

<sup>5</sup> Moisés nega-dulesulidganba Bab-Dummad-yar-walik dulemar-oambikudapid. Ase, Jetro, Moisés-e-ome, degi, e-masmala-warbogwad nadegusmalad. <sup>6</sup> Jetro, Moisés-owisos gusad:

“Ani, an be-sak-Jetro, be-ome, degi, be-masmala-warbogwadmala, anmar bedakdanimadalad.”

<sup>7</sup> Moisés e-saka-abin noar gusad. E-abin dulluu imaksad, degine, degiteye-sogega ei-wagar usad. Sunmaksamargua, e-dordoneggi dogdemalad. <sup>8</sup> Agi, Moisés e-sakaga bela sogsad, igi Bab-Jehová Israel-dulemar-bendakega Faraón-imaksa, degine, igi Bab-Jehová Egipto-dulemar-imaksabali. Degine, igi igarba Israel-dulemar wiledani-gusmarbargua, Bab-Jehová Israel-dulemar-bendaksabali.

<sup>9</sup> Jetro Bab-Jehová Israel-dulemargi e-sabgued-nue-oyosgusadba, degine, Egipto-dulemar-ganguedgi Israel-dulemar-bendaksagusadba, bela-bela weligwar-itosad.

<sup>10</sup> Jetro sogded: “Bab-Jehová Faraón’gi, degi, Egipto-dulemar-ganguedgi, bemar-bendaksad. Degine, bemar-Israel-dulemar Egipto-dulemar-be-wiodimaladgi, Bab-Jehová bemar-onosad. A-ular, Bab-Jehová-e-nug odummolesun.

<sup>11</sup> ”Deginbali, Faraón dulemar-baisursunnagwadiyob bemar-imaksabalid. Ar emigindi, Bab-Jehová Egipto-dulemar-sabsur-imaksadba nue an wissunnad, we-Bab-Jehová, baigan-bab-dummadye-sogmaladba bur-dummadid.”

**12** Agi, Jetro ibdurgan-wargwen Bab-Dummadga-ogumakar-ukega susa gusad. Deginbali, Bab-Dummadga-ukbaliga, ibmarbaigan senonibalid. Geb a-sorbali, Aarón, degi, bela Israel-girmar-dummagan, Moisés-e-sakaba Bab-Dummad-asabin mas-gunnadmalad.

*Moisés, dule-igar-nabomalad onugsasad  
(Deuteronomio 1:9-18)*

**13** Banedgine, Moisés Israel-dulemarga igarmar-gwatirnanaid-nabogega signonikid. Ar ade, dulemar na gwatirismalale, Moisés'se wakdaradba degi-iirmakmai osedoddaed. **14** Jetro dakargu, Moisés arbaed-dummad imake, Moisés'ga sogded:

—¿Ar ibiga be bela we-arbaed be imake? Emide, dulemar bese wakudaryalaba iirmakmai osedod-damalad. ¿Ar ibiga bebi walagwen we-dulemarga be igar naboge?

**15** Moisés e-saka-abin sogded:  
—Ar ade, dulemar Bab-Dummadse igaramimalaga anse nonidamalad. **16** Na-ebo gachimakarmalale, anse nonidamalad, dakega, doa bur-nabir soge. Geb an Bab-Dummad-igargan-mamaid ega an sogdaed, degine, igi-Bab-Dummad we-igargangi anmar-odurdakmai an ega sogdabalid.

**17** Geb degine, e-saka-Jetro Moisés'ga binsaed ukded:

—We-be-deyob-imakedi, nuedsulid. **18** Ar ade, be gegsus daed, dulemar-bese nonidamarmogad gegsus damarmogad. Be-arbaed-imakedi begi obined. Bebi-wargwen bela be imakosurgoed.

**19** Binsaed-an-bega-ukoedi, nue be itogo. Bab-Dummad beba gudiguoed. Be-dulemar-anar Bab-Dummad-asabin be gwisguoed, bonigan-mamaid ega be sogoed. **20** Be-dulemar igar-mamaidgi be odurdako, degi, igar-mamaidba-imaked be odurdakbalo. Deginbali, ega be sogbalo, igi nanamalargebe, degi, ibumar imakmarbaloe. **21** Bedina, deyob be imakegala, neggweburgi dulemar-nabir-ibmar-imakmalad be suo:

Dulemar Bab-Dummad-dabee-nanadimalad,  
dulemar wagar-darbodasurmalad,  
dulemar ibmar-atursaaledgi mani-  
onosurmalad,  
a-dulemar be suoed.

Amar gwenna-gwennagwa, dulemar-  
miligwenad-e-dummadga (1,000) be  
imakoed,  
baigan dulemar-dulataled-e-dummadga  
(100) be imakoed,  
baigan dulemar-dulabo-gakambegwad-e-  
dummadga (50) be imakoed,  
degi, baigandi e-ambegwad-e-dummadga  
(10) be imakmogoed.

**22** "Wemala, dulemarga igar-nabodii gudoed. Igar-dummadile, bese senonikoed. Igar-  
bipigwardi, emar na nabomaloed. Weyobile,  
arbaed-dummad be imakosulid, ar wemala be-  
bendakmaloed. **23** Ar Bab-Dummad bega sogdibe,  
an bega-ibmar-sognaid be imakye, ar weyob be  
imakele, be unniguoed, degine, dulemarmoga,  
weligwaledgi na e-negse namarmogoed."

**24** Moisés e-saka-ega-soged itosad, a-sogedba  
bela imaksad. **25** A-ular, Moisés Israel-dulemar-

bur-nabir-ibmar-imakmalad susad.

Amar, dulemar-miligwenad-e-dummadga  
(1,000) onugsasad,  
baigan, dulemar-dulataled-e-dummadga  
(100) onugsasad,  
baigan, dulemar-dulabo-gakambegwad-e-  
dummadga (50) onugsasad,  
deGINE, baigandi, dulemar-e-ambegwad-e-  
dummadga (10) onugsasmogad.

**26** We-dulemar Israel-dulemarga igar-  
nabogedga degisadegu gudmalad. Igar-bur-  
dummagan Moisés'se sesdamalad. Igar-  
burwiganadi, emar na igar nabodamalad.

**27** Degi-neggusad-sorbali, Moisés e-sakaga sog-  
nai gualid, degimaloye. Degi, geb e-saka na e-  
negse gannar aligusad.

### **3. SINAÍ-YARGI BAB-DUMMAD ISRAEL-DULEMARBO IGAR MESISAD**

## **19**

*(19:1–24:18)*

### *Israel-dulemar Sinaí'se modapmalad*

**1** Israel-dulemala Egipto-yargi nii-warbaagus  
noalid-akale, nega-dulesulidgan-Sinaí'ye-  
nugadse modapmalad. **2** Refidim'ye-neg-  
nugadgi-bukwa-noargu, nega-dulesulidgan-  
Sinaí'ye-nugadse modapmalad. Agi, yar-  
asabin ambikudapmalad. **3** Agine, Moisés Bab-  
Dummadbo-abinguega yar-birse nakwisad. Agi,  
Bab-Jehová ese goted, ega sogded:

“Weyob Jacob-e-waganga be sogoed, Israel-  
dulemarga:

**4** ‘Be-sunnad be daksamalad,  
    igi an Egipto-dulemar-imaksa,  
    deGINE, igi an wese bemar-seali.

Igi sulubagi e-mimmigan-ogukuega, sabedgi e-  
    mimmigan-sakanba-gasa sesdae,  
    deyobiyob an wese bemar-senonikid.

**5** Degisoggu, ar bemar bela an-sogedba nanaele,  
    deGINE, an bemar-ebo igar-mesnaidba be  
    daele,  
    bemar dulemar-baiganba bur angadga  
    guoed.

Ar bela we-napneg angadsoggu,  
    bemarbina-bur-itogerba an guoed.

**6** Bela bemar dule-irwa-Bab-Dummadse-  
    gormaladga gumaloed,  
    be-dulemar islidikidbi angadga gumaloed.’  
        Deyob Israel-dulemarga be sogoed.”

**7** Moisés gannar Israel-dulemarse nonikid. Agi,  
Israel-girmar-dummaganse gochad. Geb deGINE,  
Moisés bela ega sogded, igi-Bab-Jehová ega igar  
uksa. **8** Geb deGINE, Israel-dulemar bela na balibi  
sogdemalad:

“Bab-Jehová anmarga-igar-uksad, a-sogedba  
bela anmar imakodo.”

Moisés dulemar-ega-sogsad Bab-Jehová’ga sog-  
nai gusad.

**9** Agi, Bab-Jehová ega sogded:  
“Nue be an ito, an bese mogir-guduregedba  
nonikoed, adi, an-bebo-sunmaknaid dulemar ito-  
geGA. Adi, deyob dulemar degisadegu begi bensuli  
gumalagar.”

Moisés dulemar-ega-sogsad gannar Bab-Jehová'ga sognai gusad. <sup>10</sup> Bab-Jehová Moisés'ga sogded:

“Emi, be Israel-dulemarse nao. Emi, degi, banedgi, Israel-dulemar an-nug-odummomalaga guakwaa isligwar-bukwa be imako. Deginbali, swilidik-guega mor na enukmarbalo, <sup>11</sup> degi, bela guakwaa ibapaagwadga ambikumalo, ar ade, ani, Bab-Jehová, ibapaase Sinaí-yargi an aidegoed. Bela Israel-dulemar an-dakmaloed.

<sup>12</sup> ”Melle dulemar yarse nakwemalaga, yar-dikarba be galu bela ebiris nasikoed. Deginbali, ega be sogo, we-yargi nue-binsaednikaa be damaloye, degine, melle a-yarse nakwemarbaloye, degine, melle a-yar-walikaa namaloye. Ar doa-dule a-yarse warmaksale, oburgwelegoye. <sup>13</sup> Dule-wargwensaale dule-oburgwilegoedse achaosulid. Ar dule-oburgwilegoedi, akwagi-makar oburgwilegoed, sigugi-makar imaklegodibe. Ar duledibe, ibmardurgandibe, wede dula-gudii imaklegosulid, oburgwilegedsegad. Unnila, dulemar sibadwawaad-machered-e-bebe-gollalirbi, yarse nakwenamaloed.”

<sup>14</sup> Moisés yar-birgi-gudiid aidenonikid. Agi, Moisés, Bab-Dummad-e-nug-odummomalaga, guakwaa isligwale dulemar-urbisad. Dulemardina, na e-mor enuksamalad. <sup>15</sup> Agi, Moisés dulemarga sogded:

“Guakwaa ibapaagwad-idu ambikumalo, degine, melle na be be-omese gormalo.”

<sup>16</sup> Ibapaa-gusadgi neg-oiboargu, mar-goledi bela-bela itoleged, degine, mar-dakarmakmaidi

bela-bela daklebalid. Yar-birgi, mogir-gudure naid. Gar-trompeta-binnasur-goted-itosmargua, bela-dulemar-bukwadi dobedba wawanmakdemalad. <sup>17</sup> Geb degine, Moisés bela-dulemar-bukwadi Bab-Dummad-ebo-abingunamalaga yarse sesad. <sup>18</sup> Sinaí-yalagi bela waa bupurmakmaid, ar ade, agi Bab-Jehová soo-abargi aidenonikid. Bela-bela waa yargi bupurmakmaisoggu, soo-saila-gasiiyob dakleged. Bela yar-siidi binnasur giglimaksiid. <sup>19</sup> Gar-trompeta-goledi aka bur bule gangumai gualid. Moisés sunmakdele, Bab-Dummaddi mar-goledyob abinsadaed.

<sup>20</sup> Bab-Jehová bur Sinaí-yar-matusulidse aidenonikid. Geb degine, Bab-Jehová Moisés'ga sogded, we-yar-matusulidse ese dagye. Agi, Moisés nakwisad. <sup>21</sup> Geb degine, Bab-Jehová Moisés'ga sogdebalid:

—Moisés, be aidenae. Dulemarga be sogna, galu-nagusadgi melle obakmalo, melle andakedgi binsamalo. Ar dulemar, deyob-obakele, bukidar burgwemaloed. <sup>22</sup> Ar dule-irwa-ansegormalad amba anse warmakmar-inigwele, naesan ise-bagagwar urukmalargebed. Ar degisulile, anse ogilolemogoed.

<sup>23</sup> Moisés Bab-Jehová-abin sogded:

—We-dulemar we-Sinaí-yarse nakwebiguosurmalad, ar be anmarga igar uksad, ‘galu be emakmaloye, ar ade, wede neg-islidikidga imaklegoye.’

<sup>24</sup> Bab-Jehová Moisés'ga sogdebalid:

—Be nae, be aidenae. Aarón'ga be sogna, beba yar-birse nakwedaye. Dule-irwa-ansegormaladdi, degi, dulemar-baigandi, melle anse

nakwedgi binsamaloye. Ar nakweye-sogmalale, anse sabsur-imaklemaloed, anse ogilolemaloed.

**25** Moisés yar-birgi-gudiidgi aidenonisunnad. Geb bela Bab-Jehová-ega-sogsad Israel-dulemarga sognonikid.

## 20

*Bab-Dummad E-Igar-Sogambegwad (10) uksad  
(Deuteronomio 5:1-21)*

**1** Bab-Dummad sunmakded, weyob sogded:

**2** “Ani an be-Bab-Dummad-Jehová gued. Bemar Egípto-yargi maiga-wilebukmargu, ani an bemaronosadid.

**3** Melle bab-dummad-baid an-asabin be nikumalo.

**4** Melle be ibmar-wilubgan sobmalo,

nibneggi ibmar-nikad-wilubgandibe,  
napneggi ibmar-nikad-wilubgandibe,  
demargi ibmar-nikad-wilubgandibe.

**5** A-ibmar-wilubgan-asabin dulluu be imakosur-malad,  
degeine, Bab-Dummadyob ese be  
golosurmalad.

Ar ade, ani an be-Bab-Dummad-Jehová gued.

An be-Bab-Dummad gadi-nobguedid.

Ar an dule-isganamar-isdarsunna-dakmalad  
sabsur-odurdakedid.

Deki, e-mimmigan, e-wagan,  
e-wagan-yokorbarmaladseg  
an sabsur-odurdakbalidid.

**6** Ar dulemar-an-sabmaladdi,  
dulemar-an-Igarmar-Mamaidba-nanamaladdi,

an bela-e-waganmar-danimaloed e-ibe nue-sabguedid.

<sup>7</sup> Melle be-Bab-Dummad-Jehová-nug yogasaar be obaro.

Ar dule yogasaar Bab-Dummad-nug  
obarisale,  
a-dule, Bab-Dummad-Jehová'se sabsur-  
odurdaklegedsegad.

<sup>8</sup> Obunnoged-ibagi be obunnogo,  
adi, a-ibagi, be Bab-Dummad-e-nug odummo-  
gegar.

Igi be-Bab-Dummad-Jehová bega Igar-uksa,  
aba be imako.

<sup>9</sup> Ibanergwa (6) be arbaaoed.

A-ibagangi bela ibmar-imakbied be imakoed.

<sup>10</sup> Ibagugledgindi (7), obunnoleged-ibad,  
be-Bab-Dummad-Jehová-e-nug-  
odummolegedid.

A-ibagi bipisaale be arbaosulid.

Be-machi, be-bunagwa,  
bega-arbaed-macheder, bega-arbaed-ome,  
be-moli-bebe-nikad-alugwasualed, be-moli-  
uayasuid,  
be-ibdurgan, a-ibagi, arbaosurmarmogad.  
Deginbali, dule-be-yarginedsulid be-negyagi-  
gudiid,  
a-ibagi, arbaosurmarmogad.

Ar obunnoged-ibagi igi be obunnomoga,  
beyobi bega-arbaed-macheder,  
debine, bega-arbaed-ome, obunnomarmo-  
goed.

<sup>11</sup> Ar ade, Bab-Jehová ibanergwa (6) arbasad.  
A-ibagangi we-ibmarmar obinnisad:

Nibneg obinnisad, napneg obinnisad, demar  
obinnisad,  
degi, bela agi ibmarmar-bukwadi obinnis-  
balid.

Geb degi, ibagugledgindi (7), Bab-Jehová obun-  
nosad.  
A-ulale, Bab-Jehová, ibagugledgi (7) ise-nued-  
binsasad.  
A-ibagi sogsad, we-iba, iba-islidikidye.

<sup>12</sup> Be-daedbali, be-bab-nug-odummodii, degi, be-  
nan-nug-odummodii be nanamalo.  
Adi, be-Bab-Dummad-Jehová we-napneg-  
bega-uknaidgi sereddi be megegar,  
degi, bela bega ibmar-nueganbi gugaligar.

<sup>13</sup> Melle be dule-oburgo.

<sup>14</sup> Melle be be-abirginsulid-ebo galagwensuli  
nanao.

<sup>15</sup> Melle be ibmar-atursao.

<sup>16</sup> Melle be gakansaar aimargi sunmako.

<sup>17</sup> Melle be dule-baid-ibmarbina be sogo:  
Dule-baid-negbina, dule-baid-omebina,  
dule-baid-mai-macheredbina, dule-baid-  
mai-omebina,  
dule-baid-moli-bebe-nikad-  
alugwasualedbina,  
dule-baid-moli-uayasuidbina.  
Bipisaale dule-baid-ibmarbina be sogo-  
sulid.”

*Israel-dulemar Bab-Dummad-dobee-itosomalad  
(Deuteronomio 5:22-33)*

**18** Bela Israel-dulemala e-sunnagwad margollomakmaid itosmargua, degine, gar-trompetabinnasur-goled itosmarbargua, deginbali, mardakarmakmaid daksamarbargua, degi, yar waa-moodo-siid daksamarbargua, Israel-dulemar nue-dabee itodmalad, wawanmakdemalad. Degisoggu, yargi bannabaa ambikusmalad. **19** Agi, Moisés'ga sogdemalad:

—Be anmarga sunmake, anmar be-itogoed. Bab-Dummaddi melle anmarga sunmako, abakale, anmar burgwialile.

**20** Moisés Israel-dulemar-abin sogded:

—Melle be dobgumar. Bab-Dummad bemar-wilubdakega bemarse nonikid, adi, bemar, degisadegu Bab-Dummad-dabee nanamalagar, adi, melle be isgumalagar.

**21** Israel-dulemardi, Moisés mogir-guduregedgi-Bab-Dummad-maidse-nadedi bannabaa dakbuk gusad.

*Bab-Dummadga-ibmar-ogumakar-ukleged-aila-igar*

**22** Bab-Jehová Moisés'ga sogded:

“Israel-dulemarga weyob be sage: ‘Nibneg-akale an bemarbo sunmaksad bato be daksamalad. **23** Melle bemar orgi-ibmar-sobaled, manigi-ibmar-sobaleddibe, be-bab-dummadga anyob be imakmalo.

**24** ” ’Bab-Dummadga-ibmar-ogumakar-ukleged-aila-sobega, anga be napa sobmaloed. A-ailagi be we-ibmarmar ukmaloed:

Be-sibad-wawaadmar, sibadmar, degi, be-moli-bebe-nikamalad,  
anga be ogumakar ukmaloed.

A-ailagi be anga ibmarmar-ukmaloedi, dulemar-e-isgued-eliедga uklegoed.

Deginbali, a-ailagi be anga ibmarmar-ukmaloedi,  
bemar-anbogwa gwenatigwar-gudii  
gumalaga,  
degi, bemar na gwenatigwar-gudii gumalaga  
uklebaloed.

” ’Bia an-nug ebinsalebi an abegoe, ase an nonikoed, agi ise-nued an begi binsanonikoed.

<sup>25</sup> Ar bemar anga ibmar-ogumakar-ukleged-aila-akwa be sobbiele, unnila be akwamar-sobarsulid urbe-urbe be imakmalo, ar ade, bemar, akwa esgorogi sobdele, wede bar ibmar-ogumakar-ukleged-aila-nuedga guosulid. <sup>26</sup> Dagine, anga ibmar-ogumakar-ukleged-aila melle arsan-nika imako. Ar bemar agi nakwialile, be-abgan daklego-itole.’ ”

## 21

### *Maigan-akwed-igar (Deuteronomio 15:12-18)*

<sup>1</sup> Bab-Jehová Moisés'ga sogdebalid: “We-Igarmar Israel-dulemarga be ukoed: <sup>2</sup> ‘Be Hebreo-dule-mai baksale, unnila, bega birganergwa-arbaega (6) be imakoed. Birgagugledgi (7) be ollor-imakoed. We-dule, e-arbasadgi, bipisaale gwen bennuklegosulid.

<sup>3</sup> ” ’We-mai-baklesadi, bese omesuli nonikile, walagwen gannar naoed. Ar bese ome-nikanonikile, e-omebo gannar naoed.

<sup>4</sup> ” ’Mai-e-ibed e-maiga ome-uksale, ome ega machimala-baksale, bunamala-baksardibe, ome,

degi, e-mimmigan, e-mai-ibedgadga guoed. Maidina, walagwen gannar naoed.

<sup>5</sup> ” 'Ar mai, na e-ibed-sabedbali, na e-ome-sabedbali, degi, na e-mimmigan-sabedbali, sogele, an yapa naye, <sup>6</sup> ar adi, e-ibed, dummagan-igar-nabomalandse e-mai-sedoed Geb yawagaksedibe, yawagak-dikarsedibe, sedoed. Agi esgoro-swichwigwadgi e-uaya udgoed. Geb agi, a-dule ibed-e-maiga degisadegu gunonisunnoed.

<sup>7</sup> ” 'Ar dule-wargwen na e-bunagwa maigaguega manigi uksale, we-bunagwa-ollor-imaklegega, mai-macherganyob imaklegosulid.

<sup>8</sup> ” 'Dule-wargwen-bunagwa-baksad eginsur-bunagwa-dakele, nikubisulile, sunna Israel-dule-baid nabir manigi bunagwa-onogega imakoed. Nikubisurgussogg, bipisaaggwale, Israel-dulesulidga manigi ukosulid.

<sup>9</sup> ” 'Dule bunagwa-baksadi, e-machi-ebo-nikuega ega ukele, na e-sisgwayob we-bunagwasedii guoed.

<sup>10</sup> ” 'Dule bunagwa-maiga-baksadi, a-bunagwanikusale, a-sorba, geb ome-baid-nikunonibalile, we-bunagwa-idualedga:

Mas-ega-uklegedi, amba deyob ega ukdii guoed.

Mor-ega-uklegedi, amba deyob ega ukdii gubaloed.

Degine, amba ebo gudiidgine, ese gordii gubaloed.

<sup>11</sup> ” 'Ar e-sui bunagwaga we-ibmar-sogbaagwad imaksulile, bunagwa sunna na e-itollegedba nabier naoed. Onolegega, bipisaale dule-baid we-

bunagwa-anar bennukosulid, manigginsuli binsa na e-itolegedba nooed.’ ”

### *Apor-imakmalad-Igar*

<sup>12</sup> Bab-Jehová Moisés'ga sogdebalid: “Dule-wargwen dule-baid-sabsur-naibisasadba oburg-wisar, we-dule, oburgwilegoed.

<sup>13</sup> ”Ar dule-emar-oburgwisad yamo-imaksasulile, Bab-Dummad-sogedba burgwisale, we-dule, bega an neg-sorba-sogoedse, dukunaoed.

<sup>14</sup> ”Ar dule, sae-itogedba dule-baid-oburgwisale, anga-ibmar-ogumakar-uklegedailase dukunadele, we-dule, amba be sunaedsegad, degine, oburgwilegoed.

<sup>15</sup> ”Dule e-bab-naibisasale, e-nan-naibisasdibe, we-dule, oburgwilegoed.

<sup>16</sup> ”Dule, dule-baid-gasale, dule-baidga manigi dule-galesad-uksale, igidibe, amba e-walik-gales-sii daklesdibe, we-dule-emar-gasad oburgwilegoed.

<sup>17</sup> ”Dule e-bab-ukabsasale, e-nan-ukabsasale, we-dule, oburgwilegoed.

<sup>18</sup> ”Na ebo-urwenaidgi, dule akwagi-makar dule-baid-naibisasale, igidibe, argangi sabsur-sarsosadgi naibisasdibe, oburgwissulile, ar gasgindi mesisale, <sup>19</sup> we-dule-naibigusad suar-gaapoledgi nabir nanagusardina, geb agi soglegoed, we-emar-naibi-imaksadi oburgwilegosurye, baisurye. Deyob soglegoinigwele, dule-emar-naibi-imaksad, bela ega inadi bennukoed, degine, arbassulid-nukad bela bennukbaloed.

**20** "Dule suargi na e-mai-macheder-sarsosale, e-mai-ome-sarsosdibe, degidba oburgwisale, we-dule sabsur-odurdaklegoed. **21** Ar e-mai-sarsolesad, ibagwenadgi, ibabogindibe, nabir ugakgusale, we-mai, e-ibedgadsoggu, e-ibed sabsur-odurdaklegosulid.

**22** "Machergan urwenanaidgi ome-gurginnikad-naibisasale, ei igarba-mellegega imaksale, ar omedi dogdar akar-gussulile, e-sui igi-mani egi gadagoedba, dule-ome-sarsosad deyob bennukergebed. Dulemar-ega-igar-nabomaland e-sui-mani-nug-egisnaid nabir-itomalale, deyob imaklegoed.

**23** "Ar ome apor-naibigusardi, weyob imaklegoed: Ome-burgwisar, dule oburgwilemogoed.

**24** Dule, ome-ibe ibya-nailik naibisasale, ibyanailik ei naibisalemogoed. Dule, ome-ibe nugar-gagwen bichisalnugar-gagwen ei bichilemogoed. Dule, ome-ibe argan-nailik naibisasale, argan-nailik ei naibisalemogoed. Dule, ome-ibe nag-wargwen naibisasale, nag-wargwen ei naibisalemogoed. **25** Dule ome-ogumaksale, ogumaklemogoed. Dule, ome-naibisasale, deyob naibisalemogoed. Dule, ome-sarsosale, deyob sarsolemogoed.

**26** "Dule na e-mai-macheder ibyagi-sarsosale, e-mai-omegwa-ibyagi-sarsosdibe, ei ibya onosale, e-ibed ei-ibya-gwagwen-onosad-ular, e-mai-ollor-imakoed.

**27** "Ei nugar-gagwen-bichisale, e-ibed ei-nugar-bichisad-ular, e-mai-ollor-imakoed."

### *Binsa nabir naibigumaland-Igar*

**28** "Moli-bebe-nikad-macheder dule-machederdi-yolesale, omegindibe, degidba,

dule-oburgwisale, we-moli, akwagi-makar oburgwilegoed. E-san, gullegosulid. Moli-e-ibeddi oakalolegosulid.

**29** "Ar moli-ibed bato wisilegusgu moli-bebenikad-macheder dulemargi-yoledigua, degine, e-ibed gwen edichasuli, we-moli dulegi yoledibe, dule-oburgwisale, we-moli akwagi-makar oburgwilegoed. Geb moli-ibed, akwagi-makar oburgwilemogoed.

**30** "Deger-inigwele, moli-bebe-nikad-ibed na san-bendakegala, mer oburgwilegega, egi-mani-galegoed, bennukoed.

**31** "Moli-bebe-nikad machi-gwensakgiyoledibe, bunolo-gwensakgindibe, amba weigar-maidba imaklegoed.

**32** "Ar moli-bebe-nikad-macheder mai-machederedgi yoledibe, mai-omegindibe, we-moli, akwagi-makar oburgwilegoed. Degin, moli-ibed mani-gwadulagwen-gakambe (30) mai-ibed-bennukoed.

**33** "Dule-wargwen dia egaar sisale, igidibe, yaadummad dii-sigega akwisdibe, a-yaan edissuli sisale, agi moli-bebe-nikad-alugwasuaed argwachale, moli-uayasuid-argwachadibe, **34** dia-ibed moli-ibed-bennukoed, geb degi, ibmar-dulaburgwisad suoed.

**35** "Moli-bebe-nikad-wargwen baid-moli-bebenikad-macheder-oburgwisdibe, moli-dulad manigi uklegoed, we-mani na ebo negabar mimioed, degine, moli-burgwisad-e-san negabar mimimarbaloed.

**36** "Ar dule wisirdi, we-moli-bebe-nikad-machedered gadi-urwe, degite, e-ibed moli-gwen-edichasuli, moli-gadi-urwed-ibed, moli-bebe-nikad-machedered-burgwisad-ibedga moli-bebe-nikad-machedered-dulad ega wargwen ukoed. Moli-gadi-urwed-ibed, moli-burgwisaddi susunnoed."

## 22

### *Ibmar-akar-gusar bennuklegoed-Igar*

**1** "Dule, moli-bebe-nikad-alugwasualed-wargwen atursasale, sibad-wawaad-atursasdibe, geb oburgwisdibe, igi, manigi-eksadibe, moli-atursasad-ular, moli-bebe-nikad, walatar e-ibedga ukoed.

Sibad-wawaad-anardi, sibad-wawaad-walabake ukoed.

**2** "Dule-atursaed mutik ibmar-atursanai-daklesale, agi onaabisalesale, degi, burg-wenonikile, we-dule-ibmar-e-ibed, dule-oburgwissuliyob daklegoed.

**3** "Ar ibmar-ibed ibgin dule-atursaed-oburgwisardi, egi ataklegoed, we-dule, dule-oburgwisye.

"Dule-ibmar-atursasad, ibmar-atursasad-wilub bennukergebed. Ar ibmar-atursasad-bennukega mani satele, bennukega, maiga-guega na dukin manigi ukoed.

**4** "Ibdurgan-atursalesad amba-dula dule-atursasad-neggi-gudii daklealile, dule-ibdurgan-atursasad ilabo-wilub ukoed:

Moli-bebe-nikad-macheder-  
alugwasualeddibe,  
moli-uayasuiddibe,  
sibad-wawaaddibe,  
ilabo-wilub e-ibedga ukoed.

**5** "Dule, e-ibdula gagan-maega nainuse sesale, uva-digalesse sessdibe, geb e-ibdurgan, dule-baid-nainugi gagan-masale, ibdula-ibed, e-nainugi-gwagmar-weleged-bur-nuegangi nabogoed.

**6** "Dule-wargwen ikomar-ogumakega soo-ogasale,  
we-soo orosgi-dakleged-trigo-digar-naidse  
warmaksale,  
igi, trigo-danar-weles-bukwadse warmak-sale,  
igi, nainugi-ibmar-digarnaid ogumaksadibe,  
dule-soo-ogasad, bela dule-baid-ibe-ibmar-ogumaksad bennukoed.

**7** "Dule, nuedgi dule-baidga na e-mani, ega-sabogega uksadibe, e-ibmar-nued-gargerbad ega-sabogega uksadibe, we-dule-baid-neggi we-ibmar atursalesale, dule-ibmar-atursasad-galesadi, ilabo-wilub bennukoed.

**8** "Ar dule-ibmar-atursasad-daklessulirdina, dule-neg-ibed dumman-igar-nabomalad-asabin seledoed, adi, daklegega, abakale e ibmar-atursasdibe, atursassurdibe.

**9** "Dulemar-ebogwad sogmalale, we-ibmar angadye:

Moli-bebe-nikad-alugwasualeddibe,  
moli-uayasuiddibe, sibad-wawaaddibe,  
mordibe, ibi-ibmar-yoggusaddibe.

We-dulemar-ebogwad, dummagan-igar-nabomalad-asabin namaloed.  
Ar doa bur ibmar-atursas dakledagoe,  
a-dule, ilabo-wilub dule-baid-bennukoed.

**10** "Dule-wargwen bensulidgi dule-baidga ib-durgan uksale:

Moli-uayasuid ega akwega uksadibe,  
moli-bebe-nikad-alugwasualeddibe,  
sibad-wawaaddibe,  
we-ibmar-ega-eksad burgwenonikile,  
naibigunonidibe,  
dule-gwen-daksasuli ei atursalenonidibe,

**11** we-dule ibmar-e-ibedga-sogoed:  
'Napira Bab-Jehová-nuggi ise-sogar  
an bega sogye, ibmar-bega-akwega-be-anga-eksadi, an be-ibe gwen  
oakalossurye.'

"Ibdula-ibedi, dule-ega-ibmar-soged nabir  
itogele, we-dule-ibmar-akwisad ibmar-bennukosulid.

**12** "Ar dule-ibmar-akwed-wagab ibmar-atursalesardi, adi, na e, ibdula-ibed-bennukoed.

**13** "Ibdula-ega-uklesad ibdula-sapurbalidse ichimaklesale, mer-bennukegala, ibdula-burgwisad-e-goa ibdula-ibedga oyogergebed.

**14** "Dule-wargwen dule-baidse egichisdibe, ega ibdula-wargwen wis udagwerye, ibdula burgwenonikile, igi, e-ibed-daklesulidgi ibdula-naibi-gunonikile, dule-ibmar-wis-egichisadi, e-ibed-bennukergebed.

**15** "Ar e-ibed-wagab ibdula burgwisale, naibi-gusdibe, adi, bennukosulid.

”Manigi-bennus ebunairdi, bar bennukosulid, ar a-mani bato ega bennuksayob gusad.”

*Dule-baiganbo damaloed-Igar*

<sup>16</sup> “Dule-wargwen yagwa-amba yoo-sui-niku-gudiidgi dodosale, ar gusgu ome-nikued-igar-maidba ome-e-babga-mani-ukleged ukoed, degine, nikubaloed. <sup>17</sup> Bunagwa-e-bab yapa ega sui-ukele, amba degite, we-dule gusgu yagwa-bennukleged-igar-maidba manigi yagwa-e-bab-bennukergebed.

<sup>18</sup> ”Melle be ome-in-a-isgana-imaked, dula-gudii imako, oburgwemalo.

<sup>19</sup> ”Dule ibdurganbo galagwensur guele, we-dule, oburgwilegoed.

<sup>20</sup> ”Bab-Jehová’garbi ibmar-ogumakar be ukoed. Ar degisulile, dule bab-dummad-baiganga ibmar-ogumakar-ukele, a-dule, oburgwilegoed.

<sup>21</sup> ”Dule-be-yarginsulid melle sabsur be imako, degine, melle be wiobalo, ar ade, bemar Egipto-yargi be-yarsulidgi be gudii gusmogad.

<sup>22</sup> ”Omegan-ei-sui-burgwismalad, degine, mimmigan-babgan-sated, melle be sabsur-imakmalo. <sup>23</sup> Ar be amar sabsur-imakmalale, e-bendakega anse gollarmalale, an amar-bendakega ese naoed. <sup>24</sup> Degin, an nue-ise-urwedgi, es-suidgi sabsur-be-odurdakar an be-oburgwemaloed. Ar agine, be-omegandi sui-sate gumaloed, be-mimmigandi bab-sate gumaloed.

<sup>25</sup> ”Dule-wileged-an-dulamar-abargi-gudiid begi mani-gasale, gannar bega ukbaloye sogsale, melle be dulemar-mani-ukmaladyob damalo, degine, melle egi be mani-onakmai gumarbalo.

**26** "We-dule-wileged ega be mani-uksad-anar bega e-mordummad uksale, sedogusale, gannar ega e-mordummad be ukoed. **27** Ar ade, neg-diopigwadgi yoega, unnila we-morbi-nikad. Ar degisulile, ¿ibi-morgi atuosunna? Dule-wileged e-bendakega anse gollalile, bendakega an ese naoed, ar ade, an dulemar-wiledakdaed.

**28** "Melle bela-bela sabsur Bab-Dummadgi ichakwaa sunmako, degine, melle dule-be-neggwebur-semaid be ukabsao.

**29** "Melle be ibmar-gwag-gebe-welemalad, degine, vino-gebe-egurelemalad Bab-Dummadga-uksuli gumalo.

"Be-machi-sailagined anga be ukmarbalo.

**30** "Amber deyobbalid, moli-bebe-nikad-macheredsailagined, degine, sibad-wawaad-macheredsailagined, amba anga be ukmarbaloed. We-ibmar-durgan sunna ibagugle (7) na e-nan-walik gudii gued, ibabaabakgus-gwalulesad-sorbardi (8), anga be ukoed.

**31** "Bemala dulemar-islidikid-anga-uklesmaladga guoed. Ibdula-sapurbarmalad be-ibe sapurgi ibdula-oichimaksale, melle a-ibdula-e-san gunmalo. A-e-sanmala achuga be ukmaloed."

## 23

### *Ibmar-innikii-imakmalad-Igar*

**1** "Mer gakansaar be ibmar sogo. Emargi gakansaar yolegega melle dule-isgana-ebo be igar nabogo.

**2** ”Melle dulemar-bukidar-ibmar-isgana-imakmaladyob be ibmar imako. Igar-nabolenaidgi dule-bukidar-sogmaladba melle be binsaed galemalo. Dule-bukidar igar-innikisulidgi-yolenai be dakele, melle eba be dao. Bedi igar-innikigwadba be imako.

**3** ”Dule-wilegedga-igar-itolenaile, wileged-ular, melle be, e-ibmar-sognaidba, eba be nai guo.

**4** ”Moli-bebe-nikad-alugwasualed yoggus-gudii be dakalile, moli-uayasuiddibe, amba be-isdaradgadile, gannar e-ibedga be uko.

**5** ”Melle be dule-isdar-be-daked-bendaksuli be guo. E-moli-uayasuid ibmar-ichesur-semaidba aimukud be dakele, e-moli be bendakoed, ibmar-e-birgi-bukwad ega be odegooed.

**6** ”Dule-wilegedga igar-nabolenaidgi, ega igar-maidba be imako, melle egi be yogasaar yoledii guo.

**7** ”Binsa-dulemargi-gakansaar-yolemaladgi be bangumar.

”Degin, melle binsa dule-ibmar-oakalossulid-oburgwega be imako. Degi, melle dule-nued-daed okalobalo. Ar ade, dule-ibmar-oakalosad an sabsur-odurdakedsegad.

**8** ”Melle dulemarse manigi be binsaed galego. Ar ade, manigi-bakleged be-binsaed gaoed, bar inniki-binsae be-imakosulid. Deginbali, dule-igar-nabomaland, igar-itonaidgi, dule-ibmar-oakalossulidgi-aibinega imakbalid.

**9** ”Melle be dule-be-yarginsulid sabsur-imako, ar ade, bemarmoga, Egipto-yargi, be-yarsulidgi be gudii gusmogad. Ar bato bemar wismalad, yarbaidgi-gudiir, wede igi-itolege.”

*Obunnoleged-igarmar*

**10** "Birganergwa (6) be ibmar digoed, degi, birganergwa (6) be ibmar webaloed.  
**11** Birgagugledgindina (7) melle be ibmar bar digo. Napa-obunnogega be imakoed, adi, dule-wilemalad a-ibmar gunmalaga, degi, ibmar-durgan-sapurbarmalad, a-ibmar-obinoed gunmarmogagar.

"Amba deyob, be-uva-digaled, degi, be-olivo'mar-digaled, be imakbaloed.

**12** "Ibanergwa (6) bela be-ibmar-imaked be imako, ibagugledgindina (7), be obunnogoed, adi, be-moli-bebe-nikad-alugwasualed, degi, be-moli-uayasuid, obunnomalagar. Deginbali, be-maigan, degi, dule-be-yarginedsulid, gannar gangumalagar.

**13** "Bela an bemarga ibmar-sogsadba be namanalo.

"Melle bab-dummagan-baiganse be gormalo, melle bipisaale baid-bab-dummad-nug be bimalo."

*Birga-irba sogapaa iba-dummagan-onoleged-Igar*

(Éxodo 34:18-26; Deuteronomio 16:1-17)

**14** "An-nug-odummogega, birgagi sogapaa be anga iba onogoed.

**15** "Madu-Inasulid-Iba be onogoed. A-ibagi, ibagugle (7) madu e-inasuli be gunnoed. Ar igi bato idu an bemarga sogsa gusa, deyob be gunmaloed. Abib-niigi be iba onogoed, ar ade, a-niigi Egipto-yargi be noar gusmalad. Dule anse arganagwabi gwen nonikosulid. Anga ibmar sedagergebmalad.

**16** "Gebe be ibmar-gwag-wealir, Ibmar-Gwag-Gebe-Weleged-Iba be onogoed.

"Deginbali, bela be-nainugi be arbasad, na be bela-ibmar-wesadgi, birga-bergusar, Ibmar-Gwag-Napi-Weleged-Iba be onobaloed.

**17** "Bela machergan, birgagi ilapaa, Bab-Jehová-Bur-Dummad-asabin ambikunonimaloed.

**18** "Bemar anga ibdurgan-ogumakar-ukalile, melle e-abe madu-ina-nikad-ebo-mesa be anga ukmalo. Degine, ibmar-gwallu ibagi-be-angaukmalad, melle banedga be osabogo.

**19** "Be-nainugi be-ibmar-gebe-weleged-burnuegan, be-Bab-Dummad-Jehová-negse be sedergebed. Sibad-e-mimmi melle e-nan-nunisgi be duo."

### *Bab-Jehová-e-baliwitur      Israel-dulemar-idumai gusad*

**20** "Israel-dulemar, nue be itomalo. An-baliwitur bemar-iduega an barminaid, adi, igarba bemar-edarbenadapguega, degine, yar-guakwa-an-bemarga-nasiksadse bemar-sedegar. **21** A-baliwitur nue be itomalo, a-sogedba bemar nanadii guo. Ar ade, an-nuggi ibmar-imakdisoggu, melle a-baliwiturgi be gwisgudii gumalo. Ar ade, bemar-isgued, a-baliwitur, ighbarsaye bemarga sogosulid. **22** Ar nue a-sogedba be nanadimalale, an-bemarga-bela-ibmar-sogsadba be damalale, dule-be-isdardakmalad-e-isdaradga an gumogoed, degine, dule-begi-gwisgumaladgi an gwisgumogoed.

**23** "An-baliwitur bemar-idu nadapguoed:

Amorreo-dulemar-yalaganse,

Het-dulemar-yalaganse,

Ferezeo-dulemar-yalaganse,  
 Canaán-dulemar-yalaganse,  
 Heveo-dulemar-yalaganse,  
 degi, Jebuseo-dulemar-yalaganse, bemar-  
 sedoed.

We-dulemala bela an obelogoed.

**24** "Melle we-dulemar-sunnasurdamaladba be  
 damarmogo. Melle e-bab-dummagan-asabin  
 be yokorgi-sindigar sigmalo, degine, melle e-  
 nug odummomarbalo. Bur e-bab-dummagan-e-  
 wilubgan-sobarmalad be osulogoed. E-akwa-e-  
 bab-dummadganga-imakmalad ei be mamaroed.

**25** "Be-Bab-Dummad-Jehová-e-nug be  
 odummogo. Geb degine, Bab-Jehová bega mas-  
 obinagwar, degi, dii-obinagwar ukoed.

"Bemar uellesuli an be-imakmaloed.

**26** "Degin, sereddi-mai an be-imakmarbaloed.  
 Be-yargine, siamar gurgin-nika-gudiir mellegega  
 an imakosulid. Bela omegan sikwi-bakedbi gu-  
 maloed.

**27** "Neggweburmargini-bemar-naoedgi, e-  
 dulemar bemar-asabin bela-belad-gwayemalaga,  
 surbinsa-itomalaga, degi, be-asabin-  
 duurmakega, an imakoed.

**28** "Bemar-nadapid-idu bulu-barminaiyob  
 an imakoed, adi, igi bulu-idu dulemar-  
 duurmakdedamala, deyob bemar-asabin Heveo-  
 dulemar, Het-dulemar, degi, Canaán-dulemar  
 bemar-idu duurmakdemaloed. **29** We-dulemar,  
 birgagwengi yog-onoar an bemarga imakosulid,  
 adi, melle napa binsa-wilenai guegar, degi,  
 ibdurgan-sapurbarmalad melle yaisur mergumai  
 gugaligar. Ar degile, bemar-naibisamalo-itole.

<sup>30</sup> Geb bemar dula-bukidar-gusadse, degi, yarakwegala na be unnigus-itomaladse an wedulemar binna-binna bemarga onomai an imakoed.

<sup>31</sup> "Be-yar-abingumaloedi, weyob an bemarga nasikoed:

Demar-Ginnidye-nugad-naid-akar,  
Filistea-dulemar-demar-naidse,  
degine, Nega-dulesulid-akar,  
diwar-Éufrates-maidse, an nasikoed.

Dulemar-we-yargi-bukwamaladgi-  
nakwed an be-imakoed.

We-dulemar bela be-asabin be onogoed.

<sup>32</sup> "Melle we-dulemar-ebo be igar-mesdii nanamalo, degine, e-bab-dummagan-ebo be igar-mesosurmalbalid.

<sup>33</sup> "Deginbali, be-yargi we-dulemar be obegosurbalid. Ar be obesmalardi, angi isguega be-imakmaloed. E-bab-dummagan-e-nugodummogega be-imakmaloed."

## 24

### *Bab-Dummad-Igar-Mesisad bargindilenaid*

<sup>1</sup> Bab-Jehová Moisés'ga sogded:

"An-maidse anse be nakweda. Beba be Aarón, Nadab, degi, Abiú be sedago. Degi, Israel-girmardummagan-dulapaa-gakambe (70) beba be sedabalo. Wemar angi bannaba ambikumaloed, agi yokorgi-sindigar ambikumaloed. <sup>2</sup> Bebi unnila be anse warmakoed. Israel-dulemar-selearsurmaladdi, nakosurmalad, degi, anse warmakosurmalbalid."

<sup>3</sup> Moisés nade gusad. Bab-Jehová-bela-ega-ibmar-sogsad, degi, igarmar-ega-uksabalid, bela

dulemarga sogdapid. Bela dulemala dule-wargwennayobi Moisés-abin-imakdemalad:

“Bela Bab-Jehová-ibmar-sogsadba anmar ibmar imakmaloye.”

<sup>4</sup> Geb degine, Moisés bela Bab-Jehová-ibmar-sogsadi narmaksad.

Moisés wakudaryalaba gwisgualid. Yar-dummad-naba Bab-Dummadga-ibmar-ogumakar-ukleged-aila sobsad, degine, akwamar-islidikid-gwaambe-gakabo (12) urbisbalid. A oyonaid, gwa-gwagwenadi, Israel-dulemar-sogambe-gakabogwad-e-wilubgan (12) guye.

<sup>5</sup> Geb, Moisés moli-bebe-nikad-machergan-oburgwemalaga Israel-sapingan barmisad. Amolimar Bab-Jehová'ga ogumakar uksamalad, degi, gwenatigwar-guega molimar-sapingana ega uksamarbalid. <sup>6</sup> Moisés molimar-abe-negabar susad, nog-dummagangi sisad, baid-negabaladdi Bab-Dummadga-ibmar-ogumakar-ukleged-ailagi misad. <sup>7</sup> A-sorBALI, Moisés dulemar-Bab-Dummad-ebo-Igar-Mesisad-garda susad, geb, dulemarga absoded. Dulemar abin-sogdemalad:

“We-igar-maid-sogedba, degi, bela we-Bab-Jehová-anmarga-sogsadba anmar daoye.”

<sup>8</sup> Geb degine, Moisés abe susad, dulemar-bukwadgi misad. Geb sogded:

“Bab-Jehová weyob bemarga sogsadbali, we-abe, Bab-Jehová-bemar-ebo-Igar-Mesnaid-e-wilubganad.”

<sup>9</sup> Moisés, Aarón, Nadab, Abiú, amar yar-birse nakwidmalad. Wemarba Israel-girmardummagan-dulapaa-gakambe (70) eba yar-birse

nakwidmarmogad. <sup>10</sup> Agi, amar Israel-e-Bab-Dummad daksamalad: E-nag-urbali, zafiro-akwabir-nuedyob, bela swilidič mogir-ara-ara-daklegedyob napa naid. <sup>11</sup> Degite, wemar-Israel-girmar-dummagan Bab-Dummad-daksamar-inigwele, Bab-Dummaddi oakalossulid. Amba dula gudii gusmalad.

<sup>12</sup> Geb degine, Bab-Jehová Moisés'ga sogded:

“Yar-birse anse be naknao, agi be an-edarbo. Agi an-Igarmar, degi, anba-bemar-nanamaloed-Igar an bega akwa-matargwagi-narmakar ukoed, adi, a-Igarmargi be dulemar-odurdakegar.”

<sup>13</sup> Geb degine, Moisés, Josué-ebo Bab-Dummad-yarse nakwid gusad. Josué'de Moisés-bendakedid.

<sup>14</sup> Moisés Israel-girmar-dummagangardi sogded:

“Anmar bemarse-gannar-nonikidse, wegi be anmar-edarbemalo. Aarón, Hur-ebogwa bemar-abargi gudii gumaloed. Ar bemar ibmar-egisbimalale, wis bemar boni-nikuardibe, wemar-ebogwadse be idakmaload.”

<sup>15</sup> Geb degine, Moisés yar-birse-nakwidgua, a-yala mogir-ena signonikid. <sup>16</sup> Agine, Bab-Jehová-e-gangued-yeerdakleged yar-Sinaígi aidenonikid. A-yala, ibanergwa (6) mogir-ena sigisad. Ibagugledgine (7), Bab-Jehová mogir-imbaba Moisés'se gornonikid. <sup>17</sup> Israel-dulemar Bab-Jehová-e-gangued-yeerdaklegedi, yar-birgi-soobinnasur-gwabunyemaiyob dakmalad. <sup>18</sup> Moisés mogir-imbaba dogded, yar-birse nakwided. Moisés yar-birgi iba-dulabo (40) ibginedba, degi, mutikidba gudii gusad.

## 4. BABSE-GOLED-NEG-SUNNA- SELEGED-SOBLEGOED-IGAR

**25**

*(25:1–31:17)*

*Bab-Dummadse-goled-neg-sunna-selegedga  
ibmar-ukleged*

*(Éxodo 35:4-9)*

<sup>1</sup> Bab-Jehová Moisés'ga sunmakded, ega sogded:

<sup>2</sup> “Israel-dulemarga be sogo, anga-ibmar-ukega  
be ibmar weemaloye. Bela na e-ulubgi-ibmar-  
ukbi-itogedba, na ukmaloye. <sup>3</sup> We-ibmarmar-  
uklegoed be abingaoed:

Olo, mani, esgoro-gordikid,

<sup>4</sup> nirbadub-arad, nirbadub-suir-akwagiid,  
nirbadub-ginnid,

lino'dub-nued, sibad-e-absarmar,

<sup>5</sup> sibad-wawaad-machered-e-ukamar-  
ginnidgi-odolegaled,

ibdurgan-uka-nuegan,

urgomar-acacia'ye-nugad.

<sup>6</sup> Olivo-gwallu gwallumar-ogaegar.

Ina-wawadikid, olivo-gwallu-nugsaledgi-  
ebulegedba oburegar.

Ina-wawadikid, ina-wawadikid-  
obupurmaklegedba oburegar.

<sup>7</sup> Akwamar-nuegan-ónice'ye-nugmalad,  
degi, akwa-nuegan-bamalad, mor-efod'ye-  
nugad-birgi nasikegar,

degi, mor-binasgargi-nasiklegedgi nasikegar.

<sup>8</sup> Geb anga anse-goled-neg be sobmalo.

"A-abargine an gudii guoed. <sup>9</sup> Ar igi bela an bega oyogoe, a-sunnagwad be dulemar-anse-goled-neg-sunna-seleged be soboed, degi, a-yagi bela ibmar-ebuleged a-sunnagwad be sobbaloed."

*Bab-Dummad-Dulemarbo-Igar-Mesisad-Ulu-soblegoed*

(Éxodo 37:1-9)

<sup>10</sup> "Deginbali, ulu be sobbaloed.

We-ulu-sobega, urgo-acacia'ye-nugad be ebugoed.

E-sugued, achaatar-nika be soboed,  
e-matardungued, achapaa,  
degi, e-nibgued, achapaabar.

<sup>11</sup> Olo-sunnabi uluyaba ebiris be nasikoed,  
degi, ulu-asgine, olo-sunnabi ebiris egi be nasikbaloed.

Deginbali, birgi, bela-ebiris e-mullugwad olobi be nasikbaloed.

<sup>12</sup> "Agala, olua-dummagan-gwabake-sobega or be duoed. Ulu-e-dikar-bergunaid-sogbakegwadgi gwa-gwagwen be nasikoed.

<sup>13</sup> "Urge-acacia'ye-nugad-walagana suitii be soboed. We-suarmargi or egi bela be nasikoed. <sup>14</sup> Suarmar-walagana-suid, ulugiolua-dummagan-nanaid-yaba be odogoed, adi, a-suarmargi ulu nabir selegegar. <sup>15</sup> Suarmar-walagana-suigan, ulu-e-olua-dummagan-nanaid-yaba-dogar-mai degisadegudoed, bar be ungosulid. <sup>16</sup> A-uluyagi Igar-narmakar-anbega-ukoedi be mesoed.

<sup>17</sup> A-sorbali, ulu-eduged or-nuedgi be imakoed.  
E-sugued, achaatar-nika be imakoed,

e-matardungueddi, achapaa-nika be imakoed.

<sup>18</sup> "Degin, baliwiturmar-dummagan-querubin'ye-nugmalad-walabo orbi be sobbaloed. Be soboedi, mardogi-binna-binna-sarsoar-sobnai be imakoed. Baliwiturmar-querubin'mar-warbogwad ulu-eduged-birgi e-duku-dukusik-gwichi be soboed. <sup>19</sup> Degisoggu, querubin-wargwen ulu-eduged-birgi e-duku-baidsik be sobbaloed. Ulu-edugedba-mesa be querubin-warbogwad soboed.

<sup>20</sup> Querubin-e-sakanmala ulu-eduged-birgi nallaa gwichioed,  
adi, e-sakan ulu-eduged-odukunai guegar.  
We-querubin'mala asabin-asabin gwisgumaloed,  
degi, ulu-edugedsik e-wagar-atakgwichi be imakoed.

<sup>21</sup> "Geb a-sorbali, ulu-edugedi, ulu-birgi be mesoed, geb ulu-yagi dulemar-ebo-an-Igar-Mesnaid narmakar-an-bega-ukoedi be mesoed.  
<sup>22</sup> An besega, querubin'mar-warbogwad-gwichid-abargi, ulu-eduged-birgi, magarogoed. Agi an bebo sunmakoed. Agi an bega-Israel-dulemarga-ibmar-sogoed, an bela bega sogoed."

### *Bab-Dummadga-madu-ukleged-mese-soblegoed*

(Éxodo 37:10-16)

<sup>23</sup> "Deginbali, mese be soboed. Urgo-acacia'ye-nugad be ebugoed.

E-sugued, achabake,  
e-matardungued, achabo,  
e-nibgueddi, achapaa-nika guoed.

<sup>24</sup> "Olobi egi be nasikoed, degi, e-dikar-bela-ebilis olo mulluu be mesoed. <sup>25</sup> Deginbali, e-dikar-bela-ebilis wis-nibakwaa be imakbaloed. E-matardungued, argan-matagwen be imakoed. We-wis-nibakwaa-be-imakoedgi, or ebiris be nasikoed.

<sup>26</sup> "Deginbali, oluaduk-dummagan, gwabake be soboed. Mese-e-nag-sogbakegwad-iliba gwa-gwagwen be nasikoed. <sup>27</sup> Oluaduk-dummagan-gwabakegwad, mesegi-mulluu-mesilesad-urba nai guoed. A-oluaduk-dummagan-yaba suar-suid dogoed, adi, mese nabir semalagar.

<sup>28</sup> "Suar-acacia'ye-nugad-walagana suitii be soboed. A-suар-walagana-ebilis or be matak-matak nasikoed, degi, a-suар-walaganagi mese be semaloed.

<sup>29</sup> Deginbali, e-batemar,  
e-bate-dummagan,  
degi, e-nog-dummagan,  
orbi be sobbaloed.

"E-bormomar be sobbaloed, adi, agi Bab-Dummadga-ibmar-uknaid eogegar. Wemala olo-nuedbi be imakoed. <sup>30</sup> Madu-Bab-Dummad-asabin-ukleged, mese-birgi-maigu be imakoed."

### *Gwallu-sied olobi solegoed*

(Éxodo 37:17-24)

<sup>31</sup> "Deginbali, gwallu-sied olobi be soboed. Gwallu-sied mardogi-binna-sarsoar be soboed.

E-nag, e-war, e-nogmar,  
e-abingaed, e-dutumar,  
bela wemar egi-nanai soggwenna sole-goed.

- 32** "Gwallu-siedgi, e-sakwa walanergwa-nika (6) be imakoed.  
 Nailik, e-sakwa walapaa be soboed,  
 baidzik, e-sakwa walapaa be sobbaloed.
- 33** E-sakwa-war-wargwengi nur-matargana-e-dutuyob nog be soboed,  
 dutu-abingaed-gwagwen, degi, e-dutu be soboed.  
 Degin, e-sakwa-baidgi nur-matargana-e-dutuyob nog be sobbaloed,  
 dutu-abingaed, degi, e-dutu be sobbaloed.  
 Gwallu-sigedgi e-sakwa-walanergwagi (6) degibi be imakoed.
- 34** Gwallu-sied-wargi nog-gwabake nur-matargana-dutugii-dakleged be imakoed,  
 e-abingaedmar, degi, e-dutumar egi be sobbaloed.
- 35** E-sakwa-warbogwad e-wargi-yolenaidgi abingaed-gwagwen be soboed,  
 degi, abingaed-baid e-sakwa-warbogwad-baid-urba be sobbaloed,  
 deginbali, abingaed-baid e-sakwa-warbogwad-baid-urba be sobbaloed.  
 Bela deyobi e-sakwa-walanergwad (6) be imakoed.
- 36** E-abingaedmala, degi, e-sakwamala, unnila bela gwennaa be imakoed.  
 Bela-wemala soggwennaa mardogi-binna-sarsoar be soboed,  
 bela we olo-sunnabi be imakoed.
- 37** Geb degine, ega gwallu gwagugle (7) be soboed.  
 A-gwallumala be ogaoed, adi, asabin neg-mee imakegar.

- 38** Deginbali, e-gwillodub-sikmalad, degi, e-bate-burwigana,  
bela olobi be imakbaloed.
- 39** Gwallu-sied be sobegala, degi, bela e-ibmar-burwigana-sobegala,  
or-nued nibir-dulapaa-gakambe-gakabake-aidiku (74) be ebugoed.
- 40** ”Nue be dako, be imakoedi, igi yar-birgi bega e-dakleged oyolesa, a-sunnagwad be imakoed.”

## 26

*Bab-Dummadse-goled-neg-sunna-seleged-soblegoed*

(Éxodo 36:8-38)

- 1** Bab-Jehová Moisés’ga sogdebalid:  
“Anse-goled-neg-sunna-seleged be soboed.  
Be sobega, lino-mor-nued goambe (10) be ebugoed.  
Deginbali, be nirbadub-arad,  
nirbadub-suir-akwagiid,  
degi, nirbadub-ginnid be ebubaloed.  
AGINE, baliwitur-dummagan-querubin’ye-nugad,  
bela nue-yeerdakle-imakar, a-morgi be sobaloed.
- 2** Bela mormar-e-suguedi, daligugledbi (7) be imakoed.  
E-matardungueddi, daligwenadbi be imakoed.  
Mormala bela emarbi-dungu be imakoed.
- 3** Mor-dummagan-goatale be gwadi-gwadi imakoed.

- Baid-mormar-goataledi amba gwadi-gwadi  
be imakbaloed.
- <sup>4</sup> Deginé, mor-goataled-gwadialed-e-dikargi e-  
uayamar dub-aradgi ega be nasikoed.  
Ambar deyob mormar-baigan-goataled  
gwadiarmalad-e-dikargi be imakbaloed.
- <sup>5</sup> Mormar-goataled-gwadiarmaladgi  
e-uayamar gwadulabo-gakambe (50) be  
nasikoed.  
Deginé, baigan-goataled-gwadiarmaladgi  
amba gwadulabo-gakambe (50) be nasik-  
baloed.  
E-uayamar abin-abin be nasikoed.
- <sup>6</sup> Mor-nasiked orbi dulabo-gakambe (50) be imak-  
baloed,  
adi, mormar-goataledi, baigan-mormar-  
goataledbo be oatogegar,  
adi, anse-goled-neg-sunna-seleged-e-  
mor unnila gogwenayob guegar.
- <sup>7</sup> Sibad-absar mor-dummaganga be imakbaloed,  
adi, anse-goled-neg-sunna-seleged-birgi an-  
wagar.  
A-mormar-dummagan goambe-gakagwensak  
(11) be imakoed.
- <sup>8</sup> Mormar-e-sugued, daligugle-gaka-abala  
sugue (7½) be imakoed,  
e-matardungueddi, daligwen be imakoed.  
Mormar-dummagan goambe-  
gakagwensakad (11) bela emarbi-  
dungu be imakoed.
- <sup>9</sup> We-mormar-dummagan, goatar be gwadioed,  
deginé, baid goanergwa (6) be gwadibaloed.

- Geb anse-goled-neg-sunna-seleged-e-yawagak-asabin, mormar-dummagan-goanergwad-e-gogwenad-napid be nubyar nasikoed.
- <sup>10</sup> Geb a-sorbali, mor-dummad-dikarba gwadulabo-gakambe (50) e-uayamar be nasikoed.
- Amba deyob baigan-gwadilesmalad-dikarba e-uayamar be nasikbaloed.
- <sup>11</sup> Deginbali, esgoro-gordikid-dulabo-gakambe (50) mor-gamalad be imakbaloed.
- Wemala mor-dummad-e-uaya-yaba be odo-goed,  
adi, mor-dummagan danar-danaled unnila goa-gwennagwadyob guegar.
- <sup>12</sup> Mormar-dummagan, ar bur-suidsoggu, anse-goled-neg-sunna-seleged-e-dikarmargi batenai guoed.
- <sup>13</sup> We-batenanaidi, anse-goled-neg-sunna-seleged-edugoed,  
gwensaksik, achabo batenai be imakoed, baidzik, amba achabo batenai be imakbaloed.
- <sup>14</sup> Sibad-wawaad-machered-e-ukamar-ginnidgi-odolegaled,  
anse-goled-neg-sunna-seleged-edugega be imakbaloed.
- Geb degine, ibdurgan-uka-nuegan, be ebubaloed, adi, agi anse-goled-neg-edugegarbar.
- <sup>15</sup> "Deginbali, anse-goled-neg-sunna-selegedega urgomar-acacia'ye-nugad be sobbaloed.
- We-urgomar nue inniki-inniki be imakoed.
- <sup>16</sup> We-urgomar dalibo-abala-sugu be imakoed,  
e-matardungueddi achapaa be imakoed.

- 17 Deginbali, urgomargi e-nagmar war-warbonika be soboed,  
 adi, nabir urgomar naga-nagaba matak-matak gwisguegar.  
 Weyob bela urgomar be anse-goled-neg-sunna-selegedga be imakoed.
- 18 Degisoggu, urgomar mata-dulagwen (20) anse-goled-neg-sunna-selegedga,  
 dad-nakwed-argan-nuedsik ogwichega be imakoed.
- 19 Urgomar-mata-dulagwenad-urba e-sigmalad gwadulabo (40) manibi be soboed.  
 Urgomar-irbali gwa-gwabo e-sigmalad be imakoed,  
 adi, urgo-e-nagmar e-sigmaladgi dogegar.
- 20 Anse-goled-neg-sunna-selegedga urgomar-mata-dulagwen (20)  
 dad-nakwed-argan-sapiledsik ogwichega be imakbaloed.
- 21 Be e-sigmalad-manibiid gwadulabo (40) be imakbaloed.  
 Urgomar-iliba gwa-gwabo e-sigmalad be imakoed.
- 22 Anse-goled-neg-sunna-seleged-sorsik,  
 dad-argwanedsiki urgo-matanergwa (6) be sobbaloed.
- 23 Deginbali, e-abingunaid-yarganbalidgala,  
 urgo-matabo be soboed.  
 Deyobi, e-abingunaid-yarganbalid-baidga,  
 urgo-matabo be sobbaloed.
- 24 We-urgo-matabogwad-e-nagmar, e-sigmalad-birgi darbo abingunaidgi gwisguoed.  
 Geb nibalidse or-dummad-naidgi be urgo darbobela be odogoed.

Weyob urgo-matabogwad niba ebo-  
atonai be imakoed.

<sup>25</sup> Degisoggu, urgo-matabaabakgi (8) e-sigmalad-  
manibiid gwaambe-gakanergwa (16) be  
sioed.

A-sogleged, urgo-matagwengi e-urba e-sigid  
be gwa-gwabo sioye.

<sup>26</sup> Deginbali, urgo-warakwagana-acacia'ye-  
nugad-biir-megmalad be imakbaloed.

We-urgo-warakwagana anse-goled-neg-  
sunna-seleged-e-dikar-soggwensikidga  
walatar be imakoed.

<sup>27</sup> Urgo-warakwagana anse-goled-neg-sunna-  
seleged-e-dikar-baidsikidga, walatar be  
imakbaloed.

Degine, dad-argwaned-yarganbalidga urgo-  
warakwagana walatar be imakbaloed,

<sup>28</sup> Neg-abargi-urgo-warakwa-megoed bela-baksa  
urgomar-abargi megoed.

<sup>29</sup> Bela urgomar-ebilis or be matak-matak  
nasikoed.

Degine, e-olua-dummagan orbi be imakbaloed,  
adi, a-yaba urgo-warakwagana-odogegar.

Bela we-urgo-warakwagana-biir-  
megmalad-birgi or be nasikbaloed.

<sup>30</sup> "Igi-dakle yar-birgi bega oyolesa, ayobi, anse-  
goled-neg-sunna-seleged be soboed.

<sup>31</sup> Deginbali, mor-dummad be imakoed.

We-dubmargi be imakoed:

Nirbadub-aradgi,  
nirbadub-suir-akwagiidgi,  
nirbadub-ginnidgi,  
lino'dub-nuedgi be soboed.

We-morde nue-yeerdakle-imakar, baliwiturmär  
querubin'ye-nugad, egi-ise-nue-sobale be  
imakoed.

<sup>32</sup> Buarmar-acacia-walabakegwadgi we-mor-  
dummad-yeerdakleged be nasikoed.

We-buarmarde or egi nasiklealed.

E-sigid-manibiid-birgi      we-buarmar  
gwisguoed.

<sup>33</sup> We-mor-dummadde mor-nasikmaladgi be  
nasikoed.

Degisoggu, we-mor-dummad Neg-Islidikid,  
Neg-Ise-Islidikid-ebo      bachiki-imakega  
guoed.

We-mor-dummad-daksik      Dulemarbo-An-Igar-  
Mesisad-Ulu be sioed.

<sup>34</sup> Geb degine,      Dulemar-Ebo-An-Igar-  
Mesisad-Ulu-birgine, e-eduged be mesoed.

E-edugedde, Isgued-Elileged-E-Wilubye,  
sogleged.

We-ulude, Neg-Ise-Islidikidyaba sioed.

<sup>35</sup> Neg-Islidikidgi, mor-naid-magabali,  
dad-nakwed-argan-sapiledsik, mese be sioed.

We-mese an-asabin madu-ukleged-mesed.

A-mese-asabinni,      dad-nakwed-argan-  
nuedsik gwallu be sibaloed.

<sup>36</sup> Anse-goled-neg-sunna-seleged-e-yawagakgala,  
we-dubmargi mor-dummad be soboed:

Nirbadub-aradgi,  
nirbadub-suir-akwagiidgi,  
nirbadub-ginnidgi,  
lino'dub-nuedgi be soboed.

Ise-nue-sobar, bela-bela-nue-yeerdakle-imakale, be we-mor-dummad imakoed.

- <sup>37</sup> Degin, we-mor-dummadgala,  
acacia-buarmar walatale ega be imakoed.  
We-buarmar-ebilis or be matak-matak nasikoed,  
degin, mor-gamalad olobi ega be imak-baloed.  
Deginbali, wemar-buarmar-ataled-abingaega,  
esgoro-gordikidgi gwaatale e-sigmalad be soboed.”

## 27

*Ibmar-ogumakar-ukleged-aila-soblegoed*  
(Éxodo 38:1-7)

- <sup>1</sup> Bab-Jehová Moisés’ga sogdebalid:  
“Anga-ibmar-ogumakar-ukleged-aila, be imakbaloed.  
A-aila, urgo-acacia’ye-nugadgi emarbi yaa-dungu be imakoed.  
E-sugued, daligwen-gaka-achabo,  
e-matardungued, daligwen-gaka-achabobar.  
E-nibgueddi, bisgipaa.
- <sup>2</sup> Degin, moli-bebegii aila-e-dikar-abingunanaid-birgi be ogwisbaloed.  
We-moli-bebegiidmala, ailagi bato eba-mese-sobale be imakoed.  
Anga-ibmar-ogumakar-ukleged-aila-birgi,  
esgoro-gordikid be nasikoed.
- <sup>3</sup> ”Deginbali, bela ibmarmar-we-ailagi-ebuleged esgoro-gordikidgi be soboed:  
Buru-simalad-bormomar.  
Buru-weemalad-wesar-dummagan,  
Abe-bomied-nog-dummagan.

- San-obin-obin-saed-iko-dummagan.  
 Soo-seed-bormomar.
- <sup>4</sup> Deginbali, esgoro-gordikidgi san-nared-saki-sakid be sobbaloed.  
 A-saki-sakidga, e-uaya, e-dikar-abingunanaidgi esgoro-gordikidgi be sobbaloed.
- <sup>5</sup> Degine, san-nared-saki-sakid anga-ibmar-ogumakar-ukleged-ailagi, negabaladgi be nasikoed.
- <sup>6</sup> Deginbali, anga-ibmar-ogumakar-ukleged-ailaga, suar-warakwagana be imakbaloed.  
 We-suar-warakwaganaga urgo-acacia'ye-nugad be ebugoed.  
 We-suar-warakwaganaga-birgi esgoro-gordikid egi be nasikoed.
- <sup>7</sup> Suarmar we-aila-e-oluaduk-dummagan-nanaid-yaba be odogegalad.  
 We-suarmar, anga-ibmar-ogumakar-ukleged-aila seledsokalile, dikarba-nai guoed.
- <sup>8</sup> Anga-ibmar-ogumakar-ukleged-aila be ollor imakoed, degine, we-aila urgomargi be soboed.  
 Ar igi bega yar-birgi oyolesa, deyob dakle be soboed.”

*Bab-Dummadse-goled-neg-sunna-seleged-neg-imba-nasiklegoed*

*(Éxodo 38:9-20)*

- <sup>9</sup> Bab-Jehová Moisés'ga sogdebalid:  
 “Deginbali, anse-goled-neg-sunna-selegedga neg-imba be nasikbaloed.  
 Dali-dulagwen-gakatar-sugu (25) guoed,

- dad-nakwed-argan-nuedsik be nasikoed.  
 Degin, we-neg-imba-e-galugi lino-mor-nued  
 naguoed.
- <sup>10</sup> E-buarmardi, waladulagwen (20) nikuoed,  
 degi, e-buar-sigmalad, amba gwadulagwen-  
 bar (20).  
 Bela wemar-sobegala, esgoro-gordikid be  
 ebugoed.  
     E-gamalad-sobegala, degi, buar-e-  
     nonomar-sobegala, mani be ebugoed.
- <sup>11</sup> Amba deyob anse-goled-neg-sunna-seleged-  
 imba dad-nakwed-argan-sapiledsik,  
 lino-mor-nued dali-dulagwen-gakatar-sugu  
 (25) be nasikbaloed.  
 E-buarmardi, dulagwen (20),  
 degi, e-buar-sigmalad amba dulagwenbar  
 (20).  
     E-buar-sigmalad-imakegala, esgoro-  
     gordikid be ebugoed.  
     E-mor-gamaladgardi, degi, e-buar-  
     nonomargardi, mani be ebugoed.
- <sup>12</sup> "Anse-goled-neg-sunna-seleged-imba dad-  
 argwanedsik,  
 mor-dummad daliambé-gakabo-gaka-abala-  
 matardungu (12½), be nasikoed.  
 E-buarmardi, warambe (10),  
 degi, e-buarmar-sigmalad, gwaambebar (10).
- <sup>13</sup> Anse-goled-neg-sunna-seleged-imba  
 dad-nakwedsikid e-matardungued,  
 daliambé-gakabo-gaka-abala (12½) guoed.
- <sup>14</sup> Yawagak-doged-dikarba      mor-dummad  
 naguoedi,

dalipaa-gaka-bisgipaa, doged-e-dikar-gwensaksik sugu naguoed.  
 E-buarmardi, walapaa, degi, e-signalad amba gwapaabar.

- <sup>15</sup> Degine, doged-e-dikar-baidsiki,  
 mor-dummad, dalipaa-gaka-bisgipaa nagubaloed.  
 E-buarmardi, walapaa, degi, e-signalad amba gwapaabar.

- <sup>16</sup> "Yawagak-dogedgi mor-dummad daliatar be nasikoed.

We-mor-dummad be imakoedi,  
 nirbadub-aradgi be imakoed,  
 nirbadub-suir-akwagiidgi be imakoed,  
 nirbadub-ginnidgi be imakoed,  
 lino'dub-nuedgi, ise-nue-sobar,  
 bela-bela-nue-yeerdakle be imakoed.  
 Degine, e-buarmardi, walabake,  
 degi, e-signalad amba gwabakebar.

<sup>17</sup> Bela we-neg-imba-e-buarmar-ebiroedi, e-buar-nonomar, manigi soblegoed,  
 e-gamalad, manigi soblebaloed.  
 E-signaladdi, esgoro-gordikidgi  
 soblegoed.

- <sup>18</sup> "Neg-imba dali-dulagwen-gakatar-sugu (25)  
 guoed,  
 e-matardungued, daliambé-gakabo-abala  
 (12½) guoed.  
 E-mor-naguoed, daligwen-bisgise sugu  
 naguoed.

We-mor-dummagan-naguoedi, lino-mor-nued guoed.  
 E-sigmaladdi, esgoro-gordikidgi soblegoed.  
<sup>19</sup> Anse-goled-neg-sunna-selegedgi belagwapa-ibmarmar-ebulegoedi, bela esgoro-gordikidbi guoed.  
 Deginé, we-a-neg-bargamalad, degi, e-galumar-bargamalad, bela esgoro-gordikidmarbi be imakbaloed.”

*Gwallu-dii-ebulegoed*  
*(Levítico 24:1-4)*

<sup>20</sup> Bab-Jehová Moisés'ga sogdebalid:  
 “Israel-dulemarga be sogo:  
 ‘Olivo-e-gwallu ibmar-baidba-oburarsuli be sedamalo,  
 adi, gwallu-ogamalagar.  
 Degisadegu gwallu gasii guegar.  
<sup>21</sup> Aarón, degi, e-machimala, gwallu guakwaa simaloed,  
 adi, gwallu gasigu oibodagegar.  
 We-gwallu Bab-Jehová-dulemarbo-ambikued-neggi,  
 mor-dummad-Bab-Ulu-irwa-naid-magaba si-goed.  
 We-igar-an-ukedi, Israel-dulemarga,  
 degine, e-waganga, degisadegu guoed.’”

## 28

*Dule-irwa-Bab-Dummadse-gormalad-e-mormar-soblegoed*  
*(Éxodo 39:1-31)*

<sup>1</sup> Bab-Jehová Moisés'ga sogdebalid: “Be-ia-Aarón, degi, e-machimala Nadab, Abiú, Eleazar, Itamar, amala bese warmaked be imako. Wemar, anga Israel-dulemar-abargi dule-irwa-anse-gormaladga gumaloed. <sup>2</sup> Be-ia-Aarón'gala dule-irwa-anse-goled-bur-dummad-mormar be imako, adi, oyogega, be-ia-Aarón'de dule-dummadye, nue-nug-nikadye. <sup>3</sup> Bela dulemar-mormaked-wisimaladbo be sunmako. We-dulemar Aarón'ga mor-makmalaga an ega gurgin-nuegan uksad. Deyobi, Aarón dule-irwa-anse-goledga an nug-imakegar.

<sup>4</sup> ”Aarón'ga mormar-maklegoedi, wemalad:  
 Mor-binasgargi-nagued,  
 mor-efod'ye-nugad,  
 mor-dummad-suitigwad,  
 mor-dummad-dubgi-ise-nue-sobaled,  
 mor-gurgin,  
 degine, morgo-dub-saderba-nagued.

”Degisoggu, be-ia-Aarón'ga, degi, e-masmalaga, dule-irwa-anse-goled-mormar be imakoed, adi, amala dule-irwa-anse-gormaladga gumalagar.

<sup>5</sup> ”We-mormar-makegala, we-dubmar ebule-goed:

Ordub,  
 nirbadub-arad,  
 nirbadub-suir-akwagiid,  
 nirbadub-ginnid,  
 lino'dub-nued.”

*Mor-efod'ye-nugad-maklegoed  
 (Éxodo 39:2-7)*

<sup>6</sup> Bab-Jehová Moisés'ga sogdebalid:

“Mor-efod’ye-nugad be imakoed.

Mor-efod’ye-nugad      nue-yeerdakle      be  
makoed.

Agala, we-dubmar ebulegoed:

Ordub,  
nirbadub-arad,  
nirbadub-suir-akwagiid,  
nirbadub-ginnid,  
lino’dub-nued.

<sup>7</sup> ”E-mor-gukinmar ebo atogegala, morgo warakwaa be imakoed, e-duku-e-dukugi ebo gwadiigar. <sup>8</sup> Mor-efod’ye-nugad-e-mordub-sadergi-naid, nue-yeerdakle be imakoed. We-mordub mor-efod’gi gwadiar-nai guoed. We-mordub-makega, be we-dubmar ebugoed:

Ordub,  
nirbadub-arad,  
nirbadub-suir-akwagiid,  
nirbadub-ginnid,  
lino’dub-nued.

<sup>9</sup> ”Degin, akwa-ónice’ye-nugad gwabo be suoed. A-akwa-gwabogwadgi Israel-masmala-warambe-gakabogwad-e-nugmar

(12) be narmakoed. <sup>10</sup> Gwagwengi masmala-walanergwad-e-nugmar (6) be narmakoed, degine, akwa-baidgine, baigan walanergwad-e-nugmar (6) be narmakbaloed. Be-narmakoedi, machi-dummadgi be onodagoed, geb machi-bipigwadse, e-gwalulesmaladba be narmakoed.

<sup>11</sup> Dule-orgi-arbaedi we-nugmar we-akwamar-birgi narmakoed, igi wilub-nasikega imakdamala, deyob imakoed. We-akwamar-dikargi or be

nasikoed, adi, akwamar agi galegegar. <sup>12</sup> We-akwamar-gwabogwad mor-efod'ye-nugad-gukinmargi be nasikoed. Weyob, Aarón, Israeldadgan-warambe-gakabogwad-e-nug (12) an-asabin nai gudioed, adi, ani Bab-Jehová, an wedulemar insaegar. <sup>13</sup> Akwamar-gwabogwad-gaegala, or be imakoed. A-birgi akwamar be sioed. <sup>14</sup> Degin, e-dub-orbiid giabo be imakoed, akwa-gwabogwad-sigoed agi be edinnoed.”

*Mor-binasmargi-nagued-maklegoed*

(Éxodo 39:8-21)

<sup>15</sup> Bab-Jehová Moisés'ga sogdebalid:

“Geb degine, mor-binasmargi-nagued, igarnabolegedgi-ebulegega, nue-yeerdakle be imakoed. Mor-efod'ye-nugad-imaksadyob be imakbaloed.

”We-dubmar be ebugoed:

Ordub,  
nirbadub-arad,  
nirbadub-suir-akwagiid,  
nirbadub-ginnid,  
lino'dub-nued.

<sup>16</sup> E-sugued, degi, e-matardungued emarbi be imakoed,  
achagwen-sugu, achagwen-matardungu be imakoed.

We-mor darbo be saoed.

<sup>17</sup> We-mor-birgi akwa-nuegan ile-ile be urboed.

Degiid ilebake be urboed:

Ile-soggwengi be urboed:  
Akwa-sárdica'ye-nugad,  
akwa-topacio'ye-nugad,  
akwa-carbunclo'ye-nugad.

**18** Ile-sogbogi be urboed:

Akwa-esmeralda'ye-nugad,  
akwa-zafiro'ye-nugad,  
akwa-diamante'ye-nugad.

**19** Ile-sogbaagi be urboed:

Akwa-jacinto'ye-nugad,  
akwa-ágata'ye-nugad,  
akwa-amatista'ye-nugad.

**20** Ile-sogbakegi be urboed:

Akwa-berilo'ye-nugad,  
akwa-ónice'ye-nugad,  
akwa-jaspe'ye-nugad.

Or-gaega-imaklesad-birgi bela we-  
akwamala be sioed.

**21** "Akwa-nuegana gwaambe-gakabo (12) guoed, Israel-masmala-warambe-gakabogwad-iliba (12). Igi wilub-nasikega imakdamala, deyob, akwa-gwa-gwagwengi, Israel-dulemar-dadgan-sogambe-gakabogwad-e-nugmar iliba be nasikoed.

**22** "Mor-binasgargi-naguedga ordub-nued sinni-sinni be soboed. **23** Geb degine, be olua-gwabo-olobiid mor-binasgargi-nagued-e-dukumargi be nasikoed. **24** Geb ordubmar-sinni-sinnid-giabogwad mor-binasgargi-nagued-e-dukugi olua-gwabogwad-naidgi be nasikoed.

**25** Mor-efod'ye-nugad-nasikegala, ordubmar-sinni-sinnid-giabogwad be akwa-nuegan-e-gukingi-siidgi-edinnar nasikoed.

**26** "Deginbali, be olua-gwabo-olobiid be imakbaloed. We-ormar mor-binasgargi-naguedyaba, e-dukumargi be nasikoed. Be nasikoedi, mor-efod'gi naguegalad. **27** Deginbali,

napi be olua-gwabo-olobiid be imakbaloed. We-ormar mor-efod'ye-nugad-e-dikarnagaba be nasikoed. E-abingunaaidgi yaba-dogar be nasikoed. <sup>28</sup> Geb degine, mor-binasgargi-nagued-e-olua-gwabogwad, mor-efod'ye-nugad-e-olua-gwabo-naimogad-ebo dub-aradgi edillegoed. Adi, mor-efod'ye-nugad dub-saderba-naidgi naguegar. Deyob guoed, adi, mor-binasgargi-nagued melle mor-efod'gi bachikii guegar.

<sup>29</sup> "Weyobi, Aarón, anse-goled-negislidikidyaba dogdele, igar-nabogega mor-binasgargi-nagued-ebulegedgi Israel-e-masmala-e-nug naigu guoed. Adi, an wemar-e-binsadigu guegar.

<sup>30</sup> "Deginbali, mor-binasgargi-nagued, igar-nabogega-ebulegedgi, be Urim, degi, Tumim sioed. Adi, Aarón an-asabin-dogder, e-binasgargi-nai dogegar. Weyobi, Aarón, an-asabin-gwisgudaged-ilibali, e-binasgargi Israel-dulemarga igar-nabogega sedigu guegar."

*Dule-irwa-Babse-goled                    e-mormar-baigan-imaklegoed*

(Éxodo 39:22-31)

<sup>31</sup> Bab-Jehová Moisés'ga sogdebalid: "Mor-dummad-efod'ye-nugad, bela mor-aradbi be imakoed. <sup>32</sup> Nono-odogega, abargina mor-gammu be sikoed. Mor-gammu-e-dikar bela-ebilis be ebayoed, adi, melle achirmakegar.

<sup>33</sup> "Mor-dummad-e-nag-dukugi bela-ebirar yeerdakle be soboed.

Be soboedi, sapi-granada-e-sanyob-dakleged be soboed,

nirbadub-aradgi,  
 nirbadub-suir-akwagiidgi,  
 nirbadub-ginnidgi be soboed.

Degine, amar-imba-imbagi gapan-burwigana-  
 olobiid,  
 bela e-nag-duku-ebilis be nasikoed.

<sup>34</sup> Weyob be nasikoed:

Gapan-bipigwad-olobiid,  
 a-nagaba, sapi-granada-e-sanyob-sobaled be  
 nasikoed,  
 geb a-nagaba gapan-bipigwad-olobiid be  
 nasikbaloed,  
 geb sapi-granada-e-sanyob-sobaled be nasik-  
 baloed.

Deyob, muchub-muchub bela-ebilis mor-  
 dummad-e-nag-dukugi be nasikoed.

<sup>35</sup> "Aarón, dule-irwa anse-gorsokalile, we-mola-  
 yoi dogoed. Adi, e-gapan-burwigana-goled mag  
 itolegegar.

Aarón an-asabin Neg-Islidikidse-dogder,  
 degine, agi noarbalir, gapan-burwigana-  
 goled mag itolebaloed. Deyob imakele, Aarón  
 burgosulid.

<sup>36</sup> "Deginbali, or-nued matarkwaa be imakbalo.  
 Geb a-birgine, wilub-nasikega-imakdamaladyob  
 be we-gayaburba nasikoed:

'BAB-JEHOVÁ'GA SWILIDIK-NUGSALEGALED.'

<sup>37</sup> "We-olo-matargwagwad dub-aradgi-  
 edinnar mor-gurgin-ebirmakaled-asabinnidgi  
 be nasikoed. <sup>38</sup> Weyobi, Aarón-bebegi nai guoed.  
 We-olo-matargwagwad sogleged:

Aarón ibmar-ukleged-swilidikid-anga-ukalile,  
 Israel-dulemar-nosasogele, Aarón'gi  
 gwisgulegoye,  
 degine, an e-isgusmalad elioye,  
 geb an anga-ibmar-ukleged-swilidikid-  
 ukarmalar, abingaoye.

**39** "Degin, mor-dummad-dubgi-ise-nue-  
 sobaled lino-morye-nugadgi be imakoed, degine,  
 mor-gurgin-ebirmakaled amba lino-morgi be  
 imakbaloed. Deginbali, morgo-dub-sadergi-  
 nagued ise-nue-sobar, bela-bela nue-yeerdakle be  
 imakbaloed. **40** Deginbali, Aarón-e-masmalaga mor-  
 dummad-dubgi-ise-nue-sobaled, degi, morgo-  
 dub-sadergi-nagued, degine, mor-gurgin ega  
 be imakmogo. Adi, oyolegegar, wemarde dule-  
 dummaganye, nue-nug-nikamaladye.

**41** "We-mormar be imaksadi, be-ia-Aarón'ga,  
 degine, e-masmalaga be yooed. Geb degine,  
 gwallu-wawa amar-nonogi be eogoed. Geb  
 degi, dule-irwa-anse-gormaladga-gumalaga be  
 onugsaoed. **42** Deginbali, lino-mor garson-bipi-  
 urba-yolegedga be imakoed, adi, wemar melle  
 uka-swiri gumalagar. We-garson-bipi saderse,  
 geb duase-sugu yooed. **43** Aarón, degi, e-masmala,  
 dulemar-anbo-ambikued-negse-dogdemalale,  
 we-garson-bipi-yoi dogmaloed. Degin, anga-  
 ibmar-ogumakar-ukleged-ailase nadmalale,  
 amba we-garson-bipi-yoi dogbaloed. Adi, wemala  
 melle isgumalagar. Ar isgumalale, wemala  
 burgwemaloed. Aarón'gala, degi, e-masmalagala,  
 we-igar degisadegu-mai guoed."

## 29

*Aarón, degi, e-masmala, Bab-Dummadga-arbaega nug-imaklesad  
(Levítico 8:1-36)*

<sup>1</sup> Bab-Jehová Moisés'ga sogdebalid:

“Aarón, degi, e-masmalabo, anga dule-irwanse-gormaladga-gumalaga, weyob be imakoed: Be-molimar-abargi moli-bebe-nikad-sapingwawargwen, degi, sibad-wawaad-macheder-warbo be suoed.

Amar, swilidikid be suoed, bonikwasulid be suoed.

<sup>2</sup> ”Deginbali, trigo-madubur-bur-nuedgi be wedumadar imakoed:

Madu-inasulid,

madu-olo-olivo-gwallugi-omukualed-inasulid,

madu-matargwa olivo-gwallugi-magaled-inasulid.

<sup>3</sup> ”We-madumala anse-gorleged-negse sedegala, garba-senigwadgi be urboed.

Geb degine, moli-bebe-nikad-sapingwagwad, degi, sibad-wawaad-macheder-warbogwad, anga ukega be sedoed.

<sup>4</sup> ”Geb be, Aarón, degi, e-masmalamala, dulemar-anbo-ambikued-neg-yawagakse be sedoed. Agi be, Aarón, degi, e-masmala, be diigi ogoed.

<sup>5</sup> Agine, we-mormar-maklesad Aarón'ga be yooed:

Mor-dummad-dubgi-ise-nue-sobaled,

mor-dummad-suitigwad,

mor-efod'ye-nugad,

mor-binasgargi-nagued.

"Geb degine, mor-efod'ye-nugad morgo-dub-sadergi-naguedgi ega be edinnoed. <sup>6</sup> Deginbali, mor-gurgin-ebirmakaled e-nonogi ega be sioed. We-mor-gurgin-ebirmakaled-birgi or-nued-matargwagwad-islidikid ega be nasikoed. <sup>7</sup> Geb degine, olivo-gwallu be suoed. Geb we-olivo-gwallu Aarón-nonogi be eogoed. Adi, dule-irwa-anse-goledga onugsalegegar.

<sup>8</sup> "Deginbali, Aarón-e-masmala bese-dagega be imakmogoed. Geb, ega be mor-dummagan-maklesad yomogoed. <sup>9</sup> Degi, ega be gurgin simogoed. Deginbali, Aarón'ga, degi, e-masmalaga nuekwa mor-dub-saderba-nagued be edinnoed. Weyobi, Aarón, degi, e-masmala, angarbi-arbamalaga be onugsaoed. Weyobi, dule-irwa-anga-goledga degisadegu gumaloed.

<sup>10</sup> "A-sorbali, moli-bebe-nikad-sapingwagwad dulemar-anbo-ambikued-neg-yawagakse be sedoed. Geb Aarón, degi, e-masmala, we-moli-e-nono-birgi e-argan mesmaloed. <sup>11</sup> Geb agi, dulemar-anbo-ambikued-neg-yawagakgi be an-asabin we-moli oburgoed. <sup>12</sup> Geb we-moli-e-abe be suoed. Degine, we-abe be-googi anga-ibmar-ogumakar-ukleged-ailagi moli-bebegiid-gwichidgi be mage-mage imakoed. Geb degine, Abe-gwabgusaddi, bela ibmar-ogumakar-ukleged-aila-nagaba be eogoed. <sup>13</sup> Deginbali, bela we-ibmarmar be weoed:

E-samurgi-gwallu-nanaid, e-bina-dukugi-gwallu-nanaid,  
e-mirwa-gwabogwadgi-gwallu-nanaid, degi,  
e-mirwa-gwabogwad.

"Geb a-gwallumala anga ibmar-ogumakar-ukleged-aila-birgi be ogumakoed. <sup>14</sup> Moli-bebe-nikad-e-sandi, e-ukadi, e-saadi, soogi dulemar-danar-danar-bukmalad-magaba be ogumakoed. Ar we-ibmardi isgued-anar uklegoed.

<sup>15</sup> "Geb degine, sibad-wawaad-macheder-warbogwad be wargwen suoed.

"Aarón, degi, e-masmala, a-sibad-e-nono-birgi e-arganmar mesmaloed. <sup>16</sup> We-sibad-wawaad-macheder be oburgoed, degine, ibmar-ogumakar-ukleged-aila-e-dikarmargi we-sibad-wawaad-e-abe be bomi-bomi imakoed. <sup>17</sup> We-sibad-wawaad be goamakoed. Geb e-samur, degi, e-malimar, nue be enukoed. Geb degine, wemarenukaled e-nonoba, e-sanmar-goamakaledba, mesa be urboed. <sup>18</sup> Geb a-sorbali, sibad-wawaad-macheder ibmar-ogumakar-ukleged-aila-birgi bela be ogumakoed. We-ibmar-ogumakar-angaukleged, an yeer-yapan itogoed. We anga soogi ogumakar uklenaid.

<sup>19</sup> "Geb degine, sibad-wawaad-macheder-baid be subaloed.

Aarón, degi, e-masmala, a-sibad-wawaad-e-nono-birgi e-arganmar mesmarbaloed.

<sup>20</sup> We-sibad-wawaad be oburgoed.

Geb e-abe be abala suoed.

Geb Aarón-e-uaya-duku-argan-nuedsikidgi we-abe be magoed.

Degine, e-goo-dummad-e-argan-nuedsikidgi, e-nag-goo-dummad-nuedsikidgi we-abe be magbaloed.

Amba deyob be Aarón-e-masmala imakbaloed.

”Geb anga-ibmar-ogumakar-ukleged-aila-e-dikarmargi we-abe be bomi-bomi imakbaloed.

**21** Anga-ibmar-ogumakar-ukleged-ailagi-abe-siidi, degi, dule-nugsalenair-olivo-gwalluebulegedi, Aarón'gi be bomi-bomi imakoed, degi, e-mormargi be bomi-bomi imakbaloed. Geb Aarón-e-masmalagi, degi, e-masmala-morgi be bomi-bomi imakbaloed.

”Weyobi, Aarón, e-mormala, e-masmala, degi, e-masmala-mormala, an-asabin anga islidiki guoed.

**22** ”Geb degine, we-sibad-wawaad-macheder-e-gwallu be suoed:

E-samurgi-gwallu-nanaid,  
e-bina-dukugi-gwallu-nanaid,  
e-mirwa-gwabogwadgi-gwallu-nanaid,  
degi, e-mirwa-gwabogwad be suoed,  
degine, e-dua-argan-nuedsikid be subaloed.

Ar ade, we-sibad-wawaad dule-irwa-Bab-Dummadse-goled-onugsalegega uklegaledid.

**23** ”Deginbali, madu-e-inasurmalañ garba-bipi-Bab-Dummad-asabin-siidgi be suoed:

Madu-olo, gwagwen,  
madu-olivo-gwallugi-omukualed, gwagwen,  
degi, madu-matargwagwad, matagwen.

**24** ”Bela we-madumala, Aarón'ga, degi, e-masmalaga, be ukoed. Geb an-asabin bana-bana imakmaloed, adi, anga-ibmar-ukledaedga guegar.

**25** ”Geb a-sorbali, Aarón e-argangi-madumar-ganikid bega ukoed.

Geb ibmar-ogumakar-ukleged-ailagi be  
 ogumakoed,  
 anga-ibmar-ogumakar-uklesad-ebo mesa be  
 ogumakoed,  
 adi, an nued-yapan itogegar.  
 Ar wede, anga soogi-ogumakar-  
 uklegaledid.

<sup>26</sup> "Deginbali, be anga Aarón-anga-arbaega-  
 onugsalegega, sibad-wawaad-machedered-e-  
 binasgar be suoed.

Geb we-binasgar be bana-bana imakoed,  
 adi, anga-ibmar-ukledaedga guegar.  
 We-sibad-wawaad-e-binasgar begadga  
 guoed.

<sup>27</sup> "Sibad-wawaad-machedered-uklesad-e-  
 binasgar anga-bana-bana-uklegaled, bachikii  
 be imakoed, degi, e-dua-sabolesad anga-bana-  
 bana-uklesad, bachikii be imakkaloed. Wemala,  
 Aarón'ga, degi, e-masmalaga uklegoed. Ar we-  
 ibmarmar, Aarón, degi, e-masmala, anga-arbaega-  
 onugsalenaaidgi sulesad. <sup>28</sup> We-ibmarmala  
 Aarón'ga, degi, e-masmalaga uklegoed.

Weyob Israel-dulemarga degibi-sadegu igar-  
 maigu guoed.

We-ibmar-uklegedi, Israel-dulemar ukdii  
 guoye sogleged.

We-uklegedi, gwenatigwar-guega-ibmar-  
 ukleged guoed.

<sup>29</sup> "Aarón-mormar-islidikmalad, anse-dule-  
 irwa-gorsokalir-yoleged, Aarón-sorba, e-wagan  
 sumaloed, adi, a-mormar-yoi anga dule-irwa-  
 Bab-Dummadse-gormaladga-nugsalemagar.

**30** Aarón-e-wagan-wargwen, e-bab-sorba dule-irwa-anse-golega-sulesar, anga Neg-Islidikidgi-arbaega, dulemar-anbo-ambikued-negse nonikile, we-mola yooed. Ibagugle (7) we-mola-yoi guoed.

**31** "Anga-arbaega-dule-onugsalesadgi sibad-wawaad-macheder-uklegaled-e-sana be suoed. A-e-sana nega-islidikidgi be duoed. **32** Aarón, degi, e-masmala, we-sibad-wawaad-macheder-uklegaled-e-san, degi, garbagi-madu-siid, dulemar-anbo-ambikued-neg-yawagakgi gunmaloed. **33** We-ibmarmar-uklesadbali, an wemar isgussuliyob daknonikid, degi, anga-arbaega dule-irwa-golega-gumalaga nugsalesmalad. Degisoggu, we-ibmarmar Aarón'bi, degi, e-masmalabi gunmaloed. Ar we-ibmarmar anga uklegaledsoggu, dule-baigandi gunnosurmalad. **34** We-sanmar-anga-uklegaled, degi, we-madumar-anga-uklegaled, obichale, be soogi ogumakoed. Ar we-ibmarmar ibmarswiliidikmaladsoggu, oibosadgine melle bar gunno.

**35** "Degisoggu, an-bela-bega-sogsadba, deyob be, Aarón, degi, e-masmala be imakoed. Wemala anga-arbaega-onugsalegega, ibagugle (7) egi be arbaoed. **36** E-isgumalad-elilegegala, anga be bane-bane moli-bebe-nikad-sapingwagwad ukoed. Degidbali, ibmar-ogumakar-ukleged-aila anga-uklegega guagwar signonikoed. Weaila anga-uklegoedi, olivo-gwallu egi be mage-mage imakoed. **37** Deyob isgued-elilegegala, degi, angadga-aila-guegala, ibagugle (7) be imakoed. Degine, deyob aila angadga sii guoed. Degi,

ibu-ibmar we-aila-ebusale, bela-ibmar angadga gunonimogoed.”

*Bane-bane Bab-Dummadga-ibmar-uklegoed-Igar*

(Números 28:1-8)

**38** Bab-Jehová Moisés'ga sogdebalid: “Bab-Dummadga-ibmar-ogumakar-ukleged-ailagi bane-bane wemar be ukoed:  
Sibad-wawaad-sapingwa-birgagwen-nikad walabo be ukoed.

**39** Wakdar we-sibad-wawaad wargwen be oburgoed,  
sedogi be baid oburgwebaloed.

**40** Deginbali, we-sibad-wawaad-gebe-oburgwilegoedba be we-ibmar ukoed:  
Madubur-bur-nued, nibiratar,  
olivo-gwallu, bute-wargwen eba be oburoed.  
Degin, anga be egi vino, bute-wargwen-mergu eobaloed.

**41** Geb sedogi, sibad-wawaad-baid be oburgwebaloed.

Wakdar-imaksadyob be imakbaloed.  
We-ibmar-soogi-ogumakar-ukleged an yeer-yapan itodaedid.

**42** ”Anse-goled-neg-dogedgi an bebo-sunmakega bebo-abinguoedgi, be-wagan degisadegu, an-asabin, anga we-ibmar-ogumakar-ukmai gumaloed. **43** Deginbali, agi an, Israel-dulemarbo abingubaloed. A-nega, an-egi-gandikidba-gudii guoedbali, neg-islidikidga guoed.

**44** ”Dulemar-anbo-ambikued-neg, degi, anga-ibmar-ogumakar-ukleged-aila angadga an imakoed. Deginbali, Aarón, degi, e-masmala,

angadga an imakbaloed, adi, dule-irwa-anse-gormaladga gumalagar. <sup>45</sup> Ani an Israel-dulemar-abargi gudii guoed, degine, e-Bab-Dummadga an gubaloed. <sup>46</sup> Adi, deyob Israel-dulemar wisgumaloed:

Ani an, e-Bab-Dummad-Jehová guye.

Ani an, emar-Egipto-yargi-wilebukwamargu, onosye,  
adi, emar-abargi an gudii guegarye.

Ar ani an, Bab-Jehová gued,  
ani an, e-Bab-Dummadid.”

## 30

*Ina-wawadikid-ogumaked-aila-soblegoed*

(Éxodo 37:25-29)

<sup>1</sup> Bab-Jehová Moisés'ga sogdebalid: “Degin-bali, anga ina-wawadikid-ogumaked-aila be sob-baloed. Agi ina-wawadikid obupurmaklegegar. We-aila-sobegala, urgomar-acacia'ye-nugad be ebugoed.

<sup>2</sup> We-aila, achabo-sugu imaklegoed, e-matardungued, achabobar. E-sugued, e-matardunguedbo emar-dungu guoed. E-nibgueddi, dali-abala. E-moli-bebegiid ailaba-mesa be soboed.

<sup>3</sup> Birgi be or-nued nasikoed: E-birgi-akinnar-maidgi, bela e-dikarmargi, e-moli-bebeyob-daklegedgi, bela amargi, or be nasikoed.

E-dikarbali, ormar-mullu-ebirar be mesbaloed.

- <sup>4</sup> Deginbali, ormar-mullugalad-urba oluabela-lobiidi gwabo, e-dikarmargi be nasikoed,  
adi, nabir suarmar-suitigwad egi dogega,  
aba nabir selegegar.
- <sup>5</sup> We-suarmar-suitigwad-imakega urgo-acacia'ye-nugad be ebugoed.  
Degine, we-suarmargi or egi be ebiris nasikoed.
- <sup>6</sup> "Geb degine, ina-wawadikid-ogumakleged-aila sigoed, bia mor-dummad Dulemar-Anbo-Igar-Mesisad-Ulu-Eduged-Maid-Irwa nai, a-asabin, bia an bebo-abinguoe, agi be sioed.
- <sup>7</sup> "Aarón bane-bane, wakudaryalaba, gwallumar guakwaa imakalile, ina-wawadikid-ogumakleged-ailagi anga ina-wawadikmalad ogumakoed. <sup>8</sup> Deginbali, neg-sedogusale, Aarón, sedo-gwallu-ogaalile, anga ina-wawadikmalad ogumakbaloed. Degibi-sadegu, an-asabin bewagan we-in-a-wawadikmalad obupurmakdii gudoed.
- <sup>9</sup> We anga-in-a-wawadikmalad-ogumakleged-ailagi:  
Ina-wawadikmalad-baid uklegosulid, ibmar-durgan ogumaklegar uklegosurbalid, degine, anga-ibmar-gwag-ukleged agi uklegosurbalid, degine, a-birgi egi be ibmar eogosurbalid.
- Unnila ina-wawadikmaladbi be ogumakoed, an bega sogasyob.
- <sup>10</sup> "Aarón, birgagine, isgued-eliega, we-in-a-wawadikmalad-ukleged-ailagi, e-moli-bebeyob-daklegedgi, anga-ibmar-ogumakar-uklesad-e-abe

egi mage-mage imakoed. Birgagine, irgwennaa deyob imakoed. Be-wagan, degisadegu imakdii gudoed. We-aila angadga guoed.”

*San-bendaklegEGA mani-uklegED*

<sup>11</sup> Bab-Jehová Moisés'ga sunmakdebalid, ega sogdebalid:

<sup>12</sup> “Israel-dulemar be ebichidele, na san-bendakmalagala, wala-walagwen an-bennukmaloed. Ebichilesadba bennukmaloed, adi, melle bemargi boni-dummagan ainiegar.

<sup>13</sup> ”Bela dulemar-ebislesmalad mani-gramo-atar (5) bennukoed: We-mani anse-goled-neggi-mani-aidikued-wilub-negabar gued.

”We-mani anga ibmar-uklegedga guoed. <sup>14</sup> Bela dulemar-birga-dulagwen-nikamalad (20), degi, bela aba-obine-birga-nikamalad-ebislesmaladi, anga we-mani ukoed.

<sup>15</sup> ”Dulemar, na san-bendakmalaga anga mani-ukarmalale, dule-mani-ibed mani gwen-obine ukosulid. Dule-wileged gwen mani-ichee ukosurmogad. Anga we-mani ukarmalar, bela mani-gramo-atar ukmaloed. <sup>16</sup> Degisoggu, be-sunnagwad be Israel-dulemar-we-mani-ukarmalar, be suoed. Geb a-mani, dulemar-anbo-ambikued-neggi-arbalegega-ebulegega be ukoed.

”Weyobi, an insaegalad, Israel-dulemar na e-san-onogegala, a-anar mani uksamarye.”

*Dii-sied-esgoro-gordikidbiid*

<sup>17</sup> Bab-Jehová Moisés'ga sogdebalid:

<sup>18</sup> “Deginbali, dii-sied esgoro-gordikidbi be soboed.

E-sigedga-guoedi, esgoro-gordikidbi be imakoed.

A-dii-sied argan-enukega-ebulegega be imakoed.

We-dii-sied be sioedi, dulemar-anbo-ambikued-neg-siid, degi, anga-ibmar-ogumakar-ukleged-aila-siid, amar-imbagi be sioed.

Geb egi be dii enogoed.

<sup>19</sup> A-diigi, Aarón, e-masmalamala, e-arganmar, degi, e-malimar, enukmaloed.

<sup>20</sup> Wemala, dulemar-anbo-ambikued-neggi-dogdedibe,

degi, anga-ibmar-ogumakar-ukleged-ailase warmaknadele,

<sup>21</sup> e-arganmar, degi, e-malimar enukmaloed. Ar degi-imaksulile, burgwemaloed.

We degisadegu, weyob Aarón'ga, degi, e-waganga we-Igar maigu guoed.”

*Olivo-gwallu, degi, ina-nuegan-yeer-yapanmalad*

(Éxodo 37:29)

<sup>22</sup> Bab-Jehová Moisés'ga sogdebalid:

<sup>23</sup> “Ina-nuegan-yeer-yapanmalad be suo:

Mirra'ye-nugad-diregwad, nibirambe-gakapaa (13).

Canela'ye-nugad-yeer-yapanned, nibirnergwa-abala (6½).

Cálamo'ye-nugad-yeer-yapanned, nibirnergwa-abala (6½).

<sup>24</sup> Casia'ye-nugad, nibirambe-gakapaa (13), degi, olivo-gwallu, galón-gwagwen.

Anse-goled-neggi ibmar-oaidikued-wilubsiidgi be wilubsaoed.

**25** "We-inamar olivo-gwalluba bela be oburoed, anga olivo-gwallu-wawadikidga guegar. We-gwallu-wawadikid be imakoedi, dule-gwallu-wawadikid-imakdaedyob be imakoed. We-gwallu-wawad angadga guoed. **26** We-gwallu-wawadgine be wemar magoed:

Dulemar-anbo-ambikued-neg,  
 Dulemar-Anbo-Igar-Mesisad-Ulu,  
**27** mese, degi, bela eba-ibmarmar-ebulemalad,  
 gwallu-sied, degi, bela eba-ibmarmar-ebulemalad,  
 ina-wawadikmalad-ogumakleged-aila.  
**28** Anga-ibmar-ogumakar-ukleged-aila,  
 degi, bela eba-ibmarmar-ebulemalad,  
 degine, dii-sied esgoro-gordikidgi-sobaled,  
 bela e-malise-bakar.

Amar bela we-gwallu-wawadgine be magoed.

**29** "Weyobi anga-ibmar-uklegaledga guoed. Bela we-ibmarmala angadgarbi guoed. Ibu-ibmar we-ibmarmar-ebusale, bela angadgarbi gunonimogoed.

**30** "Deginbali, Aarón'gi, degi, e-masmalagi, be we-gwallu-wawad eogoed, adi, anga dule-irwa-anse-gormaladga gumalagar. **31** Israel-dulemarga be sunmakoed, ega be sogoed: 'We gwallu-wawad, degisadegu, gwallu-wawa-eoleged-islidikidga guoye. **32** We-gwallu-wawad dule-bamaladgi eolegosulid, degine, we-gwallu-wawad-imakaledyobi, baid-gwallu-wawad be imakosulid. We-gwallu-wawad, gwallu-wawad-islidikidid. Degisoggu, gwallu-wawad

angadgarbi-gued be dako.

<sup>33</sup> ” ’Ar doa-dule, we-gwallu-wawad-imakaledyob baid-gwallu-wawad-imaksale, dulemar-irwa-anse-goledsulidgi eosdibe, e-dulemar-abargi ononnolegoed.’ ”

*Ina-wawadikid ogumakega ukleged*

<sup>34</sup> Degine, Bab-Jehová Moisés’ga sogdebalid:  
“We-gagan-yeer-yapanmalad-e-gichi be weo:

Estacte’ye-nugad-e-gichi,  
ámbar’ye-nugad-e-gichi,  
gálbano’ye-nugad-e-gichi,  
ina-wawadikid-incienso-nued.

We-gagan-yeer-yapanmalad-e-gichi bela  
emarbi-mergu be weo.

<sup>35</sup> ”Bela-we-gagan-yeer-yapanmalad-e-gichi be oburoed. Igi ina-wawadikid-sobed-dule ina-wawadikid sobe, deyob be ina-wawadikid-incienso’ye-nugad be soboed. Gagan-yeer-yapanmaladi ise-nue-oburar be imakoed. Balu egi be mesbaloed. Baid-ibmar egi be oburosulid. We-ina-wawadikid-incienso’ye-nugad, angadgarbi guoed. <sup>36</sup> We-ina-wawadikid bela ise-nagar, ise-ubimakar be imakoed. We-ina-wawadikid, Dulemar-Anbo-Igar-Mesisad-Ulu-siid-asabin, dulemar-anbo-ambikued-neggi be sioed. Agi, an bese magarogoed. We-ina-wawadikid bela-bela bemarga angadgarbi-ebulegega guoed. <sup>37</sup> We-ina-wawadikid be imakoedi, baid-ina-wawadikid weyob-oburale, be imakosulid. We-ina-wawadikid Bab-Jehová’gadgarbi be dakoed.

<sup>38</sup> "Ar doa-dule weyob ina-wawadikid-e-yapanned-uega imakalile, we-dule, e-dulemar-abargi ononnolegoed."

## 31

*Bezaleel, degi, Aholiab, arbaega sulesmalad*

*(Éxodo 35:30–36:1)*

<sup>1</sup> Bab-Jehová Moisés'ga sunmakded, ega sogded:

<sup>2</sup> "Nue be an-itogo. Hur-e-wagwa-Judá-yargined Uri-machi-Bezaleel'ye-nugad an susad. <sup>3</sup> We-Bezaleel'ga An-Burba an ega nue-uksad.

Nue-binsaed-nikagued an ega uksad,  
nue-ibmar-magar-itogued an ega uksad,  
nue-ibmar-wisigued an ega uksad,  
degene, nabir-ibmar-obinyemaigued an ega  
uksad.

<sup>4</sup> Adi, nabir ibmar yeerdakle-sobegar,  
nabir orgi-arbaegar,  
nabir manigi-arbaegar,  
nabir esgoro-gordikidgi-arbaegar.

<sup>5</sup> Degine, nabir akwa-nuegangi-arbaegar,  
nabir akwa-nuegan ibmar-birgi siegar,  
nabir urgomargi-arbaegar,

degene, nabir-galagwensuli ibmar-  
yeerdakle-imakegar.

<sup>6</sup> "Deginbali, Bezaleel-bendakega, Dad-dummad-Dan-wagwa Ahisamac-machi-Aholiab an susbalid. Dule-nue-ibmar-wisimalad, gatik-ibmar-wisguega an imaksad, adi, bela an-ibmar-sogsadba bega imakmalagar, we-ibmargi arbamalagar:

<sup>7</sup> Dulemar-anbo-ambikued-neggi,

Dulemar-Anbo-Igar-Mesisad-Ulugi,  
 Dulemar-Anbo-Igar-Mesisad-Ulu-edugedgi,  
 degi, anse-goled-neg-sunna-selegedgi bela-  
 ibmar-ebuleged sobegar.

<sup>8</sup> Deginé, mese, geb bela-eba-ibmarmar-  
 ebulemalad.

Gwallu-sied-bela olobiid, geb bela eba-  
 ibmarmar-ebulemalad.

Anga-ina-wawadikid-incienso'ye-nugad-  
 ogumakleged-aila.

<sup>9</sup> Anga-ibmar-ogumakar-ukleged-aila,  
 geb bela-eba-ibmarmar-ebulemalad.

Dii-sied-esgoro-gordikidgi-sobaled,  
 geb bela e-malise-bakar, sobegarbar.

<sup>10</sup> Deginé, we-mormar makmarbaloed:  
 Aarón-mor-islidikmalad,  
 degi, e-masmala-mor-anse-dulemar-irwa-  
 gorskalar-yodamalad.

<sup>11</sup> Olivo-gwallu-magega-ebuleged,  
 degi, ina-wawadikid Neg-Islidikidgi-  
 ebuleged sobegarbar.

Wemala, Bezaleel, degi, Aholiab-ebogwa  
 bela sobmaloed.

”Ar igi bela an bega sogsa, deyob sogedba imak-  
 maloed.”

### *Obunnoged-iba-igar*

(Éxodo 35:1-3)

<sup>12</sup> Bab-Jehová Moisés'ga sogdebalid: <sup>13</sup> “Israel-  
 dulemarga be sunmakoed, ega be weyob sogo:  
 ‘Napira an bemarga soged, an-obunnoged-ibagi  
 be obunnomalo, ar ade, wede bemar-ebo an-Igar-  
 Mesnaid e-wilubga gued. Be-waganga we-Igar  
 degisadegu mai guoed, adi, be wisgumalagar, ani

an Bab-Jehová gued. Ani an be-sunonimalad, anga arbadii gumalagar.

**14** Degisoggu, obunnoged-ibagi mer arbamalo, ar ade, a-iba bemargala iba-islidikidid.

A-ibagi, dule obunnogergeben.

A-ibagi, dule wis arbasale, we-dule e-dulemar-abargi Israel-dulemar-abargi-onolegoed.

**15** Ibanergwa (6) arbalegoed, ibagugledgindina (7), obunnoged-ibad.

We-iba Bab-Jehová'gadid.

Ar doa-dule we-ibagi arbaye-sogele, napira an bega soged, we-dule oburgwileged-segad.'

**16** "Degisoggu, Israel-dulemala obunnoged-ibagi arbaosurmalad. E-waganmargala we-Igar degisadegu-mai guoed. **17** Israel-dulemar-anbo-we-Igar-Mesnaid e-wilubga guoed, degisadegu-maigu guoed. Ar Bab-Jehová, nibneg-nasikegala, napneg-nasikegala, ibanergwa (6) arbasad. Ibagugledgindi (7), bar arbassulid. Bab-Dummad a-ibagi obunnosad."

## **5. BAB-DUMMAD ISRAEL-DULEMARBO GANNAR IGAR-MESISAD**

**(31:18–34:35)**

**18** Bab-Jehová, Sinaí-yargi Moisés'bosunmaknaid-bergusgua, Israel-Dulemarbo-Igar-Mesnaid-e-wilubga-guega, Moisés'ga akwamatargwagwad-matabo uksad. We-akwagi-Igarmar-narmaklesadi, Bab-Dummad na e-sunnad e-googi narmaksad.

## 32

*Moli-bebe-nikad-olobiid-sobsamalad  
(Deuteronomio 9:7-29)*

<sup>1</sup> Israel-dulemar dakdegu, Moisés yar-birgi-gudiid gwen aidedasuli, Aarón'se nadé gusmalad. Ega sogdemalad:

—¡Aarón! Be anmarga bab-dummagan sobe, adi, anmar-idu-nadap gumalagar. Ar Moisés-Egipto-yargi-anmar-onosad, anmar wissulid, wede igi-gusa.

<sup>2</sup> Aarón dulemar-abin sogded:

—Be-omegan-uaya-dukugi-ormar-nanaid, be-bunamala-uaya-dukugi-ormar-nanaid, be-masmala-uaya-dukugi-ormar-nanaid      be ungemardo. Geb be anse sedamalo.

<sup>3</sup> Geb degine, bela dulemar uaya-dukugi olua-nanaid unusmalad, geb bela Aarón'se senonimalad. <sup>4</sup> Aarón bela we-ormar abingasad. Geb soogi or dusad. Binna-binna sobe-sobe imaksad, moli-bebe-nikad-sapingwagwadga obinnisad. Geb degine, bela sogdemalad:

“¡Israel-dulemar! Wemar be-bab-dummagan-dake. Wemar, Egipto-yargi bemar-onosad-dake.”

<sup>5</sup> Aarón weyob dulemar-daksagu, moli-bebe-nikad-asabin ibmar-ogumakar-ukleged-aila sobsad. Geb binnasur sogded:

“¡Oibosale, Bab-Jehová'ga iba-dummad anmar onomaloed!”

<sup>6</sup> Oibosgu, wakudaryalaba dulemar ailagi ibdurgan-ogumakar uksamalad, degine, gwenatigwar-guegala, ibmar uksamabalid. Geb mas gutemalad, gobdemalad. Bela galagwensuli wergudmalad.

<sup>7</sup> Geb degine, Bab-Jehová Moisés'ga sogded:

—Be nae, be aidena. Ar be-dulemar, Egipto-yargi be onosadi, nue-isgudmalad. <sup>8</sup> An-ega-Igar-uksadgi bato bangudmalad. Emide, or dusmalad, moli-bebe-nikad-sapingwagwadyob sobsamalad. A-molise Bab-Dummadyob ese gornanaid, Bab-Dummadyob ega ibmar-ogumakar uknanaid. Sogdemalad: ‘Israel-dulemar, we be-bab-dummagan-dake, we Egipto-yargi bemaronosad-dake.’

<sup>9</sup> Bab-Jehová Moisés'ga sogdebalid:

—We-Israel-dulemar an dakedi, nue dulemar-non-dutusurmaladid. <sup>10</sup> Degisoggu, emigindi be an-dako. An sae-itoged. We-dulemar an obelogoed. Bedina, wagan-bukidar-nikuega an be-imakoed.

<sup>11</sup> Geb degine, Moisés e-Bab-Dummad-Jehová-urwed-bargaegala, ega sogded:

—Bab-Jehová, ¿ar ibiga sae-itogedba bedulamar be obelodagoe? ¿Ar na be Egipto-yargi be-gangued-dutusulidba onossursi? <sup>12</sup> Ar ibiga Egipto-dulemar-weyob-sogega be imakoe: ‘Emide be dake, Bab-Dummad Egipto-yargi we-dulemar-onosad, yala-imbaba-oburgwega onosad. Bela we-napneggi-obelogega onosad.’ Melle be sae-itoge. Melle we-dulemar-obelogedgi binsae. <sup>13</sup> Be-maimar Abraham, Isaac, degi, Jacob, amar be ebinsae. Ar amarga be sogsa gusad, an ise-sogar sogye: ‘Niisgwamar-nibneggi-nanaidyob bewagan an bega omelogoye. Degin, be-waganga we-yarmar-nanaid degisadegu egadga guoye.’

<sup>14</sup> Geb degine, Bab-Dummad e-dulemar-obelogoye-sogsagusadi, emisgi sogdesunnad,

bar obelogosurye. <sup>15</sup> Geb degine, Moisés yarbirgi-gudiidi aidealid. Moisés akwa-matabogwad Bab-Dummad-Israel-Dulemarbo-Igar-Mesnайд narmakaledi e-argangi-sedani aidealid. Igar-Mesilesad akwa-matabogwadgi abinbela narmakaled. <sup>16</sup> Bab-Dummad akwa-matabogwad imaksad, degi, e-sunnad egi narmaksabalid.

<sup>17</sup> Geb degine, Josué dule-bukidar oimakeitoargu, Moisés'ga sogded:

—Dulemar danar-bukwadgi urwe-nana an itodo.

<sup>18</sup> Moisés, Josué'ga sogded:

—We-oimak-an-itogedi, bilagi-nakwisadyob gwen oimake an itosulid.

Bilagi-galakusadyob gwen oimake an itosur-balid.

An itogedi, dulemar namakmar an itodo.

<sup>19</sup> Moisés dulemar-bukwadse-aidenonigua, moli-bebe-nikad-sapingwagwad-sobaled dakded, degine, dulemar-dodonanai dakdebalid. Moisés deyob dakdegu, sae-itoded. E-argangi-akwa-matabogwad-ganikid binnasur meted. Yar-dikarba we-akwa-matabogwad mamarisad. <sup>20</sup> Geb degi, Moisés, moli-bebe-nikad-sapingwagwad-soblesad susad, geb ogumakega soogi balimet. Geb doo-doo imaksad, bela ubi-ubi-imakedse sasad. Geb degine, diigi mie-mie imaksad. A-diigi Israel-dulemar-ogobsad. <sup>21</sup> Geb Moisés Aarón'ga sogded:

—¿Igi we-dulemar be-imaksa? Emide be, we-dulemar dummad-isguega be imaksad.

<sup>22</sup> Aarón Moisés-abin sogded:

—Dummad, mer be anse urwe. Ar be wisid, we-dulemar unnila isguedginbi binsadidamalad.

<sup>23</sup> Ar we-dulemar anga sokarmalad: ‘Anmar-idu-nadap-guegala anmarga bab-dummagan be sobye. Ar ade, anmar wissuliddeeye, we-dule-Moisés Egipto-yargi-anmar-onosadi, igigusdibeye.’ <sup>24</sup> Geb degine, an ega sogdesunnad: ‘Dule or-nikadi, anga sedamalo.’ Agi anga or uksamarsunnad. Geb soogi an ormar meted. Geb degine, we-moli-bebe-nikad-sapingwagwad noarsunnad.

<sup>25</sup> Moisés dakdegu, dulemar geg na sambargamala, Aarón, gwen we-dulemar-sambargaega imaksasuli, deginbali, we-Israel-dulemala, e-isdarmalad-dodogedga gudoe, <sup>26</sup> degidbali, Moisés dulemar-danar-bukwad-dogedgi gwisgusad, amarga sogded: “Ar doamar Bab-Jehová’ba nanai-itomala, anse dagmalo.” Agi bela Levita-dulemar Moisés’ba akadmalad.

<sup>27</sup> Moisés amarga sogded:

“Weyob Israel-e-Bab-Dummad-Jehová soged: ‘Bela bemar na es-suid nasikmalo, dulemar-danar-danar-bukwadse gannar be namalo, dulemar-e-dordo-e-dordonegse be namalo. Be-gwenaddibe, be-aidibe, be-neg-dikarba-mamaiddibe, be oburgwemalo.’”

<sup>28</sup> Levita-dulemar Moisés-ega-sogsadba bela imaksamalad. A-ibagi, dulemar-milipaa-gubin (3,000) oburgwismalad. <sup>29</sup> Geb degine, Moisés Levita-dulemarga sogded:

“Emi-ibagi, bemar, be-masmalagi-aibichad-ular, be-gwenadgangi-aibichad-ular, Bab-Jehová’ga-arbaega be gunonimalad. Degisoggu,

Bab-Jehová, emi-ibagi, ise-nued bemargi binsanonimalad.”

<sup>30</sup> Degidgine, oibosgua, Moisés Israel-dulemarga sogded:

“Bemala nue-dummad-isgusmalad. Degi-inigwele, Bab-Dummadbo-igar-nabogegala, Bab-Jehová’se an nakwenaoed, abakalegi, Bab-Dummad nabir bemarga isgued-elialile.”

<sup>31</sup> Geb degine, Moisés Bab-Jehová’se gannar nonikid, ega sogded:

—Ar we-Israel-dulemar or-sobaled bab-dummadga-imaknonimargu, nue-dummad-isgunonimalad. <sup>32</sup> Degisoggu, Bab-Dummadye, we-dulemar-e-isgusad ega be eliena gadin. Ar degisulile, be-gardagi an-nug-narmakar-naid be elisunna.

<sup>33</sup> Bab-Jehová Moisés-abin sogded:

—Ar dule-angi-isgusadbi an-gardagi-e-nug-narmakar-naid an ei elioed. <sup>34</sup> Degisoggu, bedi be nae. We-dulemar an-bega-sogsad-yarse be sede. An-baliwitur be-idumai guoed. Ar dulemar-angi-isgusmaladdi, e-odurdakleged-ibagan-nonikile, e-isgusmaladba an a-dulemar sabsur-odurdakoed.

<sup>35</sup> Geb deyobi, Bab-Dummad-Jehová Aarón-moli-bebe-nikad-sapingwagwad-sobsad-ular, Israel-dulemargi boni-dummad barmialid.

## 33

### *Bab-Jehová igar-uksad be namarbarye*

<sup>1</sup> Geb Bab-Jehová Moisés’ga sogded:

“Emigindi, wegi be nae. Be Egipto-yargi-dulemar-onosadmala be nae. Abraham’ga,

Isaac'ga, degi, Jacob'ga an ise-sogar-sogsad, ‘we-yala an be-waganga ukedseye’, a-yarse be namala.

<sup>2</sup> Be-idugega an-baliwitur an bega barmidoed. Degine, we-dulemar an be-idi onioed:

Canaán-dulemar, Amorreo-dulemar, Het-dulemar,

Ferezeo-dulemar, Heveo-dulemar, Jebuseo-dulemar.

We-dulemar bela an be-iduar onogoed.

<sup>3</sup> ”Yar-gadi-ibmar-sanmakedse, napa-nuedse, be nao. Andi an bemarba barnaosulid. Ar bemardi uaya-gwen-niksurmaladsoggu, abakalegi igarba an bemar-obeloalile.”

<sup>4</sup> Israel-dulemar Bab-Dummad-weyob-soge itosmargu, bela bukib-itodmalad, ogormakdemalad. Degine, ormar-yeerdaklemalad bar nasissurmalad. <sup>5</sup> Ar Bab-Jehová Moisés'ga sogsad: “Israel-dulemarga be sogoye: ‘Bemar dulemar-uaya-gwen-niksurmaladye, nondutusurmaladye. Ar wis sikwas an bemarba naye sogelete, anse bemar osulolesmalye.’”

Bab-Jehová sogdebalid: “Israel-dulemarga be sogbalo: ‘Ormar-yeerdaklemalad ungemaloye. Sorba an dakoye, igi an bemar-imakodibeye.’”

<sup>6</sup> Degidbali, Horeb-yar-akar Israel-dulemar ormar-yeerdaklemalad bar yossumralad.

### *Bab-Dummad-dulebo-sunmaked-dordoneg*

<sup>7</sup> Moisés dordoneg sesagusad, geb dulemar-danar-danar-bukwad-magaba sisad. Adordoneg onug-imaksad: “Bab-Dummad-dulebo-sunmaked-dordonegye.” Ar dule Bab-Jehová'se idakbiele, dulemar-danar-danar-

bukwadgi noergebdaed, geb Bab-Dummad-dulebo-sunmaked-negse naddamalad.

<sup>8</sup> Moisés we-dordonegse nadele, bela dulemar e-dordoneg-yawagak-magaba gwisgusdamalad, Moisés Bab-Dummad-dulebo-sunmaked-dordonegse dogedse egi atakgwichidamalad.

<sup>9</sup> Moisés dordoneggi dogdèle, mogir-bubawaryob-gwichidi aideardaed, dordoneg-yawagakse aidenonidaed. Agine, Bab-Jehová Moisés'bo sunmakdeda. <sup>10</sup> Israel-dulemar dakdèle, mogir-bubawaryob-gwichidi dordoneg-yawagakgi aidenoniki, bela na e-neg-yawagakgi dulluu napase imakdedamalad, deyob Bab-Dummad-nug-ogannoddamalad.

<sup>11</sup> Igi-dule na e-ai-ebo sunmake, deyobi Bab-Jehová Moisés'bo asabin-asabin sunmakda. Geb Moisés, Bab-Dummad-ebo-sunmaksale, dulemar-danar-danar-bukwadse nonida. Degine, Moisés-e-bendaked-sapingwa Nun-machi-Josué'ye-nugad, we-dordoneggi gwen bangidisulid.

### *Bab-Jehová-e-gangued-yeerdakleged*

<sup>12</sup> Moisés Bab-Jehová'ga sogded:

—Emide be anga sognagu: ‘We-dulemar be sedye.’ Degite, be anga sog sulid, doa be anba barmidoe. Emide be anga sog balid: ‘An be-wisi be doa-gue, yeer an be-dake, be angi nueddae.’ <sup>13</sup> Ar degite, begi-nueddae be an-dakedde, emigindi, an bese wilesakwaa egissundo, be-ibmar-abeged be anga oyodo. Adi, an begi mer benguegar, nued be an-dakegar. Be insao, we-dulemar be-dula gumalad.

<sup>14</sup> Bab-Jehová Moisés'ga sogded:

—An-sunnad an beba gudioed. Ani an baisurito-gudii be-imakoed.

<sup>15</sup> Moisés Bab-Dummad-abin sogded:

—Ar be anmarba nasulile, melle wegi-naye be anmarga sogdo. <sup>16</sup> Ar be anmarba dagsulile, ¿ar igi-degite anmar wisguosunna, be anga ibmarsogsadi nue-napiraye?

“Ar be anmarba gudiirdi, adi, anmar magar daklemaloed, anmardi emaryobsurye, dulemarbamaladbo akarsailaye.”

<sup>17</sup> Bab-Jehová Moisés-abin sogded:

—Be-anga-sognaidi an bega imakodo. Ar an besabed, an be-wisid be doa-gue, ar be an-ai gued.

<sup>18</sup> Geb degine, Moisés Bab-Jehová’ga sogded:

—An bese wilesakwaa wis egised, be-gangued-yeerdakleged be anga oyoge.

<sup>19</sup> Bab-Jehová Moisés-abin sogded:

—Bela an-nueddaed an bega oyogoed. An-nug-Jehová-wisguega an be-imakoed. Ar doagi an nued binsabie, an egi nued binsaoed. Ar doa an wiledakbie, a-dule an wiledakoed.

<sup>20</sup> Bab-Jehová sogdebalid:

—Deki-inigwele, an-wagardi be dakosulid. Ar dule bipisaale an-wagar dakosurguoed. Dule an-wagar daksale, bar dula-gudii guosulid, burgoed.

<sup>21</sup> Geb degine, Bab-Jehová sogdebalid:

—Wegi, an-nagabasaar-akwasiid-birgi be gwisgue. <sup>22</sup> An-gangued-yeerdakleged be-asabinnadapidgi, akwa-mararmaid-gullugwadgi an be-ogwisguoed. An-argangi an be-ibya edugoed. Geb an begi-nasale, an-argan an oniroed. <sup>23</sup> Geb an-argan an onirisale, an-yarganbi be dakoed. An-wagardi, be dakosurguoed.

## 34

*Bab-Dummad Igar-Mesisad gannar obinosad  
(Deuteronomio 10:1-5)*

<sup>1</sup> Bab-Jehová Moisés'ga sogded:

“Be akwa-madareged-matabogwad iduar-be-marisgusadyob, be gannar sobbalo. A-akwa-matabogwadgi, an iduar-narmaksayob, gannar an narmakbaloed. <sup>2</sup> Degisoggu, banedse wakudaryalaba be Sinaí-yar-bur-birise naknao. A-yar-birse be anse nonikoed. <sup>3</sup> Dule-baid bipisaale beba nakosulid, dule-baid bipisaale, a-yargine, gudii guosurbalid. Deginbali, sibad-wawaadse-bakar, degi, moli-bebe-nikamaladse-bakale, bipisaale a-yar-walikaa gagan-manai guosurmalaad.”

<sup>4</sup> Moisés gebe-idaaledyobi akwa-matargwamatabo-nued sobsad. Geb degine, Moisés, Bab-Jehová-ega-sogsadba, wakudaryalaba gwisgualid, agi, Moisés akwa-matabogwad-semai Sinaí-yar-birse nakwided. <sup>5</sup> Geb degine, Bab-Jehová mogirba aidenonikid, Moisés'se walik-gunonikid. Geb Bab-Jehová e-nug-wisguega Moisés-imaksad.

<sup>6</sup> Bab-Jehová Moisés-asabin-nadapgua, binnasuli weyob sogded:

“¡Ani an Bab-Jehová gued!

¡Ani an Bab-Jehová gued!

Ani an Bab-Dummad-dutusulidid.

Ani an dulemar-wiledaked-dummarbadid,

Ani an nue-dulemar-wiledakedid.

Ani an wissur-gwae-gwae urwedid,

Ani an nue-dulemar-saberbadid.

An-ibmar-soged, napiragwadid.

**7** Ani an degisadegu dulemar-sabgumaiguadid.  
 Dule-ibmar-isgana-imaked ibmar-isgana-imaksuliyobi an dakedid.  
 Dule-angi-gwisgued, angi gwisgusuliyobi an dakedid.  
 Dulega an e-isgued elibalidid.

”Deki-inigwele, dule-nue-e-isgusadba, sabsur-odurdakleged-igardi an ega mesedsegad. Babgan-isgusar, e-mimmiganse-bakar, e-wagan, e-wagan-yokorsegadse-bakar, an sabsur-odurdakedsegad.”

**8** Geb degine, Moisés e-bebe-ebulegedse napase yog-e-wagar dulluu imaksad. Geb Bab-Jehová-nug-odummoded, weyob sogded:

**9** “Dummad, ar nue-napiragwale, an begi nueddae be an-dakele, be anmar-abargi be gudii imake. Dummad, an wisi, we-dulemar nue-uaya-gwen-niksurmaladid, nono-dutusurmaladid. Degi-inigwele, anmar-ibmar-isgana-imakmalad, anmar-isgued, anmarga be elie. Be-dulamarga be anmar-imake.”

*Bab-dummadyob-ibmar-imaklegedgi  
 sunmaklenaid  
 (Deuteronomio 7:1-6)*

**10** Bab-Jehová Moisés’ga sogded:

“Nue be itogo. Ani an bemarbo igar mesoed. Ani an bemar-abargi, dulemar-baiganga-gwen-ibmar-oyoledisulid, we-napneggi-ibmar-dakledisurmalad, an imakoed. Degine, bia be

dulemar-baigan-abargi be gudii gumaloe, adulemar ibmar-dakledisurmalad-an-bemarga-imakoed nue-dakmaloed. Ani, Bab-Jehová, ani an imakoed.

**11** "Emi an-bega-ibmar-sognaidba be nanadii guo. Be-asabinni an we-dulemar onogoed:

Amorreo-dulemar,  
Canaán-dulemar,  
Het-dulemar,  
Ferezeo-dulemar,  
Heveo-dulemar,  
Jebuseo-dulemar, an onogoed.

**12** "Canaán-yarse be dogsokalir, dulemar-a-yargi-bukmalad-ebo melle be igar-mesdii nanamalo. Ar deyob be imakmalale, sunna ese be yardaklemalad. **13** Dulemar-bukmaladibe e-bab-dummadgan-e-ailamar be earmalo, e-akwamar-bab-dummadga-sobarmalad e-ibe be omukumalo, degine, e-bab-dummad-bundor-Asera-sobaledi, bela e-ibe be osulomalo.

**14** "Ar ani Bab-Jehová gadi-nobgusoggu, baid-bab-dummagan-asabin be dulluu imakosurmalad. Ar Bab-Jehová, e-nug-nugadi Gadi-Nobguedye nugad.

**15** "Degisoggu, we-yargi dulemar-bukmalad-ebo melle be igar-mesdii nanamalo. Ar wemala, galagwensuli na e-bab-dummadba-nanaarmalar, eba-damalaga be imakdamaloed. Degi, e-bab-dummaganga ibmar-ogumakar-ukarmalar, ega be ukmarmoye, bega sogdamaloed. Degine, a-ibmar-e-bab-dummadga-uklesad-gunnega be imakdamaloed. **16** Degine, bemarga sogdamaloed: 'Anmar-sisgan be-masmalaga

be ukye.’ Ar we-omegan, galagwensuli e-bab-dummaganba-nanaarmalar, be-masmala galagwensuli e-bab-dummaganba-nanaega imakdamarmogoed.

<sup>17</sup> ”Melle be, or-dualed, mani-dualed, degi, esgoromar-soogi-dualed, bab-dummadga imakdii gumalo.”

*Birga-irba-ibamar-onolegoed-Igar*

(Éxodo 23:14-19; Deuteronomio 16:1-17)

<sup>18</sup> “Madu-E-Inasuli-Gulleged-Iba be onogoed. Ibagugle (7), madu e-inasuli, an-bega-sogsadba, an-bega-ibagan-uksadba be gunnoed. We-iba be Abib-niigi onogoed, ar ade, Abib-niigi bemar Egípto-yargi noargusmalad.

<sup>19</sup> ”Be-machi-gebesailagined, we angadga gued. Dagine, moli-bebe-nikad-macheredsailagined, sibad-wawaad-macheredsailagined angadga gubalid. <sup>20</sup> Moli-uayasuid-macheredsailagined angadga gubalid. Dagi-inigwele, a-muchubdi, sibad-wawaad-sapingwagwad be angaukoed. A-moli-uayasuid-sailagined-muchub sibad-wawaad be uksulile, moli-uayasuid-sailagined-dukar be bisgoed. Be-masmala-gebesailaginmalad-muchub mani be ukoed.

” ‘Dule-wargwensaale arganagwabi anse dago-sulid, anga ibmar-sedagergebed.’

<sup>21</sup> ”Ibanergwa (6) be arbaoed, ibagugledgindina (7) be obunnogoed. Amba ibmar-digedgindibe, ibmar-weedgindibe, amba be obunnogoed.

<sup>22</sup> ”Deginbali, be Itoged-ibaganga iba-dummad onobaloed. A-sogleged, orosgi-dakleged-trigo

gebe-weleged-ibaye. Deginé, birga-bergunai napi-ibmar-weleged-iba be onobaloed.

<sup>23</sup> "Birgagi ilapaa bela-machergan, an-asabin nonimaloed. Ani an, Dummad, Bab-Jehová, Israel-e-Bab-Dummad soged. <sup>24</sup> An bemar-idu dulemar-bukwadi, an bemarga onogoed, adi, bemar gatik yar-dummad nikuegar. Deyobi, birgagi ilapaa an-nug-odummogega be an-asabin-nanagwismalar; dulemar bemar-annik be-nainumar suosulid.

<sup>25</sup> "Melle ibmar-ogumakar-ukleged-e-abe, madu-in-a-nikad-ebo-mesa be anga ukmalo. Deginé, bemar Oburgwilegoenad-Iba-onogedgi mas-gwabgusad banedga be sabogosurmarbalid.

<sup>26</sup> "Be-Bab-Dummad-Jehová'se-goled-negse be-nainugi-gebe-ibmar-welesad be sedoed.

'Melle sibad-e-mimmi e-nan-nunisgi be du-malo.'

### *Moisés Bab-Dummad-Igar narmaksad*

<sup>27</sup> Bab-Jehová Moisés'ga sogded: "We an-bega-sogsad be narmake. Ar we-an-bega-sogsadba an beborgwa, degine, Israel-dulemborgwa, an Igar mesnaid."

<sup>28</sup> Geb Moisés Bab-Jehová'bogwa iba-dulabo (40) ibginedba, mutikidba gudii gusad. Moisés a-ibgangi mas-guchasulid, gobsasurbalid. Agi, Moisés akwa-matargwagwadgi Bab-Dummad-Israel-dulemborgwa-Igar-Mesnaid-Ambegwadi (10) narmaksad.

### *Moisés-wagar dakar-dakar dakleged*

<sup>29</sup> A-sorbali, Moisés Sinaí-yargi-gudiidgi-aideargu, akwa-matargwagwad-matabogwadgi Bab-Dummad-Israel-dulemarbo-Igar-narmakar-mesisad e-argangi sedanigusad. Ar Moisés'di, Bab-Dummadbo-sunmaksadbali, yar-birgi-aidedanigu, e-wagar dakar-dakar-gadanikid wissulid. <sup>30</sup> Aarón, degi, bela Israel-dulemala, Moisés-dakdemargu, Moisés-wagar dakar-dakar-daklege, bela dobbee-itonadmalad, bar ese warmakbi guarsumalad. <sup>31</sup> Geb degine, Moisés Israel-dulemarse gochad. Aarón, degi, bela Israel-dulemar-danar-danar-bukwad-e-dummagan Moisés'se warmaknonimalad. Geb agi, Moisés amarga sunmaksad. <sup>32</sup> Geb degine, bela Israel-dulemar Moisés'se nonimarmogad. Agine, Moisés bela Bab-Jehová-Sinaí-yargi-ega-ibmar-sogsad amarga sogsamogad. <sup>33</sup> Moisés Israel-dulemar-ebo-sunmaknaid-bergusgua, na e-wagar muswegi edusad.

<sup>34</sup> Moisés Bab-Jehová-ebo-sunmakega ese nadele, e-wagargi muswe-naidi ungedaed. Geb noalile, gannar muswe e-wagargi nasikdaed. Geb degine, Moisés Israel-dulemarga sogdedaed, igi Bab-Dummad ega ibmar sogsad. <sup>35</sup> Israel-dulemar Moisés-wagar-dakdele, dakdedamalad, Moisés-wagar dakar-dakar gae. Geb degine, Moisés Bab-Dummad-ebo-sunmakedse gannar muswegi na e-wagar eduddasunnad.

## 6. BAB-DUMMADSE-GOLED-NEG-SUNNA-SELEGED

*Obunnoleged-iba, iba-islidikidid  
(Éxodo 31:12-17)*

<sup>1</sup> Moisés bela Israel-dulemarse gochad, geb degine amarga sogded: “Weyob Bab-Jehová igar uksad, weyob be imakmaloye: <sup>2</sup> Ibanergwa (6) arbalegoed, ibagugledgindi (7), iba-islidikidid. A-ibagi, Bab-Jehová’ga obunnolegoed. Ar doa-dule a-ibagi arbaele, we-dule oburgwilegoed. <sup>3</sup> Bemarneg-yagine, bipisaale obunnoged-ibagi soo beogaosurmalad.”

*Bab-Dummadse-goled-neg-sunna-seleged-soblegoedga ibmar-ukleged*

*(Éxodo 25:1-9)*

<sup>4</sup> Moisés, bela Israel-dulemar-danar-ambikunonikidga weyob sunmaksad: “Bab-Jehová sogsad: ‘Weyob be imakmaloye: <sup>5</sup> Bemar ibmar-nikadi Bab-Jehová’ga be sedamaloed. Dulemar na e-gwagegi ibmar Bab-Jehová’ga ukbi-itomaladba ibmar sedagoed. We-ibmarmar sedagoed:

Olo, mani, esgoro-gordikid.

<sup>6</sup> Nirbadub-arad, nirbadub-suir-akwagiid, nirbadub-ginnid,

lino’dub-nued, sibad-e-absarmar,

<sup>7</sup> sibad-wawaad-machered-e-ukamar-ginnidgi-odolegaled,

ibdurgan-uka-nuegan,

urgomar-acacia’ye-nugad.

<sup>8</sup> Olivo-gwallu gwallu-ogaegar.

Gwallu-wawad ibmar-magega guegar, degi, olivo-gwallu ina-wawadikmaladgi ebulegegar.

**9** Akwa-nuegan-ónice'ye-nugmalad,  
 akwa-nuegan mor-efod'ye-nugad-birgi  
 nasikegar,  
 degi, mor-binasgargi-nasiklegedgi  
 nasikegarbar.' ”

*Bab-Dummadse-goled-neggi-ibmar-  
 ebulemalad*  
 (Éxodo 39:32-43)

**10** Moisés Israel-dulemarga sogdebalid: “Bela Bab-Jehová-ibmar-sogsad-sobmalaga, bela dulemar bemar-abargi nue-ibmar-wisi-sobemalad nonimalo. **11** Amar we-ibmarmar sobmaloed:  
 Bab-Dummadse-goled-neg-sunna-seleged,  
 e-neg-sunnad, e-uas-mormar,  
 e-mor-gamalad, e-urgomar,  
 e-suarmar, e-buarmar, e-signalad.

**12** ”Deginbali, sobmarbaloed:  
 Bab-Dummad-Israel-Dulemarbo-Igar-Mesisad-  
 Ulu,  
 e-suarmar, e-eduged,  
 mor-dummad-Ulu-walik-naguoed.

**13** ”Deginbali, sobmarbaloed:  
 Mese, mese-suarmar,  
 bela mesigi-ibmar-ebulemalad,  
 degi, madu-Bab-Dummadga-ukleged.

**14** ”Sobmarbaloed:  
 Gwallu-sied, degi, bela eba ibmarmar-ebulegoed.  
 E-gwallumar, degi, olivo-gwallu gwallu-  
 ogaegar.

**15** ”Sobmarbaloed:  
 Ina-wawadikid-incienso'ye-nugad-ogumakleged-  
 aila, degi, e-suarmar.  
 Gwallu-wawa ibmar-magega ebuleged,

ina-wawadikmalad.  
 Mormar-dummagan Neg-Sunna-Seleged-e-  
 yawagak-dogedgi-naguoed.

**16** ”Sobmarbaloed:  
 Bab-Dummadga-ibmar-ogumakar-ukleged-aila,  
 e-esgoro-gordikmalad-biir-biir-megoed,  
 degi, e-suarmar, bela eba-ibmarmar-  
 ebulegoed.

Dii-sied-esgoro-gordikidbiid,  
 degi, a-e-malimar.

**17** ”Sobmarbaloed:  
 Bab-Dummadse-goled-neg-sunna-seleged-e-  
 galugi mormar-dummagan-ebirmaloed,  
 e-buarmar, e-sigmalad.

We-neg-sunna-seleged-e-neg-e-galu-dogedgi mor-  
 dummad-naguoed.

**18** We-neg-e-bargamalad, e-galu-bargamalad,  
 e-dubmar sobmaloed.

**19** Aarón’ga, degi, Aarón-masmalaga,  
 Bab-Dummadse-goled-neggi-mormar-  
 ebulemaloed sobmarbaloed.  
 Bela we-ibmarmar sobmaloed.”

*Israel-dulemar      Bab-Dummadga      ibmar  
 uksamalad*

**20** Degidgine, bela Israel-dulemar Moisés-asabin-  
 bukmaladi ainiarmalad.

**21** Bela dulemala, bela na e-gwagegi-ibmar-ukbi-  
 itosmaladi,  
 Bab-Dummad-dulemarbo-ambikued-neg-  
 sobmalaga,  
 agi-bela-ibmarmar-ebulemalad-sobmalaga,  
 degine, dule-irwa-Bab-Dummadse-goledgi  
 mor-islidikid-yomalad-sobmalaga,  
 Bab-Jehová’ga ibmar searmalad.

- 22 Bela ibmar-ukbi-itosomaladi, machergan,  
degı, omegan-ugakse, we-ibmarmar  
senonimalad:  
Ordub, oluamar,  
sakwagi-ormar-nagumalad,  
argangi-or-yolemalad,  
degı, bela ormar-galagwensuli senonimalad.  
Belagwable Israel-dulemala Bab-  
Jehová'ga or senonimalad.
- 23 Bela dulemar nirbadub-arad-nikamalad,  
nirbadub-suir-akwagiid, nirbadub-ginnid,  
lino'dub-nued, sibad-e-absarmar,  
sibad-wawaad-macheder-e-ukamar-  
ginnidgi-odolegaled,  
ibdurgan-uka-nuegan, senonimalad.  
Bela-dulemar we-ibmar-nikamaladi,  
Bab-Dummadga-ukega senonimalad.
- 24 Bab-Dummadse-goled-neg-sunna-selegedgi  
ebulegega,  
dulemar mani-nikamaladi,  
esgoro-gordikid-nikamaladi, Bab-Jehová'ga  
ukdemalad.  
Degin, urgomar-acacia'ye-nugad-  
nikamaladi, ukdemarmogad.
- 25 Deginbali, omegan-ibmar-nue-wisimalad, e-  
argangi-dub-sobsamaladi, Bab-Dummadga  
senonimalad:  
Nirba-dub-aradgi-sobsamalad,  
nirbadub-suir-akwagiidgi-sobsamalad,  
nirbadub-ginnidgi-sobsamalad,  
degı, lino'dub-nuedgi-sobsamalad,  
senonimalad.
- 26 Bela omegan ibmar-nue-imakmaladi, e-  
gwagegi nue-imakbi-itosomaladi,

sibad-e-absarmar sobsamarmogad.

- <sup>27</sup> Israel-dulemar-dummaganga-gudidimaladi,  
akwa-nuegan-ónice'ye-nugad,  
degi, akwamar-nuegan,  
mor-efod'ye-nugadgi-nasikmalaga,  
degi, mor-binasgargi-nasikleged-birgi-  
nasikmalaga, senonimalad.

<sup>28</sup> Deginbali, we-ibmarmar senonimarbalid:  
Ina-nuegan,  
olivo-gwallu gwallu-ogaegar,  
gwallu-wawad ibmar-magegar,  
degi, ina-wawadikmalad obupurmakegar.

<sup>29</sup> Bela Israel-dulemar, machergan, degi,  
omeganse-bakale, na gwagegi-ibmar-ukbi-  
itosmaladi, Bab-Jehová'ga na e-itogedba-ibmar-  
ukega senonimalad, adi, Bab-Jehová'ga ibmarmar  
sobegar.

Ar igi Bab-Jehová-Moisés'ga-sogsagusa, deyob  
imaksamalad.

*Bezaleel, degi, Aholiab, arbaega sulesmalad*

*(Éxodo 31:1-11)*

<sup>30</sup> Geb degine, Moisés Israel-dulemarga sogded:  
“Nue be an-itomalo. Bab-Jehová, Uri-machi-  
Bezaleel onugsasad. Bezaleel’de, Hur-e-wagwad.  
E-dad-dummad-Judá’gi danikidid.

<sup>31</sup> Bab-Dummad Bezaleel’ga E-Burba uksad,  
nue-binsaed-nikaa guegar,  
nue-ibmar-mag-ito guegar,  
nue-ibmar-wisi guegar,  
degi, ibmar-akar-akar-obinyegar.  
<sup>32</sup> Adi, ibmar-yeerdakle orgi-sobegar,  
manigi-sobegar,

esgoro-gordikidgi-sobegar.

**33** Deginbali, nabir akwa-nuegangi-arbaegar,  
akwa-nuegan ibmar-birgi siegar,  
nabir urgomargi-arbaegar,  
degi, galagwensuli ibmar-yeerdakle  
imakegar.

**34** ”Bab-Dummad Bezaleel’ga, degi, Aholiab’ga  
nabir-dulemar-odurdaked-gurgin uksad. Aholiab  
Ahisamac-e-machid, e-dad-dummad-Dan’gi  
danikidid.

**35** Bab-Dummad Bezaleel’ga, degi, Aholiab’ga, we-  
gurginmar uksad:

Nabir baisursunna-ibmar-imaked,  
nabir-ibmar-onoged,  
nabir nirbadub-aradgi-ibmar-sobed,  
nabir-nirbadub-suir-akwagiidgi-ibmar-  
sobed,  
nabir-nirbadub-ginnidgi-ibmar-sobed,  
nabir-lino’dub-nuedgi-ibmar-sobed-gurgin,  
uksabalid.

We-dulemala, ibmar-yeerdakle sobmala-  
did, mormargi arbamaladid,  
degi, nabir na-e-itolegedba sunna ibmar-  
akar-akar onomaladid.”

## 36

### *Ibmar-welesad unnigualed*

**1** Moisés sogdebalid: “Degisoggu, Bezaleel,  
Aholiab’bogwa, Bab-Jehová-sogsagusadba Bab-  
Dummadse-goled-neg-sunna-selegedgi ibmar-  
ebulemalad bela imakmaloed. Deginbali, bela

dulemar, Bab-Jehová nue-wisi-ibmar-sobega-imaksamarmogadi, degi, ega baisursunna-ibmar-imakega-imaklesbalidi, Bab-Dummadse-goled-neg-sunna-seleged-sobega, wemar-ebogwadba arbamarmogoed.”

<sup>2</sup> Moisés, we-dulemarse gochad:

Bezaleel’sé, Aholiab’sé,  
degi, bela dule-ibmar-nue-wisi baisursunna-ibmar-imakmaladse gochad.

We-dulemar na e-itolegedba arbaega nonimalad.

<sup>3</sup> Moisés we-dulemarga Israel-dulemar-ibmarmar-senonikid uksad. Adi, agi we-dulemar Bab-Dummadse-goled-neg-sunna-selegedgi ibmar-ebulemaloed sobegar. Israel-dulemala na e-itolegedba bane-bane wakudaryalaba Bab-Dummadga-ibmar-ukega ibmarmar senonidamalad. <sup>4</sup> Bela-dulemar-ibmar-sobnanaid deyob dakdegua, e-arbaed indaksamalad. <sup>5</sup> Geb Moisés’ga sognadmalad: “Dulemar Bab-Jehová-sogsadba-ibmar-sobega ibmar-berbelemaid doggus wilub-obichagusad. Emide, ibmar ise-obinagwaled.”

<sup>6</sup> Degisoggu, Moisés dulemar-bukwadse gayabarmisad: “Machergan, degi, omegan, Bab-Dummad-neg-sobega melle bar ibmar amimalo, melle bar Bab-Jehová’ga ibmar sedamalo.” <sup>7</sup> Ar ibmar-sobmalaga, bato ibmarmar unnigualed. Ar ise-obinagwarsoggu, dulemar ibmar-baid bar senonisurmalad.

*Bab-Dummadse-goled-neg-sunna-seleged  
soblesad*  
(Éxodo 26:1-37)

<sup>8</sup> Bela dulemar-arbananaid, napiragwadbur-ibmar-sobmalad, Bab-Dummadse-goled-neg-sunna-seleged sobsamalad. We-dulemar, lino'dub-nuedgi, nirbadub-aradgi, nirbadub-suir-akwagiidgi, degi, nirbadub-ginnidgi mordummagan-goambe (10) sobsamalad. Agi baliwitur-dummagan-querubin'ye-nugad bela nue-yeerdakle-imakar mor-dummagangi-nai sobsamarbalid.

<sup>9</sup> Mormar-e-sugued, daligugledbi (7) imaksamalad, e-matardungueddi, daligwenadbi imaksamalad. Mormala bela emarbi-dungu imaksamalad.

<sup>10</sup> Mormar-dummagan goatale gwadismalad, amba deyob baid goatale gwadismarbalid.

<sup>11</sup> Degine, mor-goataled-gwadialed-e-dikargi e-uayamar dub-aradgi ega nasiklesad. Amba deyob mormar-baigan goatarmalad-gwadiarmalad-e-dikargi nasiklesbalid.

<sup>12</sup> Mormar-gebedgi gwadulabo-gakambe (50) e-uayamar nasiksamalad. Degine, baigan-goatar-gwadiarmaladgi gwadulabo-gakambe (50) e-uayamar nasiksamarbalid. Degisoggu, e-uayamar na abin-abin nasiklesad.

<sup>13</sup> Deginbali, mor-gaed-orbiid dulabo-gakambe (50) sobsamarbalid. Agi mormar oatosmalad. Degisoggu, Bab-Dummadse-goled-neg-sunna-seleged-e-mor-dummagan unnila gogwenayob gunonisunnad.

<sup>14</sup> We-dulemar, Bab-Dummadse-goled-neg-sunna-seleged-edugega, sibad-absarmargi mor-dummagan sobsamalad. Sibad-absarmar

mor-dummaganga goambe-gakagwensak (11)  
imaksamalad.

<sup>15</sup> Mormar-dummagan-goambe-gakagwensakad (11) bela na-emarbi-dungu imaksamalad. Mormar-e-sugued, daligugle-gaka-abala (7½) sugued. E-matardungueddi, daligwenad. <sup>16</sup> We-mormar-dummagan, goatar gwadismalad. Degine, baiddi, goanergwa (6) gwadismalad.

<sup>17</sup> Geb a-sorba, mor-dummagan-goatar-gwadilealed-dikarba, gwadulabo-gakambe (50) e-uayamar nasiksamalad. Amba deyob baigan-gwadilesmalad-dikarba, gwadulabo-gakambe (50) e-uayamar nasiksamarbalid.

<sup>18</sup> Deginbali, esgoro-gordikidgi mor-gaed dulabo-gakambe (50) soblesbalid, adi, agi bela neg-edugegar, unnila gogwennayob gunonisunnad.

<sup>19</sup> Geb degine, Bab-Dummadse-goled-neg-sunna-seleged-edugega, sibad-wawaad-machered-e-ukamar-ginnidgi-odolegaled, gwadi-gwadi imaksamarbalid. Adi, sibad-absarmor-dummagan-birgi ogillegegar. Geb sibad-wawaad-machered-e-ukamar-ginnidgi-odolegaled-birgi ogillegega, ibdurgan-uka-nuegan gwadi-gwadi imaksamarbalid.

<sup>20</sup> Deginbali, Bab-Dummadse-goled-neg-sunna-selegedga urgomar-acacia'ye-nugad sobsamalad. We-urgomala, bela nue-innikii ogwichismalad.

<sup>21</sup> We-urgomar, dalibo-abala-sugu imaksamalad. E-matardungueddi, achapaa-nika imaksamalad.

<sup>22</sup> We-urgomargi, e-nagmar war-warbo-nika imaksamalad, adi, nabir urgomar naga-nagaba

matak-matak gwisguegar. Bab-Dummadse-goled-neg-sunna-selegedga bela degibi urgamar imaksamalad.

<sup>23</sup> Weyob Bab-Dummadse-goled-neg-sunna-selegedga urgamar-mergu imaksamalad:

Mata-dulagwen (20) dad-nakwed-argan-nuedsik-ebugegar.

<sup>24</sup> We-urgamar-dulagwenad-urba (20), dulabo (40) e-sigmalad manibi sobsad. Urgomar-irbali gwa-gwabo e-sigmalad imaksamalad, adi, urgamar-e-nagmar agi odogegar.

<sup>25</sup> Bab-Dummadse-goled-neg-sunna-seleged dad-nakwed-argan-sapiledsik-ebugegala, urgamar-dulagwen (20) sobsamarbalid.

<sup>26</sup> E-sigmalad, manibii gwadulabo (40) sobsamarbalid. Urgomar-iliba, gwa-gwabo e-sigmalad sobsamalad.

<sup>27</sup> Bab-Dummadse-goled-neg-sunna-seleged dad-argwanedsikidga urgamar-matanergwa (6) sobsamalad.

<sup>28</sup> Bab-Dummadse-goled-neg-sunna-seleged na abingunanaidga urgamar-matabo sobsamarbalid.

<sup>29</sup> We-urgamar darbo oatosmalad. Geb birgi e-nonogi or-dummad-naid yosmalad, adi, melle bar urgo-matabogwad-ungega, weyobi imaksamalad.

<sup>30</sup> Degisoggu, urgamar bela matabaabak (8) sobsamalad, e-sigid-mani-biid gwaambe-gakanergwa (16) sobsamalad. Bela urgamar-iliba, e-sigmalad gwa-gwabo sobsamalad.

<sup>31</sup> Deginbali, urgo-warakwagana-acacia'yenugad sobsamarbalid: Urgo-warakwagana-walatar Bab-Dummadse-goled-neg-sunna-

seleged-e-dikar-soggwensikidga      sobsamalad.  
 32-33 Degin, baid-dikarsikidga, walatar  
 sobsamarbalid, degine, e-dikar-yargansikid-dad-  
 argwanedsikidga urgo-warakwagana walatar  
 sobsamarbalid. 34 Urgomar-ebilis egi ormar  
 matak-matak nasiksamalad, degine, e-oluad-  
 dummagandi orbi sobsamalad. Degin, Urgo-  
 warakwagana-ebilis egi ormar matak-matak  
 nasiksamarbalid.

35 Deginbali, mor-dummad nirbadub-aradgi,  
 nirbadub-suir-akwagiidgi, nirbadub-ginnidgi,  
 degi, lino'dub-nuedgi sobsamalad. We-mor-  
 dummadde nue-yeerdakle-imakar, baliwiturmär-  
 querubin'ye-nugad egi-sobar imaksamalad.  
 36 We-mor-dummad-nasikegala, acacia-buarmär-  
 walabake ogwichismalad. A-buarmär-ebilis,  
 egi ormar matak-matak nasiksamalad. Degin,  
 mor-gamalad bela orbi sobsabalid. Deginbali,  
 buarmär-e-gaed, adi, gwabake manibi sobsad.

37 Deginbali, Bab-Dummadse-goled-neg-  
 sunna-seleged-yawagakga      mor-dummad  
 imaksamarbalid, nirbadub-aradgi, nirbadub-  
 suir-akwagiidgi, nirbadub-ginnidgi, degi,  
 lino'dub-nuedgi imaksamalad. We-mor-  
 dummadde, nue-yeerdakle imakaled. 38 A-  
 yawagakgindi, buarmär-walatar ogwichismalad,  
 degine, mor-gamalad sobsabalid. A-buarmär-  
 ebilis egi ormar matak-matak nasiksad, degine,  
 e-sigid-gwaataledi, esgoro-gordikidgi sobsad.

*Bab-Dummad-Dulemarbo-Igar-Mesisad-Ulu-soblesad  
(Éxodo 25:10-22)*

<sup>1</sup> Bezaleel, Bab-Dummad-Dulemarbo-Igar-Mesisad-Ulu urgomaar-acacia'ye-nugadgi sobsad. E-suguedi, achaatar, e-matardungued, achapaa, degine, e-nibgued, achapaa-nibgu sobsad. <sup>2</sup> Yaba, olo-nued-sunnabi nasiksad. Birgi, deyob olo-sunnabi egi nasiksabalid. Birgi, bela-ebiris e-mullugwad olobi nasiksabalid. <sup>3</sup> Deginbali, olua-dummagan-gwabake-sobega or dusbalid. Adi, ulu-e-dikar-bergunaid-sogbakegwadgi gwa-gwagwen nasikegar. Olasu-gwabo dikar-gwensaksik-nasikega sobsad. Baid-dikarba, gwabo-nasikega sobsabalid. <sup>4</sup> Deginbali, urgo-acacia'ye-nugad suitii warbo imaksabalid. We-suarmar-walaganagi or ebiris nasiksad. <sup>5</sup> Dagine suarmar-walagana-suid ulugi olasu-dummagan-nanaid-yaba odosmalad, adi, nabir ulu selegegar.

<sup>6</sup> Deginbali, ulu-edugedga or-nued imaksabalid. E-sugued, achaatar-nika imaksad, e-matardungueddi, achapaa-nika imaksad. <sup>7</sup> Dagine, ulu-eduged-birgi, e-dukusik-e-dukusik-ogwisguega, baliwitur-dummagan-querubin'ye-nugad walabo orbi mardogi binna-binna sobsad. <sup>8</sup> Baliwitur-dummagan-querubin ulu-eduged-birgi gwensak e-dukusik sobsad. Baid e-dukusik, deyob sobsabalid. Ulu-edugedba-mesa querubin-warbogwad, ulu-eduged-e-duku-dukusik gwigwichi sobsad. <sup>9</sup> Querubin'mala ulu-eduged-birgi asabin-asabin sakan-nallaa gwismalad. E-sakangine, ulu-eduged odukunanaid. E-wagardi, ulu-edugedgi ataknanaid.

*Bab-Dummadga-madu-ukleged-mese-soblesad  
(Éxodo 25:23-30)*

**10** Deginbali, Bezaleel, urgo-acacia'ye-nugadgi mese-sobsabalid. E-sugued, achabake-nika imaksad, e-matardungued, achabo, e-nibgueddi, achapaa-nika imaksabalid. **11** Bela we-mesegi or-nued nasiksad, degine, bela e-dikarba ebilis or mulluu mesisbalid. **12** Deginbali, mese-e-dikar-bela-ebilis wis-nibakwasaar e-matardungued argan-matagwen imaksad. Nibakwaa-imaksad-birgi, or mulluu mesisad. **13** Deginbali, oluaduk-dummagan-gwabake-sobega, ormar dusbalid. We-oluaduk-dummagan-gwabakegwadi, mese-dikar-sogabake-abingunanaidgi nasiksad. E-malimar-walabakegwad-iliba nasiksad. **14** Mese-gakuli-mulluu-mesilesad-urba, oluaduk-dummagan-gwabake-nasiksadgi suarmar-suid ododamalad, adi, nabir mese selegegar.

**15** Mese-selegega, suar-acacia'ye-nugad-walagana suitii imaksamalad. A-birgi, bela ebiris or nasiksamalad. **16** Deginbali, Bezaleel, mese-birgi ibmarmar-sigoedi, or-sunnabi sobsabalid: Batemar, bate-dummagan, bormomar. Degine, nog-dummagan Bab-Dummadga-ibmar-diregwad-uklegega sobsabalid.

*Gwallu-sied-orbiid-soblesad  
(Éxodo 25:31-40)*

**17** Deginbali, gwallu-sied orbi sobsabalid, mardogi binna-sarsoar sobsad. E-mali, e-sakwamar, e-nogmar, e-abingamalad, e-dutumar, bela-wemar unnila soggwenna gued. **18** Gwallu-siedgi e-dikarba walanergwa (6) e-sakwamar

nonanaid. Gwensaksik, e-sakwa-warbaa nonaid. Baidsik, e-sakwa warbaa nonaibalid. <sup>19</sup> E-sakwa-wargwengi e-nogmar-gwapaa nurnatargana-e-dutuyob-dakle imaksad. Degin, dutu-abingaed-nika, geb, e-dutu-nika imaksad. Deyob, e-sakwamar-bamaladgine imaksabalid. <sup>20</sup> Gwallu-sied-e-wargi, nogmar gwabake nurnatargana-e-dutudaklegeyob sobsad. Degi, e-noggi e-dutu-abingamalad, degi, e-dutumar sobsabalid. <sup>21</sup> Gwallu-sied-e-sakwa-warbogwad e-wargi-yolenaidgi e-abingaed-gwagwen, sobsad, deginbali, e-abingaed-baid-gwagwen, e-sakwa-warbogwad-baid-urba sobsabalid, deginbali, amba abingaed-baid-gwagwen e-sakwa-warbogwad-baid-urba sobsabalid. Degibi gwallu-sied e-sakwa-walanergwad-urba imaksad. <sup>22</sup> E-dutu-abingamalad, degi, e-sakwamala, unnila bela gwennaa or-nuedbi-imakaled. Soblesadi, mardogi binnaa-sarsogar soblesad.

<sup>23</sup> Deginbali, e-gwallu-gwagugled (7) bela or-nuedbi imaksabalid. E-gwillodub-sikmalad, degi, e-bate-burwigana bela or-nuedbi imaksabalid.

<sup>24</sup> Or-nued-aidikued nibir-dulapaa-gakambe-gakabake (74) ebusad, bela e-ibmar-burwiganase-bakar deyob aidiku imaksad.

### *Ina-wawadikid-ogumaked-aila-soblesad*

(Éxodo 30:1-10)

<sup>25</sup> Deginbali, Bezaleel ina-wawadikid-ogumaked-aila sobsabalid. A-aila-sobegala, urgomaar-acacia'ye-nugad ebusad. E-sugued achabo, e-matardungued achabo-nika sobsad.

E-suguedi, e-matardunguedbo, emar dungued. E-nibgueddi, dali-abala nibgued. E-moli-bebegiid-gwichid ailaba-mesa imakaled. <sup>26</sup> Or-nued aila-birgi, aila-dikarba, degi, e-moli-bebegiidgi nasiksad, degine, e-dikar-ebilis or mulluu mesisad. <sup>27</sup> Deginbali, or-mullugalad-urba, olua-dummagan gwabo e-dikarmargi nasiksad. Deyob abinbela nasiksad, adi, agi nabir suarmar-suitigwad odogegar, nabir selegegar. <sup>28</sup> Weurgomar-suitigwad urgo-acacia'ye-nugadgi sobsamalad. Geb a-birgine, or nasiksamalad.

<sup>29</sup> Deginbali, gwallu-wawa-islidikid ibmar-magega-ebuleged imaksabalid. Degin, inawadikmalad-ibmarba-oburarsulid, yeer-yapanmalad, dule-ina-wawad-sobmaladyob imaksamalad.

## 38

### *Ibmar-ogumakar-ukleged-aila-soblesad*

(Éxodo 27:1-8)

<sup>1</sup> Deginbali, Bezaleel urgo-acacia'ye-nugadgi Bab-Dummadga-ibmar-ogumakar-ukleged-aila sobsabalid. E-sugued, daligwen-gaka-achabo, e-matardungued, daligwen-gaka-achabo-nika sobsad. E-sugued, degi, e-matardungued, emarbi imaksad. E-nibgueddi, bisgipaa-nika imaksad.

<sup>2</sup> We-aila mullugwad-sogabake-abingunaidgi moli-bebegiid ogwichisad. We-moli-bebegiid ailaba-mesa sobsad. Bab-Dummadga-ibmar-ogumakar-ukleged-aila-birgi esgoro-gordikid egi nasiksad. <sup>3</sup> Deginbali, bela Bab-Dummadga-ibmar-ogumakar-ukleged-ailagi we-ibmar-ebulemaloed sobsabalid:

Buru-simalad-bormomar.  
 Buru-weemalad-wesar-dummagan,  
 Abe-bomied-nog-dummagan.  
 San-obin-obin-saed-iko-dummagan.  
 Soo-seed-bormomar.  
 Bela-wemala esgoro-gordikidgi sobsad.

<sup>4</sup> Bab-Dummadga-ibmar-ogumakar-ukleged-ailaga, san-nared-saki-sakid esgoro-gordikidgi sobsad. We-san-nared-saki-sakid Bab-Dummadga-ibmar-ogumakar-ukleged-aila-yagi, negabaladgi nasiksad. <sup>5</sup> Deginbali, oluad-dummagan-sobega esgoro-gordikid dusbalid. Deyob imaksad, adi, san-nared-saki-sakidgi we-olua-dummagan-gwabake nasitega, adi, agi suarmar-suigan odogegar. <sup>6</sup> Urgo-acacia'ye-nugad-walagana suitii sobsad. Geb a-suarmar-birgi, esgoro-gordikid nasiksad. <sup>7</sup> Geb degine, Bab-Dummadga-ibmar-ogumakar-ukleged-aila-dikarba oluaduk-dummagan-nanaid-yaba suarmar-walagana odosad, adi, nabir aila selegegar. Bab-Dummadga-ibmar-ogumakar-ukleged-aila ollor sobaled. We-aila urgomargi sobaled.

### *Dii-sied-soblesad*

<sup>8</sup> Bezaleel, dii-sied, degi, e-sigedga-gued, esgoro-gordikidgi sobsabalid. We-sobegala, omegan-Bab-Dummadse-goled-neggi-arbamalad e-isbemar-esgoro-gordikidgi-sobaled ebusad.

### *Bab-Dummadse-goled-e-imba-nasiklesad*

(Éxodo 27:9-19)

<sup>9</sup> Bezaleel, Bab-Dummadse-goled-neg-sunna-seleged-e-neg-imba, degi, e-galu sobsabalid.

- Dad-nakwed-argan-nuedsik, a-neg-imba-e-galuga, mor-dummagan imaksad:  
 Lino-mor-nued dali-dulagwen-gakatar-sugu (25), sobsad.
- <sup>10</sup> E-buarmar, dulagwen (20) mergued.  
 Egi-sigmalad, dulagwen (20) mergubalid, bela esgoro-gordikidgi sobaled.  
 Buarmar-e-nonomar, e-gamalad, bela manibi sobaled.
- <sup>11</sup> Bab-Dummadse-goled-neg-sunna-selegedgi dad-nakwed-argan-sapiledsik, mor-dummad dali-dulagwen-gakatar-sugu (25) naibalid.  
 E-buarmar, dulagwen (20) gwigwisbalid.  
 Degi, e-sigmalad esgoro-gordikidgi dulagwen (20) imakarbalid.  
 E-gamalad, degine, e-buar-nonomar, manigi soberbalid.
- <sup>12</sup> Dad-argwanedsik mor-dummad-naidi, daliambe-gakabo-abala (12½) sugued.  
 E-buarmar, warambe (10) gwigwichid, degi, e-sigid, gwaambebalid (10).  
 E-gamalad, degi, e-buar-nonomar, manigi soberbalid.
- <sup>13</sup> Dad-nakwedsik mor-dummad-naidi, daliambe-gakabo-abala (12½) sugued.
- <sup>14</sup> E-yawagak-dikarsiki, mor-dummad-naidi, dalipaa-gaka-bisgipaa sugued.  
 E-buarmar walapaa, degine, e-sigmalad, gwaapaa soberbalid.
- <sup>15</sup> Degine, yawagak-baid-dikarbali, mor-dummad dalipaa-gaka-bisgipaa-sugu naid.

Degi, buarmar, walapaa,  
degi, e-sigmarmogad, gwapaa sobarbalid.

<sup>16</sup> Mor-dummagan neg-galugi-nanaidi, bela lino-mor-nuegan naed.

<sup>17</sup> E-buarmar-sigmalad bela esgoro-gordikidgi sobaledbiid.

E-gamaladi, degi, e-olua-dummagandi, manibi sobaled.

Deginbali, e-buar-nonomargi, bela manibi matak-matak ebiris naid.

Bela Babse-goled-neg-e-buarmar-bukwad-e-olua-dummagan bela manibiid.

<sup>18</sup> Yawagakga neg-imba-dogedgi mor-dummad-naidi, mor ise-nue-sobar, bela-bela nue-yeerdakle-imakar naid.

We-mor-dummad-sobaledi, we-dubmargi  
sobaled:

Nirbadub-aradgi,  
nirbadub-suir-akwagiidgi,  
nirbadub-ginnidgi,  
degi, lino'dub-nuedgi sobaled.

E-suguedi, daliataled.

E-nibgueddi, daligwen-gaka-bisgise  
nibgued.

We-mor-dummagan mor-dummagan-neg-imbagi-nanaidyob-dungu imaklesad.

<sup>19</sup> E-buarmar, walabake gued,  
e-sigmalad, gwabakebalid.

Wemar, esgoro-gordikidgi sobaled.

E-gamalad, e-olua-dummagan manigi  
sobaled,

degi, e-buar-nonomargi, bela manibi matak-matak ebiris naid.

**20** Bab-Dummadse-goled-neg-sunna-seleged-e-bargamalad,

degi, neg-imba-e-galu-ebirnайд-e-bargamalad,  
bela esgoro-gordikidgi sobaled.

*Babse-goled-neg-selegedgi ibmarmar-ebulesad*

**21** Bab-Dummad-dulemarbo-Igar-Mesisad-neg-sunna-selegedgi ibmarmar-ebulesad ebislesgusad. Leví-e-wagan, Moisés-sogedba ibmar-ebismalaga arbasmalad. Geb Aarón-dule-irwa-Bab-Dummadse-goled-machi-Itamar, ibmarmar-ebislesad narmaksad.

**22** Uri-machi-Bezaleel, bela Bab-Jehová igi Moisés'ga sogsagusa, deyob ibmar imaksad. Bezaleel Hur-e-wagwad, dad-dummad-Judá'gi danikidid.

**23** Ahisamac-machi-Aholiab, Bezaleel-bendakega gusad.

Aholiab, dad-dummad-Dan'gi danikidid. Aholiab'de, esgorogi-ibmar-sobed-duled, nabir-ibmar-akar-akar-onogedbalid. Deginbali, nabir we-dubmargi ibmar-sobedbalid:

Nirbadub-aradgi,  
nirbadub-suir-akwagiidgi,  
nirbadub-ginnidgi,  
degi, lino'dub-nuedgi  
mor-yeerdakle sobedid.

**24** Israel-dulemar Bab-Dummad-neg-sunna-selegedgi-ebulegegä,

Bab-Dummadga-or-eksamalad, bela ebusmalad.

Nibir-milibo gaka dulabakebak-gakambe-gakatar (2,195), ebusmalad.

Bab-Dummad-neggi nibirgi-ibmar-wilubsaledeba imaksamalad.

<sup>25</sup> Dulemar-bukwad-ebislesadba, e-mani, nibir-miligugle gaka dulataled-ilatar gaka dulabo-gakambe (7,550) gusad.

Bab-Dummad-neggi nibirgi-ibmar-wilubsaledeba imaksamalad.

<sup>26</sup> Bela-dulemar-birga-dulagwen-gaka-nikmaladi (20+), mili-dulataled-ilanergwa-gakapaa gaka dulataled-ilatar gaka dulabo-gakambe-mergu (603,550) daklealid.

Wemala, e-dule-irba mani-gramo-nergwa uksamalad.

Bab-Dummad-neggi nibirgi-ibmar-wilubsaledeba imaksamalad.

<sup>27</sup> Deginbali, Bab-Dummadse-goled-negga e-signalad-sobega,

degi, mor-dummad-naidga e-signalad-sobega, mani, nibir-miligugle gaka dulataled-ilatar (7,500) ebulesbalid.

E-siged-dulatargi (100),

mani, nibir-miligugle gaka dulataled-ilatar (7,500) ebulesad.

Degisoggu, e-siged-iliba nibir-dulapaa-gakambe-gakatar (75) ebulesad.

<sup>28</sup> Mani-gwabgusadgindi buarmar-gamalad sobsad,

Degine, buar-e-nonomar, degi, e-olua-dummagan sobsabalid.

- 29 Dulemar esgoro-gordikid nibir-miliatar gaka dulataled-ilapaa gakambe (5,310) uksamalad.
- 30 We-esgoro-gordikidgi Bab-Dummadse-goled-neg-sunna-seleged-e-yawagak-siged, degine, Bab-Dummadga-ibmar-ogumaker-ukleged-aila, sobsamarbalid.  
 Agine, san-nared-saki-sakid sobsamarbalid, degine, a-ailagi-ibmar-ebulemalad bela sob-samarbalid.
- 31 Amba Bab-Dummadse-goled-neg-sunna-seleged-e-signalad, esgoro-gordikidgi sobsamalad.  
 Degine, bela a-neg-bargamalad, degi, bela e-galu-bargamalad-dikarba-gwigwismalad, esgoro-gordikidgi sobsamarbalid.

## 39

*Dule-irwa-Babse-gormalad-e-mormar-soblesad*

(Éxodo 28:1-43)

- 1 Dule-irwa-Bab-Dummadse-gormalad-mormar nirbadub-aradgi, nirbadub-suirkwagiidgi, nirbadub-ginnidgi, mor sobsamalad. We-mor-yoi, Bab-Dummadse-goled-negse dogdedamalad. Amba deyobi, Aarón'ga mor-islidikid imaksamarbalid. Igi Bab-Jehová, Moisés'ga sogsgusa, deyob imaksamalad.

*Mor-efod'ye-nugad-maklesad*

(Éxodo 28:6-14)

<sup>2</sup> Bezaleel mor-efod'ye-nugad amba deyob imaksabalid.

A-imakega, we-dubmar ebusad:

Ordub,  
nirbadub-arad,  
nirbadub-suir-akwagiid,  
nirbadub-ginnid,  
degi, lino'dub-nued.

<sup>3</sup> Or-matargwa-matargwa imaksamalad,  
deGINE, gara-gara dubga siksamalad,  
adi, nirbadub-aradgi,  
nirbadub-suir-akwagiidgi,  
nirbadub-ginnidgi,  
degi, lino'dub-nuedgi,  
ise-nue-yeerdakle imakegar.

<sup>4</sup> DeginE, mor-efod'ye-nugad-e-gukingi nabir-atinned imaksamarbalid, adi, agi e-dukugi abin atogegar. <sup>5</sup> Mor-molidubga-gunaidi, mor-efod'babaka-mesa naid. We-mor-molidub amba deyob we-dubmargi imakarmogad:

Ordubgi,  
nirbadub-aradgi,  
nirbadub-suir-akwagiidgi,  
nirbadub-ginnidgi,  
deGINE, lino'dub-nuedgi imakaled.

Igi Bab-Jehová Moisés'ga sogsgusa,  
deyob imaksamalad.

<sup>6</sup> Akwamar-ónice'ye-nugad-nue-sobsamaladi,  
or-birgi sismalad. Agine, wilub-nasikega-imakdamaladyob imaksamalad. Agi Israel-masmala-e-nug nasiksamalad. <sup>7</sup> Mor-efod'ye-nugad-e-gukingi nasiksaD, adi, a-akwamargi

Israel-dulemar-sogambe-gakabogwad  
insaledii guegar. (12)

Igi Bab-Jehová Moisés'ga sogsagusa, deyob imaksamalad.

## *Mor-bin asgargi-nagued-maklesad*

(Éxodo 28:15-30)

<sup>8</sup> Bezaleel, mor-binasgargi-nagued, nue-yeerdakle, mor-efod'ye-nugad-imakaledyob imaksabalid. We-dubmargi imakaled:

Ordubgi,  
nirbadub-aradgi,  
nirbadub-suir-akwagiidgi,  
nirbadub-ginnidgi,  
lino'dub-nuedgi, imaksad.

<sup>9</sup> Deginbali, mor-binasgargi-nagued-e-sugued, degi, e-matardungued, bela emarbiid, degi, darbobalid. We-mor nubyaa-imaksale, e-sugued, degi, e-matardungued, achagwenad. <sup>10</sup> We-mor-birgine, akwamar-nuegan-ilemakar-sogabake osismalad:

Ile-soggwengine, we-akwamar osismalad:

Akwa-sardio'ye-nugad,  
akwa-topacio'ye-nugad,  
akwa-carbunclo'ye-nugad.

Weyob ile-soggwēngi bukwad.

**11** Ile-sogbogine, we-akwamar osismarbalid:

Akwa-esmeralda'ye-nugad,  
akwa-zafiro'ye-nugad,  
akwa-diamante'ye-nugad.

Weyob ile-sógbogi bukwad.

**12** Ile-sogbaagi, we-akwamar osismarbalid:

Akwa-jacinto'ye-nugad,

akwa-ágata'ye-nugad,  
akwa-amatista'ye-nugad.

Weyob ile-sogbaagi bukwad.

<sup>13</sup> Ile-sogbakegi, we-akwamar osismarbalid:

Akwa-berilo'ye-nugad,  
akwa-ónice'ye-nugad,  
akwa-jaspe'ye-nugad.

Weyob ile-sogbakegi bukwad.

Bela we-akwamar-mor-birgi-bukwadi, or-ega-imaklesad-imbaba osismalad. <sup>14</sup> Akwa-nuegana gwaambe-gakabo (12) gued, Israel-masmala-mergedba, degi, akwa-gwa-gwagwengi e-nugmar ilibali narmakar nanaid. Igi wilub-nasikega imakdamala, deyob Israel-dulemar-sogambe-gakabogwad-e-nugmar (12) egi narmakar nanaid.

<sup>15</sup> Mor-binascargi-naguedga ordub-nued sinni-sinni imaksamarbalid. <sup>16</sup> Deginbali, akwamar-e-sigoed gwabo orbi imaksamalad, degine, olua-gwabo orbi imaksamarbalid. Oluamar-gwabogwad mor-binascargi-nagued-e-dukumar-sogbogwadgi nasiksamalad. <sup>17</sup> Geb degine, ordubmar-sinni-sinnid-giabogwad mor-binascargi-nagued-e-dukugi-olua-gwabogwad-naidgi odosad. <sup>18</sup> Geb deginbali, amba ordubmar-sinni-sinnid-e-duku-sogbogwad ormar-sigedgi, mor-efod'ye-nugad-e-gukingi asabin nasiksamalad. <sup>19</sup> Deginbali, orbi olua-gwabo imaksamarbalid. Mor-binascargi-nagued e-dukumar-bergunaidgi, asabin-urbalidgi nasiksamarbalid. <sup>20</sup> Deginbali, olua-gwabo orbi imaksamarbalid, mor-efod'ye-nugad-gukingi asabin urbali makaled-waliksaar, mor-

sadergi-nagued-birgi-nasikega imaksamalad.  
**21** Deyobi, mor-binasgargi-nagued-e-oluamargi  
 mor-efod'ye-nugad-e-oluamar-ebô dub-aradgi  
 edichamalad, adi, mor-efod'ye-nugad-e-mor-  
 sadergi-nagued-birgi, mor-binasgargi-naguedgi,  
 mer bachikii guegar. Igi Bab-Jehová-Moisés'ga-  
 sogsa, deyob imaksamalad.

*Dule-irwa-Babse-goled-e-mormar-baigan-  
 imaklesad*  
*(Éxodo 28:31-43)*

**22** Deginbali, mor-dummad-efod'ye-nugad  
 bela mor-aradgi nue-sobar imaksamalad.  
**23** E-negabargi, yaa-olloo nono-odogega mor-  
 gammuga imaksamalad. Mor-gammu-e-dikarba,  
 melle achirmakega, bela-ebilis dubgi sobsamalad.  
**24** Mor-dummad-e-nag-dukugi sapi-granada-e-  
 sanyob-dakleged nirbadub-aradgi, nirbadub-  
 suir-akwagiidgi, nirbadub-ginnidgi, lino'dub-  
 nuedgi-sobar imaksamalad. **25** Deginbali,  
 gapan-burwigana olobiid imaksamarbalid. We-  
 gapan-burwigana, bela mor-e-nag-duku-ebilis  
 sapi-granada-e-sanyob-dakleged imba-imbagi  
 nasiksad. **26** Gapan-bipigwad-gwensak, a-dikarba  
 sapi-granada-e-sanyob-dakleged nasiksad. Deyob  
 bela muchub-muchub mor-dummad-suitigwad e-  
 nag-ebilis nasiksamalad. We-mor, dule-irwa-Bab-  
 Dummadse-goled, Bab-Dummadse-gornadele,  
 ebuded. Igi Bab-Jehová Moisés'ga sogsa, deyob  
 imaksamalad.

**27** Deginbali, Aarón'ga, degi, e-masmalaga  
 mor-dummad-suitigwad lino-mor-nuedgi-sobar

imaksamarbalid. <sup>28</sup> Deginbali, mor-gurgin-ebirmakaled lino-mor-nuedgi, e-yeerdaklemalad imaksamarbalid. Amba lino'dub-nuedgi garson-bipi-urba-yoleged imaksamarbalid. <sup>29</sup> Deginbali, morgo-dub-sadergi-nagued we-dubmargi sobsamarbalid: Lino'dub-nuedgi, nirbadub-aradgi, nirbadub-suir-akwagiidgi, nirbadub-ginnidgi, ise-nue-sobar, bela-bela-nue-yeerdakle imaksamalad. Igi Bab-Jehová Moisés'ga sogsa, deyob imaksamalad.

<sup>30</sup> Deginbali, or-nued-matarkwaa sobsamarbalid. We-or-nued-matargwagwadgi wilub-nasikega-imakdamaladyob we-gayaburba nasiklesad: “BAB-JEHOVÁ’GA SWILIDIKNUGSALEGALED.”

<sup>31</sup> We-or-matargwagwadga dub-arad nasiksamalad. Adi, we-dub mor-gurgin-birgi atinegar.

Igi Bab-Jehová Moisés'ga sogsa, deyob imaksamalad.

*Bab-Dummadse-goled-neg-seleged-soblesad  
bergusad*

(Éxodo 35:10-19)

<sup>32</sup> Weyob Bab-Dummadse-goled-neg-sunna-seleged, sobsa gusmalad. We-nega bilebalid, Bab-Dummad-dulemarbo-ambikued-negye. Ar igi Bab-Jehová Moisés'ga sogsa, deyob Israeldulemar sobsamalad.

<sup>33</sup> Bab-Dummadse-goled-neg-soblesad Moisés'ga uksamalad,  
degi, we-ibmarmar-egi-ebulegoed bela ega uk-samarbalid:  
Bela mor-gamalad,

e-urgomar,  
 e-suар-walagana,  
 e-buarmar,  
 degi, e-sigmaład.

<sup>34</sup> E-sibad-wawaad-macheder-e-ukamar-ginnidgi-odolegaled,  
 ibdurgan-uka-nuegan,  
 degi, mor-dummad Bab-Dummad-Dulemarbo-Igar-Mesisad-Ulu-nabagnagoed.

<sup>35</sup> Bab-Dummad-Dulemarbo-Igar-Mesisad-Ulu,  
 e-suarmar-suigan,  
 degi, e-eduged.

<sup>36</sup> Mese,  
 bela eba-ibmarmar-ebuleged,  
 degi, Bab-Dummad-asabin-madu-ega-ukleged.

<sup>37</sup> Gwallu-sied-olobiid-imakaled,  
 e-gwallumar,  
 gwallumar-bela-ilekwaa-silegoed,  
 bela-ibmarmar-gwalluba-ebulemalad,  
 degi, e-gwallu-diimar.

<sup>38</sup> Bab-Dummadga-ibmar-wawadik-ogumakar-ukleged-aila-olobiid,  
 gwallu-wawad magega-ebuleged,  
 ina-wawadikid,

degi, mor-dummad Bab-Dummadse-goled-neg-sunna-seleqed-yawagak-dogedgi naguoed.

<sup>39</sup> Bab-Dummadga-ibmar-ogumakar-ukleged-aila-esgoro-gordikidgi sobaled,  
 esgoro-gordikidgi san-nared-saki-sakid  
 sobaled,  
 e-suarmar-walagana,

- degi, bela eba-ibmar-ebulemalad,  
E-dii-sied,  
degi, e-sigid.
- 40** Mor-dummagan e-galugi naguoed,  
e-buarmar,  
egi-sigmaload,  
degene, e-mor-dummad neg-imba-dogedgi  
naguoed.  
E-dubmar,  
e-bargamalad,  
degi, bela Bab-Dummadse-goled-neg-sunna-  
seleged dulemarbo-danar-ambikued-neggi  
ibmar-ebulemalad.
- 41** Deginbali, Bab-Dummadse-goled-neggi dule-  
irwa-Bab-Dummadse-golega e-mormar-  
ebulemaloed.  
Dule-irwa-Bab-Dummadse-goled-Aarón-  
mormar-islidikid-ebugoed,  
degi, Aarón-e-masmala dulemar-irwa-  
Bab-Dummadse-gorsokalir, mormar-  
ebumaloed.  
We-ibmarmar Moisés'ga uksamalad.
- 42** Ar igi Bab-Jehová Moisés'ga igar-uksa, bela  
deyobi Israel-dulemar ibmar imaksamalad.
- 43** Moisés bela ibmar-imaksamalad argasad. Ar  
Moisés daksagua, Israel-dulemar Bab-Jehová-  
sogsadba bela ibmar-imaksamala, a-dulemargi  
ise-nued binsasad.

## 40

*Moisés                    Bab-Dummadse-goled-neg-sunna-  
seleged sisad*

**1** Geb degine, Bab-Jehová Moisés'ga sunmakded, ega sogded:

**2** "Gebe-nii-onoded ibagwengi, anse-goled-neg-sunna-seleged be sioed.

We-negde, dulemar-anbo-ambikued-negad.

**3** A-negyabali, Bab-Jehová-Dulemarbo-Igar-Mesisad-Ulu be sioed.

Geb we-Ulu-idu, mor-dummad be nasikoed.

**4** Mor-naid-idu, mese be sioed,  
a-mese, nue-ise-nudakar be sioed.

Degine, gwallumar-sied be sibaloed,  
degine, e-gwallumar ega be ogaoed.

**5** Anga-in-a-wawadikmalad-ogumakar-ukleged-aila-olobiidi,

Bab-Jehová-Dulemarbo-Igar-Mesisad-Ulu-irwa  
mor-naid-asabin, be sioed.

Degine, anse-goled-neg-sunna-seleged-doged-asabin, mor-dummad be nasikoed.

**6** "Geb a-sorbali, anse-goled-neg-sunna-seleged dulemar-anbo-ambikued-negye bilebalid, a-asabin, anga-ibmar-ogumakar-ukleged-aila be sioed. **7** Geb degine, dulemar-anbo-ambikued-neg, degi, anga-ibmar-ogumakar-ukleged-aila, amar negabargi dii-sied be sioed. Geb degine, dii-siedgi dii be enogoed. **8** Geb napidgine, e-dikarba galu be imakoed. Geb a-galu-dogedgi mor-dummad be nasikoed.

**9** "Geb a-sorbali, gwallu-wawad-magega-ebuleged, a-gwallu-wawadgi anse-goled-neg-sunna-seleged, degi, bela-ag-i-bmarmar-bukwadi be magoed. Adi, deyob we-i-bmarmar angadgarbi guoed. **10** Deginbali, anga-ibmar-ogumakar-ukleged-aila, degi, bela e-i-bmarmar, gwallu-

wawad-magega-ebulegedgi be mage-mage saoed. Adi, deyob we-ibmarmar angadgarbi guoed. <sup>11</sup> Amba deyobi, dii-sied, degine, e-siged, gwalluwawad-magega-ebulegedgi be magbaloed. Adi, deyob we-ibmarmar angadgarbi guoed.

<sup>12</sup> "Geb a-sorbali, Aarón, degi, e-masmala, dulemar-anbo-ambikued-neg-e-yawagakse be sedoed. Geb amar diigi be ogoed. <sup>13</sup> Geb Aarón'ga be e-mor-islidikmalad yooed. Geb gwalluwawad egi be eogoed. Geb anga-arbaega be Aarón-onugsaoed, adi, dule-irwa-anse-goledga guegar. <sup>14</sup> Geb a-sorbali, Aarón-e-masmala bese warmakega be imakoed. Geb degine, ega mordummad-suitigwad be yooed. <sup>15</sup> Ar igi gwalluwawad e-babgi be eosa, deyob e-masmalagi be eomogoed. Geb amala dulemar-irwa-goledga anga gumaloed. Gwallu-wawad egi eolesad-ulale, e-wagan degisadegu anse-dule-irwa-goledga gumaloed."

<sup>16</sup> Moisés, Bab-Jehová-bela-ega-igar-uksadba sogedba imaksad.

<sup>17</sup> Birgabogwadgi, gebe-nii-onoded-ibagwenadgi, Bab-Dummadse-goled-neg-sunna-seleged osisgusad. <sup>18</sup> Moisés, Bab-Dummadse-goled-neg-sunna-seleged osisad, e-sigmalad urbisad, e-urgomar ogwichisad, e-suarmarbiir-megmalad mesisad, degine, e-buarmar ogwichisbalid. <sup>19</sup> Moisés, Bab-Dummadse-goled-neg-sunna-seleged-birgi mor-dummagan ogichad. Moisés, igi Bab-Jehová ega igar-uksa, sogedba imaksad.

<sup>20</sup> Geb a-sorbali, Moisés, Bab-Dummad-Dulemarbo-Igar-Mesisad akwagi-narmakar-

maid susad, geb Bab-Dummad-Uluyaba mesisad. Deginé, a-Ulu seegala, e-suarmar egi yosad. Geb degine, a-Ulu-birgi, Ulu-eduged mesisad. **21** Geb Moisés, Bab-Dummadse-goled-neg-sunna-selegedyaba Ulu odosad. Geb mor-dummad Ulu-idu nasiksad, adi, dulemar mer a-Ulu dakmalagar. Moisés, igi Bab-Jehová ega igar-uksa, sogedba imaksad.

**22** Moisés, Bab-Dummad-dulemarbo-ambikued-negyaba, mor-dummad-naid-dad-nakwed-argan-sapiledsik, mese sisbalid. **23** A-mese-birgi madumar ilekwaa urbisad. Moisés, igi Bab-Jehová ega igar-uksa, sogedba imaksad.

**24** Moisés, Bab-Dummad-dulemarbo-ambikued-neggi, dad-nakwed-argan-nuedsik mese-asabin, gwallu-sied sisad. **25** Deginé, Bab-Jehová-asabin gwallumar-ogasad. Moisés, igi Bab-Jehová ega igar-uksa, sogedba imaksad.

**26** Deginbali, Moisés, Bab-Dummad-dulemarbo-ambikued-neggi, mor-dummad-naid-asabin, Bab-Dummadga-ina-wawadikid-ukleged-aila-olobiid sisbalid. **27** A-aila-birgine, Moisés, ina-wawadikmalad ogumaksad. Moisés, igi Bab-Jehová ega igar-uksa, sogedba imaksad.

**28** Deginbali, Moisés, Bab-Dummadse-goled-neg-dogedgi mor-dummad nasiksabalid.

**29** Deginbali, Moisés, Bab-Dummad-dulemarbo-ambikued-neg-sunna-seleged-doged-asabin, Bab-Dummadga-ibmar-ogumakar-ukleged-aila sisbalid. Agi, Bab-Dummadga-ibmar-ogumakar uksad, degine, Bab-Dummadga-ibmar-gwagmar-ukleged uksabalid. Moisés, igi Bab-Jehová ega igar-uksa, sogedba imaksad.

<sup>30</sup> Deginbali, Moisés, Bab-Dummad-dulemarbo-ambikued-neg, degi, Bab-Dummadga-ibmar-ogumakar-ukleged-aila, wemar-abargine, diised sisbalid. Degin, agi dii enosbalid, adi, agi argan, degi, nag enukegar. <sup>31</sup> Agine, Moisés, Aarón, degi, Aarón-e-masmala, argan, degi, e-nagmar na enuksamalad. <sup>32</sup> Amar, Bab-Dummad-dulemarbo-ambikued-negse dogdemalar, Bab-Dummadga-ibmar-ogumakar-ukleged-ailase warmaknadmalar, e-argan, degine, e-nag enukdamalad. Ar igi Bab-Jehová Moisés'ga igar-uksa, deyob enukdamalad.

<sup>33</sup> Geb napidgine, Moisés, Bab-Dummadse-goled-neg-sunna-seleged-e-galumar nasiksad, Bab-Dummadga-ibmar-ogumakar-ukleged-aila, degi, Bab-Dummadse-Goled-Neg-Islidikid, amar-ebilis we-galumar nasiksad. Degin, we-galudogedgi mor-dummad nasiksad. Weyob Moisés Bab-Dummadse-goled-neg-sunna-seleged sobsad. Bela Moisés weyob obelosad.

*Bab-Jehová-e-gangued-yeerdakleged aidenonikid  
(Números 9:15-23)*

<sup>34</sup> Bab-Dummadse-goled-neg-sunna-selegedgi, dulemar-ambikuedgi mogir nagunonikid. Geb a-neggi bela-bela-ena Bab-Jehová-e-gangued-yeerdakleged aidenonikid. <sup>35</sup> Moisés, Bab-Dummadse-goled-negse geg-doge-gualid, ar ade, a-birgi mogir-naid, degine, Bab-Jehová-e-gangued-yeerdakleged bela agi ena naibalid.

<sup>36</sup> Israel-dulemar Bab-Dummadse-goled-neggi bubawaryob mogir-naid-nakwidele, e-neg-bubukwad weeddamalad. Geb agi

banguddamarmogad. <sup>37</sup> Ar mogir Bab-Dummadse-goled-neggi-bangusulile, Israel-dulemar-na-danar-danar-bukwadgi geg bangudamalad. Mogir Bab-Dummadse-goled-neggi-bangudele, geb agi banguddamalad. <sup>38</sup> Ar ade, Bab-Jehová-e-mogir neg-ibgine, ese-goled-neg-birgi naidaed, degine, neg-mutikdi, ese-goled-neg-birgi bubawaryob soo ganaidaed. Bela Israel-dulemar bubawaryob we-mogir dakedbidamalad. Weyobi, Israel-dulemar bangued-irba gusdaed.

**Bab-Dummad-Garda-Islidikid  
The Holy Bible in the San Blas Kuna language of  
Panama  
La Santa Biblia en el lenguaje de San Blas Kuna de  
Panamá**

copyright © 2014 Wycliffe Bible Translators, Inc.

Language: San Blas Cuna (San Blas Kuna)

Translation by: Wycliffe Bible Translators, Inc.

**Copyright Information**

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The Bible without Deuterocanon**

in Kuna, San Blas

**© 2014, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-03-31

---

PDF generated using Haiola and XeLaTeX on 11 Nov 2022 from source files  
dated 29 Jan 2022

eb5c3a84-7a8b-5f2f-8344-21a6af7506b8